

四庫全書

經部

欽定四庫全書

經部

詩經世本古義卷十九之上

詳校官監察御史_臣曹錫寶

通政使司副司_臣莫瞻菴覆勘

總校官降調編修_臣倉聖脉

校對官中書_臣葉蘭

謄錄監生_臣劉澹

欽定四庫全書

詩經世本古義卷十九之上

明 何楷 撰

周平王之世詩三十四篇

瞻彼洛矣紀東遷也

按史周幽王十有一年申侯與犬戎入也戎弑王于驪山之下

鄭桓公友元之鄭人共立其子掘突是為武公時晉衛秦皆以兵來救平戎武公收父散兵從諸侯東迎

故太子宜臼于申立之是為平王王以豐鎬逼近戎狄不可居乃遷都于洛此詩所詠正其事也篇中有

韎韐一語知為指鄭武公解見本文下武公新喪父故服韎韐給竹書稱武公為鄭子而緇衣之詩亦呼武

公為子則以諸侯即位未踰年改元猶稱子也左傳謂周之東遷晉鄭馬依故書有文侯之命而詩如瞻雒裳華縚衣諸篇凡為鄭武公咏者不一而足則以申為平王母家而武公亦娶于申有昏姻之誼深為平王所倚重故也

瞻彼洛

光廟諱今文通作雒按光武都雒以火行忌水故去其水而加佳及魏為土德以土水之母也

水得土而流土得水而榮復除佳加水

矣維水決決

豐氏本作漪漪彼不知矣止之為韻

而欲與茨師叶耳二三章亦妄以意改之偽書之庸鄙可哂如此

君子至止

絀韻福祿如

茨棘韜有奭

白虎通作艷

以作六師

支韻每三句一韻而夾一句不韻于其中

亦殊製也賦也雒水名王安石朱子皆以為在東都者是也山海經稱雒舉之山雒水出焉而禹貢云導雒

自熊耳蓋發源誰舉而經繇熊耳也及過河南縣南又
過雒陽縣南則周公所營雒邑在焉孝經援神契云八
方之廣周雒為中謂之雒邑周書云周公將致政乃作
大邑成周于土中城方千七百二十丈郭方七百里南
繫于雒水北因于邾山以為天下之大濶制邾甸方六
百里國西土為方千里摯仲治云古之周南今之雒陽
也決說文云滂也重言決決毛傳云水深廣貌錢天錫
云自古都會必居大川之側以四方朝貢漕輓為易如
在渭之將豐水東注觀禹貢所列貢道此意可見君子
朱子云指天子也至止者至雒邑而定都也孔穎達云
凡言福者大慶之辭祿者吉祉之謂善事皆是不必一
定愚按此主言其居天位享天祿也茨以覆屋綿密堅
固不可動搖今王遷都實為子孫莫無窮基業故以如
茨期之後章所云保家室保家邦是也棘說文云茅蒐
染韋也杜預云棘聲也今絳草茅蒐急疾呼茅蒐成棘
也即今之蒨禮記注云赤黃之間色韜本作恰以市合

聲市即黻字亦謂之韠說文云士無市有韠制如楹
缺四角徐鉉云酒榼腹圍上小下大象之也鄭云韠
者祭服之韠合韋為之孔云大夫以上祭服謂之韠士
無韠名謂之韠韠士冠禮爵弁服韠韠不言韠是也士
言韠韠亦猶大夫以上之言韠也陳暘云韠之色視裳
而已兵事韋弁服韋弁服纁裳故貴者以朱芾卑者以
韠韠周祈云韠韠韠三者皆蔽膝之衣制同名異韠乃合
韠韠韠不合此其異耳與適作韠赤貌白虎適云世子
上受爵命衣士服何謙不敢自專也故詩曰韠韠有珌
世子始行也孔云王制言諸侯之世子未賜爵視天子
之元士以君其國此言韠韠故知諸侯世子未賜爵命
服士服也愚按此指鄭武公也作說文云起也指麾鼓
舞之意毛云天子六軍鄭云時有征伐之事天子以其
賢任為軍將也補傳云六師萬年之語可為王者之證
王應麟云周公東征四國是皇此上公為軍將也韠韠
有與以作六師此諸侯世子為軍將也金履祥云按東

遷時定難立君惟秦晉鄭衛四國耳秦襄公與西戎世
為不共戴天之讐其勢亦不兩立其與戎力戰固亦為
已不獨為王室也平王以岐豐之地予之使之自取然
西戎方熾父子力戰二十一年而始得之固不暇東
畧矣周室都雒則晉居河北表裏山河是為屏輔文侯
固忠而賢然其前有殤牀之難其後有曲沃之封晉之
替實自是始平王所望于文侯者亦固不以興復期之
則其委任可知平王申出鄭武公娶于申武公以昏姻
之故迎王于申立之觀平王戌申之志則其依鄭之心
可推也想其柄任在于鄭武所以終平王之世鄭伯父
子世于其職衛武雖
賢其柄任未必在

瞻彼洛矣

見前

維水泱泱

豐本作滴

君子至止

見前

韉

陸德明本作琤

琤

陸本

有珌

質韻陸本作琤

君子萬年

保其家室

質韻

賦也

韉說文云刀室也孔云古之言

韉猶今之言韉也亦謂之韉

內則云右佩韉

遺

是也琇徐鍇云刀削上飾也琇之為言捧也若捧持之也上謂首也劉熙云室口之飾曰琇或作轄左傳鞞琇琇卑也蓋琇琇雖皆刀削之飾而琇尤在其下也毛云天子玉琇而琇琇諸侯璆璆而璆璆大夫璆璆而璆璆士琇琇而琇琇董氏云此出于三朝禮陸德明云璆謂之璆黃金謂之璆璆璆璆皆玉也琇璆屬又璆璆或从金作鐻鐻爾雅云黃金美者謂之鐻白金美者謂之鐻愚按左傳云藻率鞞鞞屬游纓昭其數也此詩概言琇琇而不言其所飾之物當是通天子諸侯而下言之猶云不圖今日復見周官威儀耳家室以天子之家室言天室既奠貽子孫以萬年之安所謂保也

瞻

彼洛矣

同前

維水泱泱

豐本作融融

君子至止

同前

福祿既同

東韻

君子萬年保其家邦

叶東韻悲工翻

祿既同言與諸侯共之也愚按孟

子言與共天位與食天祿即所謂既同者家
邦指天下也王者以天下為家故曰家邦

瞻彼洛矣三章章六句

序云刺幽王也思古明王能爵命諸侯賞善罰惡焉

其於經義有何相涉朱子謂此天子會諸侯于東都以講武事而諸侯美天子之詩申培說襲之子貢傳則謂此詩與駕鳶魚藻皆諸侯所以報天子而或又據車攻有徂東之語疑為宣王時詩雖皆近似然究之韎韐有奭非天子服也故斷謂非東周鄭武不足以當之

緇衣美鄭子掘突也犬戎弑幽王於驪山下并殺鄭

桓公鄭人共立其子掘突是為武公

自犬戎下至此俱出史記與

晉衛秦會師興復周室故平王愛之如此

竹書紀幽王十一年

申侯魯侯許男鄭子立宜曰于申平王元年王東徙
雒邑晉侯會衛侯鄭伯秦伯以師從王入于成周是
則武公之于平王始而迎立繼而東徙皆與有力王
之德鄭也深故其情見乎詞特為懇摯如此禮記載
子曰好賢如緇衣孔叢子亦載
子曰於緇衣見好賢之至也

緇衣之宜

支韻

兮敞

絕句陸德明本作弊

予又改為

支韻

兮適子之館

叶翰韻

兮還

絕句此與上文敞字皆以一言為一句

予授子之粲

翰韻

兮

緇說文云帛黑也按爾雅及考工記云一染謂之緇淺赤色今之紅也再染謂之窺窺與頰同赤色也三入為纁謂染朱黑色即絳也五入為緌謂三入之後再染以黑七入為緇謂五入之後又復以黑再染之也此緇衣乃諸侯與其臣服之以日視朝者故禮通謂此服為朝服時武公繼立新受封爵故有緇衣之賜宜說文云

所安也言此服與此人相安明其德足以居此也敝敗
衣也改更也俱見說文言他日此衣若敝則我當更製
以賜見其眷注之無已也適說文云之也子指武公也
諸侯即位未踰年改元稱子館說文云客舍也時周新
遷東都故武公止于客舍平王親臨視之亦以省其舍
止之安否也還說文云復也謂見畢而駕旋也承適字
而言授說文云予也粢粟治之精者說文云稻重一石
為粟二十斗為米十斗曰穀為米六斗大半斗曰粢漢
有白粢之刑給春稻之役爾雅訓粢為餐亦曰粢乃所
以為餐云爾郭璞以為今河北人呼食為餐則粢乃餐
之轉音非是嚴粢云既見之而歸我又取米之精者以
遺之猶白飯青芻之意孔穎達云飲食雖云小事聖人
以之為禮伐柯言王迎周公云我親之
子還豆有踐奉迎聖人猶願以飲食也
縑衣之好
分敝予又改造
分適予之館
分還予授子之粢

皓韻

前見

前見

兮

賦也好美也此以緇帛之美好言與上章宜字意有別造說文云就也謂成就也

緇衣之

蓆

叶藥韻祥禽翻

兮

敝予又改作

藥韻

兮適子之館

見前

兮還予授

子之粲

見前

兮

賦也蓆韓詩云儲也說文云廣多也爾雅云大也愚按蓆之為字从艸从席如前三

訓不得其解今人誤謂蓆即席故程子謂蓆有安舒之義然考古文凡用席字無通用蓆者則蓆之非席確矣

偶思之而得古人命字之義古人坐席或數數重此蓆字加艸于席上當是取卉艸相枕藉如席然故韓詩訓

儲說文訓多又因多而推言之則為廣為大總之不離儲與多者近是然則此言緇衣之蓆者亦明其所贈緇

衣不止一襲也作說文云起也謂創起而為之也平王

之愛武公雖用物有盡而寄意無窮故其言之不一而

此足如

緇衣三章章六句

舊于徹字還字不絕皆云章四句序云美武公也父子並為

周司徒善于其職國人宜之故美其德以明有國
善善之功焉朱子從其說徐學謨云適館授粢豈
民之得施于上者而朱傳因之何也愚按禮玉藻
云天子皮弁以日視朝諸侯朝服以日視朝曹氏
云天子常朝之服用皮弁諸侯常朝之服用羔裘
玄冠也皮弁以白鹿皮為冠以狐白皮為裘以素
錦為衣而裼之其上加朝服十五升白布為之衣
冠同色故也羔裘以緇布為冠以黑羊皮為裘以
緇布為衣而裼之其上加朝服十五升緇布為之
其裳皆素凡朝服君與卿大夫同今武公既入為
天子之卿則當服皮弁不當服緇衣矣又按竹書
王錫司徒鄭伯命在乎王三年此時武公已除服
即吉不應復以子稱且曰適子之館明是周初遷
都時栖止未定故武公暫就客舍以居然則此詩

之作當在武公初受封為伯而從王入成周之時其必非在為司徒之日甚明也若子貢傳申培說皆以為鄭武公好賢賦詩貽之雖亦近似然武公好賢之事史無所載不敢謂然

車鄰秦臣美襄公也平王初命襄公為秦伯其臣榮

而樂之

子貢傳云襄公伐戎初命為秦伯國人榮之賦車鄰按史記襄公七年西戎犬戎與申侯

伐周殺幽王驪山下而襄公將兵救周戰甚力有功周避犬戎難東徙洛邑襄公以兵送周平王平王封

襄公為諸侯賜之周以西之地玩此詩乃秦臣所作

有車鄰鄰

叶先韻陵延翻漢書作鄰釋文作隣

有馬白顛

先韻

未見君子寺

釋文人之令

叶先韻力延翻韓詩作伶賦也鄰通作隣說文云車聲也曰鄰鄰者毛傳以為衆

車聲孔穎達云車有副貳明非一車又曹氏陸佃皆解如字云鄰鄰密比之意言車之衆亦通爾雅云馬的顙白顙舍人云的白也顙顙也顙有白毛今之戴星馬也陸佃云顙禮曰奉束帛匹馬卓上九馬隨之說者以為卓即的顙故以為上列而九馬隨其後莊子曰齊之以月題蓋月題顙上當顙如月者所以象顙之白然則馬之貴的顙也可知矣易曰其于馬也為的顙蓋震二陰在上故為的顙夫文入二為白白陰色也二陰數也于車言其衆于馬言其特相備也陸化熙云車多則聲衆故鄰鄰然馬多則色奇故有白顙君子指襄公也寺人奄人周禮天子有之今按左傳齊有寺人貂晉有寺人披宋有寺人柳是諸侯之官亦有寺人也今使也言君子尚未得見但見其往來奔走者有寺人以供使令也嚴粲云秦前此所未有故詩人美其始有也馮時可云古者君臣相與如家人父子至秦而始自尊大屏居深宮怠于延接矣君臣隔絕則必以寺人傳語蓋秦俗然

也史記年表書繆公學于宁人宁人守門之人即寺人也是襄公為之法也夫傳語而至于受學受學而至于竊權變所繇來非一日矣然則望夷之禍其濫觴于車鄰也聖人錄此以冠秦風垂戒深矣嚴云秦反周之政者秦興而帝王之影響盡矣車鄰其濫觴也世道興衰升降之機在是歟沈守正云夫子刪書以秦世為殿知代周者秦也刪秦風以寺人之令為冠知亡秦者寺人也聖人無不知者以近怪而不言耳

阪有

漆

質韻豐氏
本作泰

隰有栗

質韻豐氏
本作栗

既見君子並坐鼓瑟

質韻

今者不樂

音絡
後同

逝者其耄

叶質韻徒吉翻
云阪者曰阪下者曰隰李巡

興也爾雅

云阪者謂高峰山阪下者謂下濕之地曹氏云說文阪山脇也地理志隴西有隴坂在其西注隴坂也即今隴山三秦記其坂九回欲上者七日乃越高處東望秦川然則阪固秦地所有也漆解見定之方中篇栗解見東

門之蟬篇羅願云秦風隰有栗燕秦千樹栗是其出處也秦饑應侯請發五苑之果蒞椽棄栗以活民昭王不許毛詩義疏曰五方皆有栗周秦吳揚特饒阪有漆以興位之尊者隰有栗以興位之卑者況人材之盛也並坐鼓瑟是伶工之輩與其儕侶並坐以供鼓瑟之事非君臣並坐也下章放此瑟解見闕雖篇鼓瑟鼓簧第取叶韻別無意義按李斯上秦皇書曰夫擊甕叩缶彈箏搏髀而歌呼鳴鳴快耳目者真秦之聲也今鼓瑟鼓簧非其舊聲益亦變西戎之陋而習華夏之風矣今者不樂恐失時也曰逝者猶言目今以往也蒼爾雅云老也或言七十或言八十無正文也增韻云蒼至也年之至也孫炎劉熙皆云蒼鐵也皮膚變黑色如鐵也詩詁云蒼之言眊也過七十則筋力已衰如日之眊故謂之蒼至八十則大蒼易云日昃之離不鼓缶而歌則大蒼之嗟與此語意相類此與下章其亡猶漢疏所云冀須臾無死以觀德化之成之意輔廣云益國家方興禮儀初

備而人情喜樂故至于此嚴云言貴生前得意否則虛
老歲月耳此彊毅果敢之氣勇于有為已有安能邑邑
以待數十年之意矣秦之能
疆者在此而周人之氣象變矣
阪有桑陽韻隰有楊陽韻

既見君子並坐鼓簧

陽韻

今者不樂逝者其亡

陽韻

興

氓篇楊木名有黃白青赤四種此當指白楊耳以桑楊
興下文其亡者桑之為言喪也白楊墓上所種株大葉

圓如梨皮白一名高飛一曰獨搖其樹干霄古詩所謂

上葉拂青雲下根通黃泉又云鬼火燒白楊又云白楊

多悲風蕭蕭愁殺人是也黃解見君子陽陽篇陽云

書以琴瑟為堂上之樂笙簫為堂下之樂則鼓瑟堂上

常御之樂也鼓簧堂下甚盛之樂也先鼓瑟後鼓簧

與闕雎先琴瑟後鍾鼓同意亡死也董之後則亡矣

車鄰三章一章四句二章章六句

序以為美秦仲也秦仲始大有

車馬禮樂侍御之好焉陳賜為之說云定之方中
曰椅桐梓漆爰伐琴瑟則阪有漆君子所以為樂
也東門之墀曰東門之栗有踐家室則隰有栗君
子所以為禮也曲禮曰並坐不橫肱則並坐者禮
也鼓瑟者樂也秦仲始大有禮樂之好是禮樂自
諸侯出非所以為美而車鄰美之者變中之美也
說詩如是可謂鑿矣按史記秦仲立三年周厲王
無道諸侯或叛之西戎反王室滅犬豕犬駱之族
周宣王即位乃以秦仲為大夫誅西戎劉公瑾云
秦仲但為宣王大夫未必得備寺人之官此詩疑
作於平王命襄公為侯之後其說與子貢傳合矣
朱子亦心疑之但汎指為秦君不顯其名若申培
說則云襄公初為諸侯周大夫與燕美之而作今
按篇中所云今者不樂逝者其耄逝者其止似非
過客之語總因並坐鼓瑟一句不得其解誤以
為君臣無並坐之理遂別為之辭耳不足信也

裳裳者華美同姓諸侯也繼世象賢天子美之意必

為鄭武公而作

孔叢子載孔子曰於裳裳者華見古之賢者世保其祿也愚按此詩以常

華起咏知其興同姓也以常常者華聯言知其興繼世也既曰維其有章是以有慶又曰維其有之是以之知其賦象賢也終周之世惟周公之後有魯公鄭桓之後有鄭武足以當之然魯公出就侯封未嘗踵周公冢宰之位而鄭桓公以宣王母弟始封于鄭及子武公皆相繼入為周司徒善于其職則濟美之最著者且據毛傳系此詩篇次于瞻彼雖矣之後彼棘谿有與既指武公則此詩之斷為武公咏無疑也又按竹書載平王三年錫司徒鄭伯命是詩之作當在此時

裳裳

子貢傳中培說豐氏本俱作常從同董氏云裳古文作常

者華其葉湑

韻

兮

我觀之子我心寫

叶語韻
沈與翻

兮我心寫

上見

兮是以有譽處

叶語韻

兮

興也裳說文本从巾作常或从衣作裳徐鉉云裳下直而垂象巾故从巾然則常裳在古

文本是一字非通用也此言裳謂常棣也采薇之詩曰
彼爾維何維常之華即此解見裳棣篇郝散云常棣其
華同蒂故此兄弟世族非親非族鮮有以常棣比者重
言裳裳者相繼非一之辭與兄弟再傳又有兄弟也
葉上露貌解見蓼蕭篇葉得露而潤則其華之承露可
知諸侯受天子德澤有似于此以興父既膺寵于前子
復膺寵于後也楊慎云裳裳者華其葉湑兮氣相屬潤
相滋也常棣之華鄂不韡韡體相親意相承也我天子
目我也親說文云遇見也按遇有接遇之意之子是子
指諸侯也心寫譽處解俱見蓼蕭篇嚴粲云我見是勲
賢之子孫我心為之輸寫愛其先人美其有後也愚按
詩咏棠湑興意在此孔穎達云君臣相得是以有聲譽

之美而處之分言常處此聲譽之美也

裳裳者華芸其黃矣陽韻我觀之

子維其有章

陽韻

矣維其有章

見上

矣是以有慶

叶陽韻

矣

興也此下三章皆咏之子蘊藉之盛所以我觀而心寫也亦以裳裳起興者先表其父子合德不獨為之子咏也芸草名芸其黃矣言如芸華之色黃也按爾雅云權黃華郭璞註云今謂牛芸草為黃華其華黃葉似菽萆邢昺疏云牛芸者亦芸類也章鄭玄云禮文也蘇轍云黃色之正也君子之有文縉然如華之盛也鄒忠肅云黃者中央正色易坤卦曰含章可貞曰黃裳元吉蓋陰雖有美舍之以從王事美在中而暢四肢發事業則章莫美于黃矣有慶謂君寵錫之指祿位言如王制孟子所云則有慶是也鄭武繼桓為周司徒以典司文教為職非其德之有章何以得此

裳裳者華或黃或白

叶藥韻

我觀之

子乘其四駱

藥韻

乘其四駱

見上

六轡沃若

藥韻

戴侗六書故稱

棟華有紅白二種今言或黃或白疑紅黃二色相近亦或另自有一種也四駱解見四牡篇禮惟天子之卿駕

純駟諸侯亦然沃若解見皇皇者華篇乘其四駱必有出使從戎之事見其才無所不可下章所謂左宜右有

是也故以或黃或白起興黃言大白言質維其有章英華發外是其文也乘其四駱急病讓夷是其質也又鄒

云黃白之華以興四駱蓋黃馬黑鬣曰駱白馬朱鬣亦曰駱之子所乘非一或黃或白有如此華矣此雖巧合

嫌其太巧

左之左

叶歌韻

之君子宜

叶歌韻牛何翻按宜儀通用儀亦有紙叶

語綺

之右之右

叶有韻云九翻亦

之君子有

韻亦叶紙

之維

左傳作惟

其有

見上

之是以似

韻之陽道朝祀之事

右陰道喪戎之事孔云陽道謂嘉慶之事朝者人所樂
祀者吉之大故為陽也陰道謂憂凶之事喪者人所哀
戎者有所殺故為陰也以能事弘多故皆重言以見衆
也鄭云君子斥其先人也多才多藝有禮于朝有功于
國按詩目諸侯為之子故知此變言君子為指其先人
也宜安也言與之相安習也有嚴云謂所蘊不竭也劉
向說苑引此詩傳云君子者無所不宜也是故韞冕厲
戒立于廟堂之上有司執事無不敬者斬衰裳苴絰杖
立于喪次賓客吊唁無不哀者被甲纓冑立于桴鼓之
間士卒無不勇者故仁足以懷百姓勇足以安危國信
足以結諸侯強足以拒患難威足以率三軍故曰為左
亦宜為右亦宜為君子無不宜者此之謂也又荀子云
此言君子之能以義屈伸變應也韓詩外傳云孔子曰
昔者周公事文王行無專制事無繇已身若不勝衣言
若不出口有捧持于前洞洞焉若將失之可謂子矣武
王崩成王幼周公承文武之業履天子之位聽天子之

政征夷狄之亂誅管蔡之罪抱成王而朝諸侯誅賞制
斷無所顧問威動天地振恐海內可謂能武矣成王壯
周公致政北面而事之請然後行無伐矜之色可謂臣
矣故一人之身能三變者所以應時也詩曰左之左之
君子宜之右之右之君子有之愚按老子言吉事尚左
凶事尚右毛傳之說本此今觀下文單以維其有之為
言明是指武公帥師興復之事傳解自確一說季本云
左逆行也不用之義右順行也見用之義左之而不宜
者不能藏也右之而不有者不能行也此說亦通但於
作詩之指不合耳維其有之指之子也之子之先君子
不特宜于左而且有于右今之子亦能以戎事建功為
國家所倚賴此則左右咸有亦如其先君子也似說文
云象也才德如其先人故受天朝寵任特命之為司徒
亦如其先人也鄒云曲禮諸侯既葬見天子曰類見謂
其繼先君之德乃得受國而見天子故曰類見郊特牲
所云繼世以立諸侯象賢也士冠禮亦云然則似之猶

言克肖即宛鳩所云式穀似之也譽處而有慶所謂世保其祿也若析薪而弗克荷其何似之有又左傳贊祁奚能譽善引此詩謂唯善故能舉其類亦斷章取義也

裳裳者華四章章六句

序云刺幽王也古之仕者世祿小人在位則讒諂並

進棄賢者之類絕功臣之世焉其以此詩為功臣世祿而言與孔叢子微合但篇中絕不見有刺語子貢傳以為天子燕諸侯然篇中亦無言及燕飲之事坐繇首章與蓼蕭首章詞意頗相似遂因而附會之耳申培說及朱子皆以為天子美諸侯之詩蓋亦近之而朱子又謂此詩所以答瞻彼雛矣則未必然也

溱洧刺鄭風淫也

竹書紀平王六年鄭遷于溱洧後漢書薛君注云鄭國之俗三月上

已桃花水下之時之漣洧兩水之上招魂續魄秉蘭
草後除不祥韓詩傳十道志皆云然按此即後世所
謂修禊事者但彼乃士女同游故相于淫耳輔廣云
鄭國之土地寬平人物繁麗情意駘蕩風俗淫佚讀
是詩者可以盡得之詩可以觀豈不信然白虎通云
鄭國土地人民山谷谷男女錯雜為鄭聲以相悅
懌故邪僻聲皆淫色之聲也

漣

說文作漣

與洧方渙渙

叶元韻于元翻韓詩作洧洧

兮士

與女方秉簡

叶元韻讀如昆公渾翻漢書作管韓詩豐本俱作蘭

兮女曰觀乎

虞韻

士曰既且

叶虞韻叢祖翻

且往觀乎洧之外洧

漢書韓詩俱作洧爾雅作

詢豐本作訐

漢書韓詩俱作盱云恂盱樂貌豐氏本亦作盱後同

且樂

叶藥韻歷各翻維

士與女伊其相謔

藥韻

贈之以勺

埤雅

藥

韻

賦也漆消解見審裳篇前

漢書地理志云鄭地右雒左沛食漆洧焉土暱而險山居谷汲男女亟聚會故其俗淫渙說文云流散也鄭玄云冰已釋水則渙渙然韓詩傳云謂三月桃李華水下之時方者始事之辭秉執蘭蘭也陸佃云蘭香草也而文關草為蘭蘭關不祥故古者為防刈之也一名蘭蓋蘭以關之蘭以閏之其義一也陸璣云蘭即蘭春秋傳曰刈蘭楚辭云紉蘭孔子曰蘭當為王者香草皆是也其莖葉似藥草澤蘭但廣而長節節中赤高四五尺漢諸池苑及許昌宮中皆種之可著粉中故天子賜諸侯莖蘭藏衣著書中辟白魚也羅願云陸氏所說皆是惟引以解左傳楚辭之蘭為非矣蘭草一名都梁香一名水香大都似澤蘭其澤蘭葉尖微有毛不光潤方莖紫節八月花白人多種于庭池此蘭生澤畔葉光潤其陰小紫所以一名都梁者盛洪之荊州記曰都梁縣有山山

下有水清淺其中生蘭草因名都梁因山為號其物可
殺蟲毒除不祥故鄭人方春之月于漆洧之上女士相
與秉蘭而祓除因以淫佚又周禮女巫歲時祓除疊浴
鄭氏亦云今三月上巳水上之類疊浴以香藥薰草沐
浴然則用蘭可知矣按羅意以此蘭為水香而左傳楚
辭之蘭乃澤蘭耳馮復京云蘭之種類至多本草經謂
蘭草可辟不祥故執以祓除抑或以蘭有國香人所服
媚淮南子曰男子樹蘭美而不芳說者以為蘭女類故
左傳稱女為季蘭宜女子樹之鄭女故執之以媚其士
與漆與洧四句是叙時事如此女曰以下見人往而已
亦欲往也然女曰士曰亦是旁觀者之辭此女士與女
曰雞鳴之女士不同彼謂夫婦此謂衆女與衆士中之
相悅者以末句臨別有勺藥之贈故知其非夫婦也曰
觀乎者鄭云欲與士觀于寬閒之處鄧元錫云淫始云
觀游禮禁婦女無觀慎微也鄭女士淫于觀矣既者已
事之辭且通作徂說文云往也士曰余業已往而觀矣

末之從也。且往觀乎洧之外，洧訏且樂。女勸男之辭也。專言洧者，水經謂洧水過新鄭縣南，溱水從西北來，注之是溱，已為洧所有，故不必言溱也。洧通作恂，說文云：信也。訏通作迂，其意則遠也。曲也。言洧水之外，其土地信濶，大紆迴而且可樂也。伊、鄭云：因也。士從女，言因往觀而相詭也。詭，說文云：戲也。字从言，蓋以言相調戲也。勺藥，即芍藥。廣雅名：芍藥，夷本。草云：一名黑牽，一名沒骨花。一名白水，一名餘容，一名犁食，一名解倉，一名鉞圖。經云：春生紅芽，作藂莖，上三枝五葉，似牡丹而狹長，一、二尺，夏開花，有紅、白、紫數種子，似牡丹而小。本草注云：芍藥有兩種，有草芍藥、木芍藥，亦名江離。博物志云：芍藥養性毛傳云：香草也。釋文云：離草也。言將離別，贈此草也。崔豹古今注載：牛亨問曰：將離別，相贈以芍藥者，何答？曰：芍藥一名可離，故將別以贈之，亦猶相招召贈之以文，無文無亦名當歸也。羅云：芍藥名可離，然則相詭之，後喻使去爾，其根可以，和五臟，制食毒古者有芍。

藥之醬合之于蘭桂五味以助諸食因呼五味之和為芍藥七發曰芍藥之醬子虛賦曰芍藥之和具而後御之南都賦曰歸鴈鳴鵲香稻鮮魚以為芍藥酸甜滋味百種千名是因致其滋味也服虔文頽伏儼輩解芍藥稱具美也或以為芍藥調食或以為五味之和或以為以蘭桂調食雖各得彷彿然未究名實之所起至韋昭又訓其讀勺丁削切藥旅酌切則并沒此物之名實矣今人食馬肝馬腸者猶合芍藥而煮之古之遺法食之毒莫甚于馬肝則制食之毒者宜莫良于芍藥故獨得藥之名又陸璣謂今藥草芍藥無香氣非是也蓋醫方但用其根陸不識其花故云無香氣陸佃云芍藥榮于仲春華于孟夏傳曰驚蟄之節後二十有五日芍藥榮是也華有至千葉者俗呼小牡丹今羣芳中牡丹品第一芍藥第二故世謂牡丹為華王芍藥為華相又或以為華王之副也陳氏云芍藥者溱洧之地富有之詩人賦持有所因也宋熙寧時始尚經術說詩者競為穿鑿

如伊其相謔贈之以芍藥謂此為淫佚之會必求其為
士贈女乎女贈士乎劉貢父善滑稽嘗曰芍藥能行血
破胎氣此益士贈女也若視爾如菽貽我握椒則女之
贈士也本草云椒性溫明目暖水臟故耳聞者絕倒

溱與洧瀏其清

庚韻

矣士與女殷其盈

庚韻

矣女曰觀乎

見前
士曰既且

見前

且往觀乎

見前

洧之外洵訐且樂

見前

維士

與女伊其將謔

見前

贈之以勺藥

見前

貌說文云流清貌按水賦也瀏毛云深

深故清殷毛云衆也盈滿也遊人衆多而填滿于溱洧
之上也陸佃云鄭人會于溱洧秉蘭以自祓除其風俗
之舊也及其甚也淫風大行過時而不反來者且益以
衆將嚴蒙云方且也猶將安將樂之將鍾惺云後人詩
語用相將字本此自女曰觀乎以下復將上章文咏嘆
一番而于無意中易一將字是詩人最善脫換處言方

且相譴而未已也朱子以為
相將聲同而訛其亦誤矣

漆洧二章章十二句

序以為刺亂也兵革不息男
女相棄淫風大行莫之能禁

馬中培說亦然朱子謂鄭俗淫亂乃其風聲氣習
流傳已久不為兵革不息男女相棄而後然也今
以詩詞觀之模寫士女駘蕩之狀宛然在目使果
困于兵革後則其情事必然凄苦安能遊佚若此
子貢傳則以為鄭靈公好倡國人化焉君子識之
賦此然考左傳靈公以魯宣三年冬嗣位至次年
六月為公子歸生所弑計其在位僅半載耳未有
移風如此之速朱子據薛君注以解此詩是矣然
謂淫奔者自叙之詞則亦未然觀篇中具叙事體
乃直是作詩者暴其事以刺爾又馮時可云古于
睽合通塞皆借夫婦以喻君臣鄭國政教迫促上
下間隔作詩者進以樂易廣大故曰洧之外洵訐

且樂評大也曰贈之以芍藥芍藥
調和具也此意甚美但恐未然也

東門之墀亦刺鄭風淫也

鄭玄云此女欲奔男之辭
焦贛易林云東門之墀茹

盧在坂禮義不行與我心反劉公瑾云目昔
說鄭詩者惟以東門之墀與漆消為淫詩

東門之墀

銑韻正義云諸本作墀今定本作墀

茹蘆

易林作蘆

在阪

阮韻亦叶銑韻乎戀

翻易林作坂

其室則邇其人甚遠

阮韻

賦也

東門城東門

鄭要會之地在隱四年宋公陳侯鄭人衛人伐鄭圍其
東門即此門也墀毛傳云除地町町者孔穎達云禮記

尚書言壇墀者皆封土者謂之壇除地謂之墀除地去
草故云町町此婦人所奔以待男子之處非男子所居

也茹蘆草名爾雅云茅蒐也李巡云茅蒐一名茜可以
染絳陸璣云蒨草也一名地血齊人謂之茜徐州人謂

之牛蔓今圃入或作畦種蒔故貨殖傳云厄蒿千石亦
比千乘之家陸佃云葉似棘說文曰人血所生故菟从
草从鬼齊人謂之茜陶隱居以為東方諸處乃有而少
不如西多夫文西草為茜其或又以此乎羅願云葉似
棗葉頭尖下濶莖葉俱澁四五葉對生節間蔓延草木
上根紫赤色今所在有八月採根入血所生故一名地
血今茹蒨能治血又所染亦赤蓋其類耳古者士爵弁
服弁色赤而微黑如爵頭裏亦纁色士冠禮曰爵弁服
纁裳純衣緇韎帶韜緇韍也士緇韍幽衡合韋為之染
以茅蒐因名焉說文曰茅蒐染韋一入為韎詩曰韎韜
有奭左傳韎韐之附注是也其女子之染則毛氏云茹
蒨茅蒐之染女服也鄭箋云茅蒐染巾也則縞衣茹蒨
為婦人服矣博雅云澄者阪也爾雅云陂者曰阪孔疏
云陂陀不平而可種者名阪司馬相如哀二世賦登陂
陀之長陂是也詳詩意男子所居正在陂外女身至東
門之墀以待之而尚有阪以為之限故嘆室雖近而入

甚遠蓋欲奔而未遂之辭也

栗門之栗

質韻豐氏本作栗

有踐

韓詩作靖藝文類聚

豐氏本俱作靜

家室

質韻

豈不爾思子不我即

叶質韻子息翻賦也栗說文作栗

云其實下垂故从鹵鹵者草木實垂鹵然蓋象形也古文从西从二鹵徐巡說木至西方戰栗羅云言木則凡木皆然而栗至罇發之時將墜不墜尤有戰栗之象故天子五社西社植栗陸佃云栗味鹹北方之果也有栗自裹故先賢云皂者柞栗之屬國語曰婦摯不過栗栗以告處也先儒以為栗取早敬栗取恂栗踐履也與踐約之踐同意猶後跡之履前跡也男以女為室女以男為家蘇轍云栗女贊也取栗為禮而可以行室家之道矣即猶就也爾雅云尼也註云尼者近也即今相近也此女言東門有栗人固有取之為贊以踐室家之約者我豈不爾思而欲往汝家以行此禮哉特無如子之不我就何耳上章思之而未得見之詞此章思之切

而冀其亟來就已之辭詳此則鄭所謂女欲奔男者信矣又羅云茹蘆女所以染也今方在陂粟者女所以為贄也今方在門則衣服贄見之物未備不待禮而相奔矣亦通

東門之墀二章章四句

子貢傳無此篇申培說于王風內有唐棣篇名豐氏

本以為即此篇作唐棣三章章四句其首章云唐棣之華偏其反而豈不爾思室是遠而豐氏據申培說云此因僖王棄賢而諷之但唐棣四句原出論語舊說以為逸詩今以此冠于首章倘亦以豈不爾思二語與此詩詞頗相類而附益之耶不足信也季本云唐棣之與東門各為起語室遠之與室邇亦各異情不得合而為一也序以為刺亂也男女有不待禮而相奔者也夫淫者自淫不關世亂必曰因亂而淫豈其然乎

女曰雞鳴述鄭賢夫婦相勸勉之辭漆洧之反

子貢傳云

夫婦相戒以勤生樂善輔廣云觀此詩則鄭國之俗雖曰淫亂然在下之人夫婦之間猶知禮義勤生業不昵于宴私相安于和樂而又能贊助其君子親賢樂善以輔成其德此可以觀先王之澤與民性之善矣

女曰雞鳴士曰昧旦

韻翰

子興視夜明星有爛

韻翰

將翱將

翔弋鳬與鴈

叶翰韻魚肝翻相對語也孔穎達云士者男子之大號昧

賦也

女曰士曰婦與夫

晦旦明也朱子云昧旦天欲旦昧晦未辨之際也列子云將旦昧爽之交日夕昏明之際子興視夜二句婦之

語也子指夫也興起也警以風興不留色也明星朱子蘇氏嚴氏皆以為啟明之星先日而出者也爛光色也

嚴粲云此詩述夫婦相警之辭始婦警其夫曰雞鳴可興矣夫曰姑俟昧旦也婦又警其夫曰子宜興而視夜之如何蓋小星已不見惟明大之星爛然天將曉矣毛氏謂天將曉則小星不見惟明大之星爛然雖不指為啟明然將曉而明大者惟啟明耳將翔將翔二句夫之語也將發語辭說文訓翔為翔翔訓翔為飛不容二義無別以字求之翔左施是舉者緩也當為緩飛之義若翔則初飛而布翅之狀所謂迴翔是也此指鳬鴈言弋本作雅說文云繳射飛鳥也以生絲為繩繫矢而射也按周禮夏官司弓矢云矰矢第矢用諸弋射注云結繳于矢謂之矰矰高也第之言刺也二者皆可以弋飛鳥刺羅之也鳬水鳥按爾雅云舒鳬驚又云鴈沉鳬蓋舒鳬則名驚沈鳬則名鴈驚郭璞以為鴈也李巡云野曰鳬家曰驚然則專有鳬名者乃鴈耳又此詩言弋鳬與鴈則其在野明矣郭云鳬似鴈而小長尾背上有文陸璣云青色卑脚短喙水鳥之謹愿者也莊子云鳬脰雖

短續之則憂鴈陽鳥鴻屬大曰鴻小曰鴈又爾雅云鳬
鴈醜其足蹠其踵企郭云鳬鴈之類脚指問有蹠蹠屬
相著飛則伸其脚跟企直也陸佃云鳬鴈常以晨飛故
是詩如此賦曰晨鳬且至此之謂也夫聞其婦明星有
爛之言而曰果爾天將曉矣此時有鳬鴈翔翔吾將起
而弋之蓋將有所用之如下章所云也按左昭二十八
年魏獻子曰昔賈大夫惡娶妻而美三年不言不笑御
以如舉射雄獲之其妻始笑而言賈大夫曰才之不可
以己我不能射女遂不言不笑夫與此詩意象頗相彷彿
弋言加亦叶歌韻居何

翻之與子宜

支韻亦叶歌韻牛何翻

之宜言飲酒與子偕老

皓韻琴

瑟在御莫不靜好

皓韻賦也此章承上將黼將綦二句皆其夫之語加猶施也吾亦欲無

加諸人之加二子皆指婦也言我之弋鳬與鴈何為也
我言將有所施之耳所施必得其人故與子謀其所宜

也昔晉山濤之婦自比于負羈之妻欲觀狐趙而言阮籍等正當以識度相友是可見明鑒在婦人中多有之知此婦亦非汶汶者矣治酒食者中饋之職既相商度而得其所宜則言將召是人為賓客而飲之酒以示歡洽庶乎賴仁賢之助以保室家亦可以與爾偕老矣云飲酒則鳬鴈以充豆實亦在其中琴瑟所以樂賓曲禮云士無故不徹琴瑟御侍也按車中御在左故謂御為侍靜好以聲言靜安靜也不煩數浮蕩之謂好和好也

不淫哇恣憊之謂此又囑其婦而曰爾不但治酒食而已凡勸侑之人操琴瑟而在侍御者爾皆當預謹飭之使之莫不靜好以娛此嘉賓可也蓋是夫之好德如此白虎通云公羊傳曰天子八佾諸公六佾諸侯四佾詩曰大夫士琴瑟御大夫士北面之臣非專事乎民者也故但琴瑟而已左傳醫和曰君子之近琴瑟以儀節也非以愒心也陳暘云琴瑟其聲尚宮其音主絲士君子常御所以樂得其道堂上之樂也故用大琴必以大瑟

配之用中琴必以小瑟配之然後大者不陵小者不抑
足以禁淫邪正人心矣故荀卿曰琴瑟以樂心羅泌云
琴統陽瑟統陰以陽佐陰不可易也瑟維陰也故朱襄
鼓五絃之瑟而羣陰來琴惟陽也故虞氏鼓五絃之琴
而南風至陰陽之應各從其類是以伯牙鼓琴而馬仰
秣飢巴鼓瑟而魚出聽魚水物而馬火物以類應也楊
泉曰琴欲高張瑟欲下聲數不踰琴以佐陽也陽主生
故其情喜陰主殺故其情悲陰陽并毗則寒暑不成而
四時忒矣此帝女之鼓瑟所以動陰聲而悲不能克也
故樂惟不可苟作也先王以術調鼎以鼎調樂樂和而
玉燭調矣詩曰琴瑟在御莫不靜好

知子之來

叶職韻六

直之襍佩以贈

朱子云叶音則入職韻按來贈相叶終覺牽強豐氏本贈作貽係支韻上文來

據儀禮注讀為釐亦叶支韻似可從且贈貽字形頗相似疑傳寫訛也

之知子之順震之

襍佩以問

叶震韻

之知子之好

叶號韻

之襍佩以報

號韻

之

賦也此婦人答其夫之詞三子皆指夫也朱子云來之致其來者如所謂修文德以來之禮婦人左佩紛

悅刀礪小觿金燧右佩箴管線續大觿朱燧之屬所以備尊者使今也毛氏以為佩玉珩璜琚瑀衡牙之類似

非士庶之常服且與襍字不協贈說文云玩好相送也一曰增也孔云贈遺者所以增長前人贈之財使富增

于本贈之言使行增于義故曰贈增也順鄭云謂與已和順即莫逆于心之謂問毛傳云遺也孔云曲禮凡以

苞苴簞筭問人者左傳衛侯使人以弓問子貢皆遺人物謂之問古人通言必遺以物好者喜好也所謂中心

好之者是也報答也禮疏云感恩者皆稱報陸化熙云既致其來故思贈其往順則不忍其踈濶故思問之好

之者好之善也我好彼善是彼以善施我故有報下字俱有別此婦言子之好德既如此則我私心幸甚非但

治酒食飭琴瑟而已雖服玩之物亦無所愛知其初來則將有以贈之知其久而莫逆則將有以問之知其能以善道相成則將有以報之也是不特能奉承其君子之意而其好德更甚于君子矣朱子云此詩意思甚好讀之使人有不知手舞足蹈者

女曰雞鳴三章章六句

申培說以為夫婦相警戒之詞與朱傳同今按此詩

亦不見有戒意直相勸勉耳序則云刺說德也陳古義以刺今不說德而好色也所謂陳古刺今亦不必有所據

出其東門鄭之貞士宜其室家不染淫俗而作此詩

出申培詩說

東門之墠之反

朱子云是時淫風大行而其間乃有如此之人

亦可謂能自好而不為習俗所移矣羞惡之心人皆有之豈不信哉又云鄭詩雖淫亂然此詩却如此好女曰雞鳴一詩亦好輔廣云鄭詩惟女曰雞鳴與此詩為得夫婦之道夫子錄之正以見人性之本善而先王之澤猶未泯也

出其東門

叶先韻
誤連翻

有女如雲

叶先韻
于員翻

雖則如雲匪我思

存

叶先韻
從緣翻

縞衣綦

說文
作縞

巾

叶先韻
經天翻

聊樂

音洛

我員

先韻
陸德明豐

氏本俱作云韓詩作魂魂神也賦也蘇轍云東門鄭之為亂者之所在也故墀栗皆曰東門毛傳云如雲衆多也匪通作非言此如雲之女皆非我思所存也嚴粲云縞衣綦巾稱其妻猶云荆釵布裙也縞說文云鮮色也一云帛已練研者曰縞一云繒精白者曲阜之俗善作之尤為輕細故曰魯縞孔穎達以為薄繒不染故色

白也。綦一作綦。說文云：帛蒼艾色。孔云：綦者青色之小別。蒼即青也。艾謂青而微白，為艾草之色也。巾佩巾即紛，帨也。禮婦人左佩紛，帨紛。本作帑，楚謂大巾曰帑。帑以拭器，帨以飾手，皆巾也。故下章有茹蓆之異。蓋一是帑，一是帨耳。聊鄭玄云：且略之辭，亦目足之意。樂謂室家之樂。員云：通孔云：員古今字，助句辭也。楊慎云：今之云字，乃員之省。火詩景云：維何秦誓，雖則員然。石鼓文：君子員獵。員獵，員游皆云。員通也。縞衣綦巾，聊樂我員。正以著如雲之女匪我思存耳。又按說文云：縞，衣綦巾未嫁女所服，不知何據。殆不足信。

出其

闔閭

虞韻

有女如荼

虞韻

雖則如荼匪我思且

叶虞韻 叢租翻

縞衣

茹蓆

叶虞韻 讀如盧龍都翻

聊可與娛

虞韻 豐氏本作虞 闔閭東門之闔閭也 闔毛

賦也

云曲城也。徐鍇云：若今門外壘城門。陳氏云：門外之有副城，回曲以障門者，爾雅云：闔謂之臺。孫炎云：積土如

堵所以望氣祥也。孔云：出謂出城，則閹是城上之臺，謂當門臺也。茶毛以為英，茶鄭以為茅。秀按詩中咏茶有三種：邨風誰謂茶苦，則爾雅所謂茶苦菜者也；周頌以薺茶薺，則爾雅所謂薺委葉者也；落通作茶，此有女如茶，即芳也。荈茅之屬，爾雅所謂葉薺茶，荈荈芳者也。曰葉曰荈，曰薺曰荈，皆茶芳之別名。方語異爾，毛言英茶者，孔云：茅之秀者，其穗色白，國語吳王黃池之會，陳兵脅晉，萬人為方，陳皆白，常白旃素甲白羽之增望之如茶，亦以白色為如茶也。又鄭謂茶乃物之輕者，飛行無常，則是又淫佚女子之比矣。且通作徂，兼往存二義。郭璞云：以徂為存，猶以亂為治，以曩為鼎，以故為今，此皆訓詁義有反覆也。故鄭云：匪我思且，猶匪我思存也。茹慮可以染絳，鄭以為染巾是也。蒙上章縞衣綦巾之文，知此亦為巾也。此草乃鄭東門所有，觀東門之堦篇可見。娛說文云：樂也。上章言聊樂者，自樂也。此曰與娛，則與之同樂矣。

出其東門二章章六句

序以為閔亂也公子五爭兵革不息男女相棄民人

思保其室家焉所謂公子五爭者謂突再也忽子
疊子儀各一也郝敬為之說云恒情窮則反本安
則思淫鄭昭厲之際干戈不息人民離散室家以
苟全為幸雖有東門之游女而無江漢之求思時
使之然也故夫男女之際人之至情世治則懷春
之女誘于吉士世亂則如雲之女所思思匪存若使
上無教化則野有死麕為淫奔矣國無亂離則出
其東門為義士矣故誦其詩當論其世末可以其
辭而已也劉辰翁云舍序讀詩辭意甚美今按詩
中所云聊樂我員聊可與娛襟懷灑落似非兵革
不息男女相棄時語
朱子改正較為得之

驕驥秦人從狩而作

出申培說按史記秦文公元
年居西垂宮三年文公以兵七

百人東獵四年至汧渭之會乃卜居之此詩當即是
文公東獵之事居西垂而東獵其亦有略地岐豐之
意乎又按文公三
年即平王之九年

駟

漢書說文

驥

漢書作載

孔阜

有韻豐氏本作駟

六轡在手

有韻公之

媚子從公于狩

叶有韻始九翻豐氏本作守

賦也四馬曰駟驥馬名毛傳以為驪非也陸佃

云說文曰馬深黑色驪赤黑色驥先儒謂取其馬色如鐵非特有取于色蓋亦取其堅壯如鐵故曰驥也月令孟冬乘鐵驪即此是也孔甚也阜字本作官徐鍇云彌高大也故从三尸劉熙云土山曰阜厚也言高厚也鄭玄云四馬六轡六轡在手言馬之良也陳祥道云四馬八轡而詩每言六轡者蓋駕馬之法有游環以止驂馬之外出有脅驅以止驂馬之外入有脅驅矣則驂馬之內轡無所施也繫于軾前而已此詩所以言六轡也孔

云驂馬內轡納之于缺故在手者惟六轡耳聘禮賓覲
總乘馬注云總八轡牽之贊者謂步牽馬故八轡皆在
手也大叔于田言六轡如手謂馬之進退如御者之手
故為御之良此言六轡在手謂在手而已不假控制故
為馬之良也陸云馬之族不一而驂馬則喜前驚馬則
喜後故古之御者驚馬以鞭為主驂馬以轡為主鐵性
堅驂則疑于難御而有繁手之勞矣今其六轡在手而
已則是無事于轡故詩以美之也一說嚴粲云在手言
把握其轡能制馬之遲速惟手之是聽也在如師之耳
目在吾旗鼓之在亦道公文公也媚說文云悅也媚子
謂公所愛悅之人也狩字从犬說文云犬田也以
未章載獫觀之知其為犬田也此章言往狩之事

奉

時辰牡辰牡孔碩

韻

公曰左之舍拔則

豐氏本

獲

陌韻

也奉謂以兩手翼之驅獸而聚之一處以待君射也誰
奉之者媚子也毛云時是辰時也牡朱子云獸之牡者

辰牡猶言時獸碩鄭云肥大也孔云公曰左之是公命御者從禽之左逐之欲從禽之左而射之也逐禽繇左禮之常法朱子云射必中左乃為中殺五御所謂逐禽左者為是故也逐禽左逆驅禽獸使左當人君以射之也建安何氏士信曰公羊傳解第一殺第二殺第三殺皆自左臆射之達于右則左當人君之左指禽獸之左臆而言詳見車攻篇舍放也拔毛傳云矢未也鄭云括也孔云以鐵為首故拔為未拔當作校亦猶括當作括列子曰後鐵中前括是也亦作箬箬會也謂與弦相會乃受絃處又名比考工記曰夾其羽而設其比是也孔云既言公曰則是公自舍之獵所得曰獲公舍放矢未則應弦而獲其獸言善射也此章言方狩之事

遊于北園

叶先韻
于權翻

四馬既閑

叶先韻
何甄翻

輶車鸞鑣載獫狝

歆

說文作獨驕蕭韻說文作獫狝也顏師古云養鳥獸曰作獨驕苑苑有垣曰園孔云遊于北園蓋近在國北

地官載師云以場圃任圉地明去其國近也朱子云田事已畢故歸而遊于北園四馬即駟鐵也閑爾雅云習也輜車輕車也嵩言輜亦訓輕車見說文鸞鈴也象鸞鳥聲故曰鸞亦作鑾鑾馬勒傍鐵也解見碩人篇言置鈴于馬口之兩旁也鄭云輕車驅逆之車也置鸞于鑾異于乘車也陸云驅逆之車尚輕疾孔云驅驅禽使前趨獲逆御還之使不出圉若君所乘者謂之田車不宜以輜輕為名乘車鸞在衛此鸞在于鑾故異于乘車也載車中所載也毛云獫狁騎田犬也獫或作獫周謂北夷曰獫即此獫也歌騎當依爾雅說文作獨獨獫狁獨獨京賦曰屬車之選載獫狁獨獨是也爾雅云長喙獫狁獨獨朱子云以車載犬蓋以休其足力也韓愈畫記有騎擁田犬者亦此類一說王雪山巖華谷戴岷隱皆云歌騎謂歌其騎逸即休其足力之意亦通但爾雅說文皆以為犬名似當從古耳又按古者狩以講武未嘗以犬從禽載犬者秦之陋也輕車有和鸞之聲而犬載其

上總是寫畢狩光景此章言畢狩而游觀之事張敬夫云讀車鄰駟鐵之詩則知秦之立國自其始創時不過盛其車馬奉養之事競為射獵之為而已蓋不及于用賢制民也則其流風亦習乎是而已

駟鐵三章章四句

序云美秦襄公也始命有田狩之事園囿之樂焉子貢傳亦以

為襄公始有田囿之事秦人喜之按秦自文公東獵而外其他君田狩之事史皆無所見則此詩之當屬文而不屬襄明矣朱子謂此詩亦車鄰之意要是影響

賓之初筵衛武公飲酒悔過也

出後漢書註引韓詩之說申培說亦云

衛武公自警之詩朱子云今按此詩意興大雅抑戒相類必武公自悔之作當從韓義劉公瑾云此詩之意欲以自警抑詩之意亦以自警也此詩之意恐醉酒而伐德猶抑詩所謂顛覆厥德荒嬉于酒也此詩

之意反覆以威儀為言猶抑詩言抑抑威儀敬而威儀敬爾威儀不愆于儀也以此章有童殺之語抑詩亦有彼童而角之喻其語氣亦相類也然抑詩凡言女言爾集傳以為武公使誦詩者命已之詞今按此詩凡言賓言爾者恐亦武公自謂也

賓之初筵左右秩秩

朱子云無韻未詳後三十四章放此豐氏本作秩秩左右

籩豆

有楚

語韻

殽核維旅

語韻

酒既和旨

紙韻

飲酒孔偕

叶紙韻荀起翻

鐘

鼓既設

叶質韻式質翻

舉醕逸逸

質韻

大侯既抗

漾韻亦叶陽韻丘岡翻

弓

矢斯張

陽韻亦叶漾韻知亮翻

射夫既同

東韻

獻爾發功發彼有

的

叶藥韻子藥翻陸明德本作勺

以祈爾爵

藥韻

賦也孔穎達云上八句言射初飲燕之事下

六句言大射之事將祭而射謂之大射大射之初先行燕禮按禮射有三一為大射二為賓射三為燕射大射者將祭擇士之射也射義云天子將祭必先習射于澤擇者所以擇士也已射于澤而後射于射宮射中者得與于祭不中者不得與于祭不得與于祭者有讓削以地得與于祭者有慶並以地先儒謂將祭之時再為射禮然澤官言習射則未是大射至射于射宮乃行大射也今考周禮夏官司弓矢職云澤共射棊質之弓矢大射燕射共弓矢如數是則澤宮之射與大射異此其證也郊特牲云卜之日王立于澤親聽誓命澤者澤宮也今家語文亦作王親立于澤宮蓋既卜之後必到澤宮擇可與祭祀者因誓勅之以禮耳其地所在舊無明文先儒謂于寬閒之處近水澤而為之愚意即辟廋也辟廋之水旋丘如璧朱子云說者以廋為澤蓋即旋丘之水而其學即所謂澤宮也此論得之亦如說文解泮為諸侯鄉射之宮禮言魯人將有事于上帝必先有事于

泮宮蓋亦于此處射而擇士其制西南為水東北為牆與澤官制蓋相近也又卿大夫從君田獵後班餘獲而習射亦于澤宮尚書大傳所云凡祭取餘獲陳于澤然後卿大夫相與射是也射宮則在郊樂記云武王克殷散軍而郊射左射驪首右射騶虞而貫革之射息註謂郊射是為射宮于郊又周禮夏官諸子職云掌國子之倅使之脩德學道春合諸學秋合諸射疏謂學大學也射即射宮乃國之小學在西郊則虞庠是也疏所以指為小學者以天子大學在國中小學在郊故鄉射禮云君國中射則皮樹中于郊則閭中於竟則虎中國中射者燕射也于郊者大射也於竟者謂與鄰國君射則賓射也中者盛算之器以木為之刻為獸形皮樹與閭皆獸名閭狀如驢詳見猗嗟篇而大射禮于事畢之後云卿大夫皆出公不送公入驚鵞者驚夏也樂章之名公入則奏之以從郊入國故言入凡此皆射宮在郊之證也又春官司服職云饗射則驚兔注謂饗射者饗食賓

客與諸侯射也燕禮云燕朝服于寢注謂其服玄冕緇衣素裳漢法衣皮弁服與古異據此詩第三章言側弁之俄則其非饗燕之射可知先儒謂為學宮之射當服皮弁以學記云皮弁祭筴故也然則此詩以弁入咏而二章又有烝衍烈祖之語其為將祭而行大射之禮無可疑矣賓射者諸侯求朝天子入而與之射或諸侯相朝而與之射即周禮所謂饗射大宗伯之職以賓射之禮親故舊朋友是也燕射者謂息燕而與之射息者休農息老物也燕者謂勞使臣若與羣臣飲酒而射也春官樂師職云燕射帥射夫以弓矢舞是也賓射行于朝燕射行于寢三射之處不同其侯亦別考工記梓人云張皮侯而棲鵠則春以功張五采之侯則遠國屬張獸侯則王以息燕凡侯皆用布為之皮侯則以虎熊豹麋之皮飾其側又方制之以為臯謂之鵠著于侯中周禮天官司裘職云王大射則共虎侯熊侯豹侯設其鵠諸侯則共熊侯豹侯卿大夫則共麋侯皆設其鵠即此大

射之侯也賓射之侯畫以五采周禮夏官射人職云掌國之三公孤卿大夫之位三公北面孤東面卿大夫西面諸侯在朝則皆北面以射法治射儀王以六耦射三侯三獲三容樂以騶虞九節五正諸侯以四耦射二侯二獲二容樂以貍首七節三正孤卿大夫以三耦射一侯一獲一容樂以采蘋五節二正士以三耦射一侯一獲一容樂以采芣五節二正三侯虎熊豹也二侯熊豹也一侯麋也獲謂唱獲之旌容亦名乏以革為之在侯之旁所以為唱獲者御矢也以其可以容身故謂之容以其矢于此匱乏不去故亦謂之乏九節七節五節之解見後五正者先儒以為中朱次白次蒼次黃玄居外三正損玄黃二正去白蒼而畫朱綠未知何據正者鳥名正與鵠皆鳥之捷黠者大射射鵠賓射射正燕射射質燕射之侯畫獸為侯鄉射記所云天子熊侯白質諸侯麋侯赤質大夫布侯畫以虎豹士布侯畫以鹿豕是也綜上諸禮文天子諸侯大夫三射皆具士惟有賓射

燕射而無大射先儒以為士無臣故祭無所擇理或然也三射之禮皆有飲酒故射義引詩曰魯魯侯氏四正具舉大夫君子凡以庶士小大莫處御于君所以燕以射則燕則舉但賓射燕射因饗燕而射意止于娛賓大射是將祭而射意專主于擇士飲酒特其中之儀節耳此三射之外又有鄉射其侯用采侯禮與燕射同乃鄉大夫貢賢能之後行之以詢眾庶及州長射于州序之禮非大夫諸侯所用也又射義云古者諸侯之射也必先行燕禮卿大夫士之射也必先行鄉飲酒之禮故燕禮者所以明君臣之義也鄉飲酒之禮者所以明長幼之序也今按所謂先行燕禮者言大射未旅之前所行之禮似燕之法非謂先一日行燕禮畢而後射也天子大射之禮止所可考見者唯諸侯大射見于儀禮意其節文當不甚相遠若此詩乃衛武公入為王卿士所作則天子之大射也賓武公自謂也時王以武公為賓故自云然初筵朱子云初即席也孔云鋪陳日筵藉之曰

席筵席通也左右鄭玄云謂折旋揖讓也孔云以賓與主人為禮隨其左右之宜其行或方折或回旋相揖而辭讓也秩序也合賓與主人言之故重云秩秩按大射儀擯者納賓賓及庭公降一等揖賓賓辟公升即席奏肆夏賓升自西階主人從之賓右北面再拜賓答拜主人取觶酌膳筵前獻賓賓拜受爵于筵前然後賓升筵即此所謂賓之初筵左右秩秩者也其禮以宰夫為主入君于臣雖為賓不親獻以其莫敢抗禮也籩豆解見代柯篇楚毛傳云列貌按楚字義說文以為叢木謝眺詩曰平楚正蒼然以叢木廣遠謂之平楚此言有楚謂森然成列如叢木然也穀毛云豆實也鄭云菹醢也凡非穀而實之曰穀核鄭云籩實有桃梅之屬按周禮籩人掌四籩之實醢人掌四豆之實凡祭祀共其籩豆薦羞之實賓客喪紀亦如之是饗燕有籩豆也四籩內有餽食之籩其實棗栗桃乾藕榛實乾藕者乾梅也內則有桃諸梅諸是其乾者皆有核之物也孔云此經二句

自相克配。穀核即籩豆所盛。穀則實之于豆。核則實之于籩也。先般後核，不依籩豆次者，便其文耳。旅衆也。軍之五百人爲旅。故有衆多之義。和音鄭云：酒調美也。孔甚偕俱也。言與燕者皆在列也。按大射儀：官饌羹定，射人告具于公。公升即位于席西，向小臣師納諸公。卿大夫諸公、卿大夫皆入門右，北面。東上，公降立于阼階之東南。南鄉，小臣師詔揖諸公、卿諸公、卿西，面北上。揖大夫大夫皆少進，然後擯者請賓。即此所謂飲酒孔偕者也。首二句紀賓初升筵之禮。次三句紀官所饌之物。至此句乃紀與燕之人。鐘鼓謂笙鐘頌鐘。建鼓之屬。大射儀所云樂人宿縣于阼階東。笙磬西面，其南笙鐘。建鼓作阼階西南。鼓西階之西。頌磬東面，其南鐘。一建鼓在其南。東鼓一建鼓在西階之東南面是也。設說文云：施陳也。云既設者，非謂此時方設言。既設則奏之可知。蓋在主。人獻君爵而奏肆夏時也。按周禮：鐘師以鐘鼓奏九夏。肆夏者，九夏之一。大射儀：擯者納賓及庭，公先升。

即席奏肆夏賓升自西階主人送爵獻賓賓乃升筵啐爵而樂闋賓遂酢主人主人乃獻公公拜受爵復奏肆夏卒爵而樂闋又郊特牲云賓入大門而奏肆夏燕禮記亦云賓及庭奏肆夏皆指公升即席時而言此言鐘鼓既設在初筵之後舉醕之前明是君受爵時所奏與即席之奏無預舉醕朱子云舉所奠之醕爵也逸逸往來安間之貌按儀禮主人酌賓曰獻賓既酢主人主人又自飲而獻賓曰醕賓受之奠于席前而不舉至旅而遂舉所奠之爵交錯以徧以大射儀考之初主人獻賓賓酢主人次主人獻公此時奏肆夏卒爵樂闋主人受公酢乃醕賓賓告于擯者請旅諸臣公許之乃舉旅行醕即此所謂舉醕逸逸也大侯毛云君侯也侯者射布之名字本作侯从人从厂从矢象張布矢在其下古者以射選賢射中者獲封爵因謂之諸侯也故射義云天子之大射謂之射侯射侯者射為諸侯也射中則得為諸侯不中則不得為諸侯又考工記云祭侯之禮以酒

脯醢其辭曰惟若寧侯母或若女不寧侯不屬於王所
故抗而射女今以字義考之諸侯之名義本因射布之
侯而得名而考工記以為射諸侯之不安於為侯者則
是射布之名侯乃反因射諸侯而得各非事實也若大
侯之名見于此詩及儀禮而未詳其為何侯據周禮注
謂王之射虎侯王所自射熊侯諸侯所射豹侯卿大
夫所射理或近之則此詩所云大侯蓋虎侯也然射人
職諸王大射則以騶步張三侯與司裘職王大射共虎
熊豹三侯之說合若諸侯則皆云二侯而已儀禮大射
篇所記者諸侯之禮乃云命量人量侯道與所設乏以
騶步大侯九十參七十千五十設乏各去其侯西十北
十遂命量人巾車張三侯大侯之崇見鵠于參參見鵠
于干于下網不及地武抑又異周禮二侯之說何耶先
儒謂彼乃畿內諸侯用二侯此畿外諸侯亦得用三侯
但不敢同于天子虎熊豹之三侯似已然亦以大侯為
熊侯而讀參為糝讀干為豢糝者襟也襟侯者豹鵠而

麋飾豸侯者豸鵠豸飾也是皆妄意推測未有以證其必然愚偶以鄉射記之說合之則此所云大侯果熊侯也所云參侯乃麋侯也何以明之蓋諸侯本宜射熊侯而鄉射記天子熊侯白質以天子之燕射亦有取于熊為其同于天子故尊而大之也麋侯據司裘職本卿大夫所用而鄉射記云諸侯麋侯亦質則諸侯之燕射亦有取于麋以其諸侯卿大夫皆得參用故變名之為參也若于侯即士所射之豸侯見于射人職者是也熊侯諸侯所自射麋侯以待卿大夫之射故大射儀云公射大侯大夫射參士射干士雖不得自行大射之禮然得與君同射又射義云古者天子之制諸侯歲獻貢士于天子天子試之于射宮則是天子之大射士亦得與矣并記于此抗毛云舉也廣韻云以手抗舉也先此已張侯而不繫左下綱至此乃繫之故曰既抗按鄉射儀初張侯不繫左下綱中掩束之及有司請射于是司馬命張侯弟子說束遂繫左下綱綱者持舌絕之名舌所以

維特侯者侯上下各有左右舌故有左右上下網絕出
于舌外以持舌而繫之于植也侯以向堂為面則左下
網以西畔而言初之不繫者事未至也中掩束之者中
掩左廂向東束之故將射乃解之也司馬者即司正所
為涖酒名司正涖射名司馬弟子卑幼者也脫其束遂
繫左下網于植事至故也大射儀于將射雖不言繫網
而前此張三侯之時亦有不繫左下網之文及畢事又
有量人解左下網之文則於此時繫之可知所以不言
及者互相見耳又鄭箋以為既抗者舉鵠而棲之于侯
也按考工記梓人為侯廣與崇方三分其廣而鵠居一
馬又云張皮侯而棲鵠當侯之中別製皮為鵠舉以棲
之故曰既抗亦通所抗者不止于大侯舉尊以該卑也
又按禮卑者與尊者為耦不異侯張說文云施弓弦也
孔云弓可言張而并言矢者矢配弓之物連言之耳按
大射儀旅酬之後納工歌鹿鳴管新宮畢司射通次祖
決遂執弓挾乘矢于弓外見鐵於附右巨指鈎弦自酢

階前曰為政請射即此所謂弓矢斯張也以句在射夫
既同之前知為司射之弓矢非射夫之弓矢也射夫鄭
云衆射者也既同朱子云比其耦也射每二人相對以
決勝負曰耦與車攻既同差異彼特以人衆齊集言此
乃以藝能相近言按大射儀司射請射之後遂告曰大
夫與大夫士御于大夫言大夫與大夫不足則士侍于
大夫與為耦也乃比三耦三耦俟于次司射命上射曰
某御於子命下射曰子與某子射及三耦卒射之後復
比衆耦比者選次之謂即此所謂射夫既同也然三耦
乃諸侯之禮若天子則六耦以諸侯為之周禮大司馬
職云若大射則合諸侯之六耦是也或諸侯不足亦當
取足于卿大夫也獻鄭云猶奏也爾指賓武公自謂蓋
使人誦之以刺已也發功鄭云發矢中的之功按大射
儀三耦取弓矢于次司射適次作上耦射命曰毋射獲
毋獵獲乃射上射既發挾矢而後下射射拾發以將乘
矢獲者坐而獲舉旌以宮偃旌以商獲而未釋獲三耦

卒射亦如之此射之第一節作上耦射者射有三耦先使上耦射而後通及其次三耦也獲解見前母射獲者母使矢中乏也從旁為獵發挾矢者發其所挾之乘矢也下射亦如之拾之言更也將之言行也獲者坐而獲言負獲旌之人坐而告獲下文舉旌偃旌是也以官以商者以磬聲之官商為節奏也此即所謂獻爾發功者也獲而未釋獲者此時但言獲而已猶未釋算也彼指射侯也的說文云明也即鵠是也以其明白而可見故名也祈求也爾即賓也爵飲器其形象雀取其鳴節節足足也韓詩說云一升曰爵爵盡也足也二升曰觚三升曰解四升曰角五升曰散總名曰爵陸佃云雀固物之淫者也酒善使人淫佚故一升曰爵爵所以戒也亦取其鳴節以戒荒淫之飲言爾所與射之耦發矢于彼侯而有中其的者則將以此求爾之飲此爵也射義孔子曰詩云發彼有的以祈爾爵祈求也求中以辭爵也酒者所以養老也所以養病也求中以辭爵者辭養

也按大射儀三耦初射之後乃設楅上耦取矢復射司射請釋獲于公公許司射命曰中離維網揚觸相復公則釋獲衆則不與唯公所中中三侯皆獲復進視上射命曰不貫不釋釋獲者實八算于中乃射若中則釋獲者每一箇釋一算上射于右下射于左若有餘算則反委之俟三耦卒射然後公及諸公卿大夫相繼卒射於是司射視算釋獲者先數右獲二算為純一純以取實于左手十純則縮而委之每委異之有餘純則橫諸下一算為奇奇則又縮諸純下又釋左兼飲算實于左手一純以委十則異之其餘如右獲司射復位釋獲者遂進取賢獲執之繇阼階下北面于公若右勝則曰右賢于左若左勝則曰左賢于右以純數告若有奇者亦曰奇若左右鈞則左右各執一算以告曰左右鈞于是司射者命設豐勝者之弟子洗觶升酌奠于豐上一耦出揖及階勝者先升升堂少右不勝者進北面卒觶遂揖而下不勝者先降與升飲者相左交于階前相揖反位

三耦以次卒飲若賓諸公卿大夫不勝則僕人師洗升
賓解以授賓諸公卿大夫受解于席若飲公則侍御者
降洗角解升酌及射爵解乃徹豐與解此射之第二節
也詳第一節之射似是人皆先習射一次故雖告獲而
未釋算至此乃計的之中否以為勝負而飲射爵焉即
此詩所謂發彼有的以祈爾爵也樞中二器名解見猗
嗟篇離猶過也獵也侯有上下網其邪制躬舌之角者
為維躬侯身也古解見躬揚觸者謂矢中他物揚而觸
侯也相復謂矢至侯不着而還反也言雖中侯而獵過
侯之維網及揚觸相復之類皆不得釋獲惟公則許所
以優君也又三侯隨公所值中一侯亦得釋獲若他人
則必中其所應射之侯方釋獲也貫猶中也不貫不釋
言不中鵠不釋算也釋獲者謂主釋算之人也射以二
人為耦一名上射一名下射人各四矢一耦則八矢矣
故於中上實八算也上射中則釋算于中內之右下射
中則釋算於中內之左其不得釋之餘算則另置之視

算先右後左先上射而後下射也純猶全也縮者從也東西為從賢獲者勝黨之算也豐形似豆卑而大觶飲酒角也受四升或云三升僕人師者服役

之人也角觶即兕觥罰爵也辨者徧也

籥豐本作籥

豐本作瑟笙鼓虞韻樂既和奏叶虞韻烝衍烈祖虞韻以洽百禮

豐本叶虞韻百禮既至有壬有林侵韻錫爾純嘏子孫其湛

先君印海先生諱叶侵韻其湛曰樂音洛各奏爾能豐本叶侵韻賓

戴手仇

尤韻亦叶支韻渠之翻董本豐本俱作斟室人入又叶尤韻夷周翻亦叶支韻盈之

翻爾雅酌彼康作漣爵以奏爾時支韻亦叶尤韻時流翻賦也籥舞執籥而舞文舞

也解見簡兮篇按周禮春官籥師掌教國子舞羽飲籥祀則舉羽籥之舞賓客饗食亦如之大射具賓客饗

食之禮既命用樂則有舞可知儀禮無文偶畧之也又按大司樂職云大射令奏騶虞詔諸侯以弓矢舞陳賜云祭祀天子執于戚而舞所以樂尸大射諸侯執弓矢而舞所以樂王笙解見鹿鳴鼓鍾篇大射儀所謂笙鐘笙磬皆應笙之鍾磬而周禮笙師凡祭祀饗射共其鍾笙之樂亦謂與鍾聲相應之笙也又笙有與瑟琴相應者鹿鳴所謂鼓瑟吹笙是也有與磬相應者鼓鍾所謂笙磬同音是也有與歌相應者儀禮所謂歌魚麗笙繇庚是也有與鼓相應者此言笙鼓是也以其為用無所不備故特舉之鼓解見闕雎篇不獨樂以鼓為節射亦以鼓為節所謂不鼓不釋者也奏以出聲言聲有高下緩急之度謂奏即奏騶虞狸首之奏言樂之聲既和于所奏之詩也按大射儀徹豐觶之後獻服不氏及釋獲者畢司射復請射如初司射北面請以樂于公公許司射東面命樂正曰命用樂樂正曰諾司射遂適堂下北面眡上射命曰不鼓不釋樂正命太師曰奏狸首問若

一遂奏鯉首以射三耦卒射賓待于物如初公樂作而後就物稍屬不以樂志其他皆如初儀然後反位就席始命退福解左下綱退中與算而俟此射之第三節也服不氏於周禮為司馬之屬掌養猛獸而教擾之者請用樂于公請奏樂以為節也不鼓不釋者不與鼓節相應不釋算也鯉首愚謂即七月之四章間若一者聲之中間相去或希疏或密數調之使如一也物謂射時所立處也謂之物者物猶事也君子所有事也君之射儀遲速從心但稍與樂相屬而已其發不必應樂避不敏也志猶擬也及解左下綱則正射之事畢矣末猶言俟者俟將復射與否也鄭玄曰始將射而未釋獲復釋獲復用樂行之君子之于事始取苟能中課有功終用成法教化之漸也射用應樂為難射義云天子以騶虞為節諸侯以貍首為節卿大夫以采蘋為節士以采芣為節騶虞者樂官備也鯉首者樂會時也采蘋者樂循法也采芣者樂不失職也是故天子以備官為節諸侯以

時會天子為節卿大夫以循法為節士以不失職為節故明乎其節之志以不失其事則功成而德行立德行立則無暴亂之禍矣功成則國安故曰射者所以觀成德也按周禮射人職云騶虞九節狸首七節采蘋采蘩皆五節先儒謂九節者五節先以聽七節者三節先以聽五節者一節先以聽其後四節皆以應乘矢拾發也乘矢四矢拾發連發也一終為一節孔子曰射者何以射何以聽循聲而發發而不失正鵠者其惟賢者乎若夫不肖之人則彼將安能以中烝衍烈祖以下六句皆預擬之辭非實祭也承上言大射之禮既畢凡射而中者皆得與于祭則今日能中之人即後日助祭之人矣烝衆也通與射者而言也映下文百禮可見衍說文云行喜貌爾雅云樂也烈本火猛以功之光而盛者似之故爾雅又轉訓為業也烈祖孔云功烈之祖也洽鄭云合也當以偏傍省通用百禮嚴云事神之衆禮以洽百禮者言助祭之人既多則可以合舉事神之衆禮也百

禮既至言行禮之時至也壬遁作任任之為義擔也負也言任其事也本多為林衆之意也衆禮次序行之各有其時當其時之至則有身任其事者又有衆多林立以待事者凡皆駿奔走于廟中也錫遁作賜說文云予以篇內爾字皆指賓則以兼通助祭者而言純全也嘏說文云大遠也皆指福言子孫指主祭者猶云曾孫也湛本作媵說文云樂也言助祭者能合舉百禮以樂先祖則神將賜之以純全大之福而主祭之子孫見助祭者之皆得人亦因之以喜樂也其媵曰樂為復射發端也其媵以心言乃虛寫未然之景曰樂則指其當日射畢升坐安燕之事而言也按大射儀射畢徹俎司正升賓賓諸公卿大夫皆說屨升就席公以賓及卿大夫坐乃安羞庶羞公曰衆無不醉賓及諸大夫皆興對曰諾敢不醉乃舉爵為士偏舉旅行酬即此所謂樂也各奏爾能命復射也奏猶獻也爾通與射者而言實在其內載者更始之義唐虞名歲曰載取物終更始也手毛

云取也仇匹也訓仇為匹猶訓潔為污訓亂為治反言之也賓載手仇謂再取其技能之相敵者與之為耦也按大射儀若命曰復射司射命射唯欲一發中三侯皆獲云命射唯欲者欲者則射不欲者則止可否之事從人心也此所謂手仇者也前此惟君釋獲不拘三侯此臣得與君同者以燕射復射其法寬亦尚歡樂之意也室人孔云有室中之事者毛云主人也按主人即宰夫也入又者謂入而又行獻酬之禮康爾雅云安也毛云酒所以安體也鄭云虛也無酒于爵謂之虛爵按康即煉字从米庚聲穀皮也故爾雅亦訓康為空謂去其肉之米以空之也然則空虛是康本義其轉訓為安者當是康莊之康爾雅道五達曰康亦空虛洞達之意康衢可以安行故又訓為安也二義皆通按大射儀復射後無算爵士有執膳爵者有執散爵者膳爵者酌以進公散爵酌以之公命所賜受賜爵者以爵就席坐公卒爵然後飲執膳爵者受公爵酌反奠之受賜者以散爵授

執者執散爵者乃酌行之唯受于公者拜此康爵即散爵也膳爵公所用公飲畢仍反奠于公所散爵自拜賜後隨執爵者勸其所歡徧行于賓及諸公卿大夫士不以次數為限所謂無算爵也奏與樂既和奏之奏同義謂奏咳夏也咳夏者九夏之一時謂歡燕已洽賓可以出之時也按大射儀無算爵之後君有命徹幕皆降再拜稽首反位無算樂宵則庶子執燭于阼階上司宮執燭于西階上甸人執大燭于庭閭人為燭于門外賓醉北面坐取其薦脯以降奏咳遂出卿大夫皆出公不送公入驚而大射之儀畢于此命徹幕者君意殷勤欲盡酒也無算樂者升歌間合無次數惟意所樂也取脯以降重得君之賜也奏咳者咳之言戒也以咳為節明無失禮也驚解見前此詩所載行禮次第與大射儀一一具合而舊說絕不理會今故逐段為之附麗以詔來者不敢厭其繁焉

賓之初筵

先韻

溫溫其恭

無韻未詳

其未醉止威儀

反反

詩叶先韻分遭翻韓

曰既醉止威儀幡幡

叶先韻

舍

音捨其坐遷

先韻屢

陸德明本作婁

舞僂僂

先韻樂書作蹢蹢

其未醉止威

儀抑抑

叶寘韻固利翻國語引詩抑戒作懿戒可證

曰既醉止威儀忸忸

叶寘

韻毗志翻說文作忸忸

是曰既醉不知其秩

叶寘韻直詈翻也賓之初筵謂未射

賦

以前行燕禮時也溫溫和柔貌在心為敬在貌為恭又貌多心少為恭心多貌少為敬故少儀云賓客主恭祭

祀主敬各有攸當也其未醉止卒射而飲觶時也有威可畏謂之威有儀可象謂之儀皆主升降周折之容言

反反蘇徹云顧禮也曰既醉止謂酌康爵時也此時飲無算爵又徹幕盡歡則勢必至于醉矣幡通作翻說文

云飛也飄揚之意幡幡猶翩翩也蘇云輕數也舍通作捨置也遷移屢數也賓醉降階將出業已舍其故坐斯

時聞樂人奏隊即當遂出而猶未肯出乃遷移他處以
屢舞為樂也此舞非樂舞如以舞屬客之類直是戲耳
陳暘云前代歡飲酒酣必起舞蓋所以極歡心叙誠意
魏晉以來尤重以舞相屬樂飲以舞相屬猶飲酒以杯
相屬也故漢李陵起舞以屬蘇武王智起舞以屬蔡邕
晉謝安起舞以屬桓嗣陳智匠曰北人猶以舞相
屬則屬舞古人非不尚也然田蚡與灌夫過竇嬰家酒
酣起舞屬蚡蚡不起夫徙坐語侵之陶謙為舒令見太
守張磐磐舞屬謙謙不為起固強之雖舞而不轉曰不
當轉耶曰不可轉轉則勝人繇此觀之以舞相屬情意
一有不至而禍患隨之可不重之哉詩曰屢舞蹀躞然
則相屬之舞其亦不可屢而常矣江表孫譚酒酣屢舞
而不知止顧雍所以深責之也唐中宗數與近臣狎宴
通起舞唱憺幸之人因之微求官爵君臣之禮微矣僊
通作蹀說文云蹀躞旋行也若如本字解則為仙人輕
舉之狀亦如趙飛燕外傳云后楊袖曰仙乎仙乎之意

以屢舞故重言僂僂後放此抑說文云按也字本从反
印後加从手作抑印者執政所持信器也印所以行之
于外今反而歛之于內則為自按抑也說文無忮字引
此詩作忮忮云威儀也韻會云威儀備也此四句以理
言人當未醉時其威儀固當折抑而收斂即當既醉時
其威儀亦當忮忮而周備乃是之名既醉者何如哉第
見昏然沉迷不知其秩而已矣秩即左右秩秩之秩亦
以折旋揖讓言彼入時之禮此出時之禮也莊子云以
禮飲酒者始乎治常卒乎亂孔云小人未醉身有惡態
強自收掩及其醉酒則舊時情態皆出莊子說察人之
法曰醉之以酒以觀其態是從飲酒則情態出也蔡汝
楠曰武公自戒甚嚴多勗以威儀觀風人稱之曰善戲
謔兮蓋亦過于和

賓既醉止載號

豐本作
号平聲

載呶

無韻
未詳

易而能悔者也

亂我籩豆屢舞僂僂

支韻

是曰既醉不知其郵

叶支韻
是為翻

側

說文豐本俱作仄

弁之俄

歌韻

屢舞傚傚

歌韻說文作晏晏

既醉而出並

受其福

屋韻亦叶職韻筆力翻

醉而不出是謂伐德

職韻亦叶屋韻都未翻

飲酒孔嘉

叶歌韻居何翻

維其令儀

叶歌韻牛何翻說文云呼也叟說文云謹

聲也亂我籩豆與首章籩豆有楚相應此因屢舞傲傲而亂及籩豆二句當合看非兩事也傲徐鉉云敬傾不
能自正也郵通作尤過也側旁也通作仄說文云傾側也言傾于其旁也弁皮弁也解見前俄說文云行頃也
傚說文云醉舞貌傚傚毛云不止也詩言既醉而屢舞者三初遷而屢舞已可異矣然且不止而繼之以號呶
又繼以俄頃之間數側其弁益君形者去而口容首容舉失其度屢舞不休欲何為乎酒以合歡原期于醉先
王之禮所以有無算爵也既醉何病然醉斯可以出惟醉而不出為可醜耳此詩專為酌康爵秦咳夏後昏醉

喪儀而不肯出者發意武公必曾有是失故使人誦之以自儆也全篇次序相承皆紀當日實事非謂以前二章為思古以後三章為傷今也既醉以下是嘆悔之辭並受其福者鄭云賓醉則出與主人俱有美譽也是謂伐德者孔云若至于醉而不出是謂誅伐其德醉前無失為有德既醉為愆以喪之是伐其德也晏子春秋云晏子飲景公酒日暮公呼具火晏子辭曰詩云側弁之俄言失德也屢舞僂僂言失容也既醉以酒既飽以德既醉而出並受其福賓主之禮也醉而不出是謂伐德賓之罪也嬰已卜其日未卜其夜公曰善舉酒祭之再弁而出諸葛亮戒子書云夫禮之設合禮致情適體歸性禮終而退此和之至禮意未殫賓有餘倦可以至醉無致于亂孔甚嘉美令善也儀即威儀之儀朱子云飲酒之所以甚美者以其有令儀耳今若此則無復有儀矣蘇云此章中言凡此飲酒或醉或否既立之

有韻

有韻

監或佐之史

紙韻

彼醉不臧不醉反恥

紙韻

式勿從謂無俾

大

音泰

怠

叶紙韻

養里翻

匪言勿言匪由勿語

叶虞韻

讀如

由醉

之言俾出童

豐本作

撞

殺

虞韻

三爵不識

叶寘韻

吏翻

矧敢多又

叶寘

韻夷豉翻

賦也

此章皆深絕醉者之辭所以著自微

之意飲酒一也而醉與不醉異故為之監史以同察之

朱子云監史司正之屬按燕禮射人為司正註謂將留

賓飲酒更立司正以監之察儀法也又大射儀先以大

射正為擯其後以擯為司正及誓射則大史俟于西序

東面以聽政其釋獲釋算之事大史司之既畢射司正

升賓將公命曰衆無不醉則以司正為監者近之但未

知史即太史否耳呂祖謙云淳于髡說齊威王曰賜酒

大王之前執法在傍御史在後秦趙會浞池秦王請趙

王鼓瑟藺相如請秦王擊瓦兩國御史皆前書之此古

人君燕飲之制猶存于戰國者也或立之監即執法也或佐之史即御史也董鼎云監以監之史以書之古之慎禮如此錢天錫云一察一書相為副貳謂之佐非謂監所不及史則書之也臧善也失禮為不臧朱子云彼醉者所為不善而不自知使不醉者反為之羞愧也式勿從謂以下設為監史告不醉者之辭所以深厭惡夫醉者也式發語聲勿禁止辭從就謂告也嚴粲云彼人已醉勿就其位而與之言與之言則彼愈更號呶是使之大為怠慢也匪通作非言自言也由謂理所當錄者語與人語也徐鉉云語者午也言交午也所不當言者勿言所不當由者勿語彼醉者雖極善號呶然無人與之酬答則亦將廢然而自止矣殺羊名爾雅云夏羊牡羴牝殺羅願云殺本夏羊牝者之名以吳羊白夏羊黑今人便以殺為黑羊名殺羊之角主明目安心益氣輕身辟鬼魅虎狼療疥蟲蠱毒結氣止寒洩其角為用最大嚴云童羊無角殺未有無角者愚按此蓋戒人以醉

言不可聽亦如人言殺羊無角其不足信明甚汝若聽醉人之言則責之使出童殺困之以必無之物以喻有是言無是事也馮時可云信醉者之言以虛而責實則必不可行傳註曰設言必無之物以恐之非也既曰必無之物惡足以恐哉三爵謂射畢後飲酒君已舉旅三次則情意已洽禮文已備可以辭而出之時也按大射三射禮畢公舉奠解惟公所賜若賓若長以旅于西階上此第一爵也于是徹俎升賓及諸公卿大夫皆就席坐羞底羞賓降洗升腍解于公公取賓所腍唯公所賜受者如初受酬之禮及就席坐行之注云坐行之者若今坐相勸酒也旅酬至士而徧此第二爵也已而命復射遂行無算爵之禮執散爵者酌以之公命所賜受賜者飲畢以散爵授執者執散爵者乃酌行之注云酌行之謂與其所歡者也亦旅酬至士而徧此第三爵也舊說皆失考又玉藻云君子之飲酒也受一爵而色酒如也三爵而言言斯禮已三爵而油油以退識記也又即

室人入又之又謂復飲酒也言君已舉行三爵之禮矣
汝奈何不記憶而況敢號呶不出更復思多飲乎監史
以此為訓明者以醉
為監庶乎知儆耳

賓之初筵五章章十四句

序云衛武公刺時也幽王荒廢媒近小人飲酒

無度天下化之君臣上下沈湎淫液武公既入而
作是詩也按此詩明止為刺賓而作未見君臣上
下沈湎淫液之意而語氣雅與抑戒相類其為武
公自儆之詩無疑或謂王朝之詩曰雅侯國之詩
曰風果武公作宜與衛風淇澳伍今在雅則王朝
獻納之辭矣是又不然序言武公既入而作是詩
鄭箋謂入者入為王卿士然則以其為王朝卿士
所作故列之雅耳曰果爾何以辨其非刺幽王曰
史記載武公四十二年犬戎殺周幽王武公佐周
平戎甚有功平王命武公為公其後平王十有三

年武公始卒則武公為周卿士實在平王之世當幽王時武公受封于衛未嘗入周也又予貢傳但

存衛武公三字其下闕文

抑衛武公刺王室亦以自戒行年九十有五猶使臣

日誦是詩而不離于其側

出侯包韓詩翼要楚語左史倚相云昔衛武公年

數九十有五矣猶歲傲于國曰自卿以下至于師長士苟在朝者無謂我老耄而舍我必恭恪于朝朝夕以交戒我聞一二之言必誦志而納之以訓道我在與有旅賁之規位守有官師之典倚几有誦訓之諫居寢有瞽御之箴臨事有瞽史之道宴居有師工之誦史不失書矇不失誦以訓御之於是乎作懿戒以自儆也及其沒也謂之叡聖武公韋昭云懿詩大雅抑之篇也懿讀曰抑徐幹云昔衛武公年過九十猶

夙夜不急思聞訓道作抑詩以自儆衛人誦其德為賦淇澳鄒忠肅云夷考武公在位五十有五年以宣王十六年立以平王十三年卒此詩作于晚年在平王之世篇中亦聿既耄其証也諷時王之意在言外見之所云天方艱難曰喪厥國取譬不遠昊天不忒則明指驪山之覆轍矣驪山之難武公將兵救周有功平王命為公是詩作于王朝故不復還繫其本國鄧元錫云王妣酒故初筵引以為戒不斥言故引而反之躬自怨責感焉初筵專言酒抑廣言深言精言于天人之際故分隸二雅又衛風錄淇澳風二雅具有詩惟周名衛武矣

抑抑威儀維

漢書作惟

德之隅

虞韻亦叶尤韻魚侯翻

人亦有言靡

淮南

子作無

哲陸德明本作詰又云亦作慙

不愚

虞韻亦叶尤韻魚侯翻

庶人之愚亦

職維疾

質韻亦叶真
韻秦二翻

哲人之愚亦維斯戾

叶真韻力置
翻亦叶質韻

力質翻 賦也抑說文云按也目按抑也詳見賓之初筵篇抑抑者抑而又抑也與揚揚相反威儀揚則放抑則欽抑而不揚謙下之度也左傳北官文子云有威而可畏謂之威有儀而可象謂之儀孔穎達云隅者角也鄭玄云宮室之制內有繩直則外有廉隅王安石云德譬則宮城也儀譬則隅也觀其隅則宮城之中可知矣有諸中必形于外故也嚴粲云廉隅者屋之外角譬人之外有威儀也凡宮室觀其外有廉隅則知其內之制必方正也如人外有抑抑然謹密之威儀則知其內之德性嚴正也張文潛云老子曰高者抑之使卑書曰太王王季克自抑畏蓋裁其盛而使退挹其滿而使虧者抑也臨下而使物畏之者威也居上而使物象之者儀也威能抑抑則不至于剛暴儀能抑抑則不至于不遜雖威儀外也非不可以偽作使脩其威儀者蓋使

之勉其德而已故曰惟德之隅治室者不先治隅也使
之治隅者是使之治宮室而已愚按全詩頭緒甚多讀
者茫然不能得其要領再四諷詠始知意分四層修德
是第一層其工夫全在謹獨七章不愧屋漏等語是也
能潛心脩德則威儀自然敬慎是第二層此所謂抑抑
後所謂柔嘉及不僭不賊溫溫恭人等語是也其威儀
見于外者如此則聞善言必能虛心聽受此第三層二
章言遠猶辰告九章言順德之行是也所樂聞者善言
則小人變亂舊章之言無繇而入而條教號令必皆中
理此第四層二章言定命五章六章言慎爾出話惠于
朋友庶民是也反是而回過其德則不能敬其威儀方
且驚然自大而反以教我者為虐于是忠直日退諛佞
日進所出政令必皆與先王明刑相悖而俾民大棘矣
詩詞雖錯綜而其條理明白如此人亦有言謂古人之
遺言靡無通哲說文云知也書云知之曰明哲孔子愚
者癡也靡哲不愚即老子所謂良賈深藏若虛君子盛

德容貌若愚者淮南子云人能繇昭昭于冥冥則幾于道矣詩曰人亦有言無哲不愚此之謂也職爾雅云主也常也鄭云衆人性無知以愚為主是其常也疾說文云病也王云庶人之愚則天性之疾也孔子曰民有三疾斯者語辭亦訓為此蓋指愚而言也戾訓為至鳶飛戾天魯侯戾止皆同是義亦維斯戾者言哲人之所以哲者亦維其愚以自居故能至于哲也徐光啟云此詩之作以聽言修德為主欲聽言修德必先磨去一段矜許自賢之心使此中退然自下若拙若訥乃可故曰虛以受害又曰滿招損謙受益此章全是發明此義以為一篇提領抑抑謙遜卑下之貌有此威儀便想見他虛中受善之意故曰維德之隅此等人其中全無纖翳障塞廓然空洞澄然虛明故又謂之哲人人亦有言無有哲人而不愚者哲即德也愚即抑抑威儀也惟哲故愚惟愚益見其哲也後四句又言愚有不同庶人氣濁質闇稟賦之偏此真愚也若哲人之愚是其盛德容貌收

慎中論作爾

威儀維

左傳中論俱作惟

民之則

職韻戒辭也

競彊語也訓

訐謨

釋文云沈本作漢

定命遠猶

外傳世說豐氏本俱作猷

辰告

叶職韻訖得翻

敬

四方其順

叶震韻讀如盤許刃翻

之有覺

禮記作梧

德行四國順

震韻

相反果其真愚又何以稱哲人乎故定主前說

無競

呂覽作兢五經文字作京

維呂覽作惟人

坐此不知抑抑之病哲人而愚亦維于此抑抑處有乖戾耳按此說亦通但第九章明以哲人愚人對言哲愚

人之愚語意相應脈絡粲然一說抑抑威儀為德之隅此宜盡人知之而靡哲不愚皆不能知也庶人之愚專

畢重宣此義溫溫恭人即是抑抑威儀維德之基即是維德之隅哲人順德即是靡哲不愚其維愚人即是庶

欽退藏乃所繇以至于道也老子之若愚顏子之如愚烏得與庶人之愚同類而稱哉第九章說脩德之事已

教也俱見說文無競維人是勸其虛受即上章所謂哲人之愚者言汝若不與人爭辨求勝則四方之人皆將以言來訓誨乎女也覺說文云寤也歐陽脩云警動也按朱子謂呼寐者而使之寤曰覺有覺德行言人君有德行足以醒動人心人皆曉之也德即上章維德之隅之德德不可見自其行之著于威儀者而信其有德謂之德行也董仲舒引此詩而釋之云覺者著也王者有明著之德行于世則四方莫不響應風化善于彼矣四國即四方之國左傳云慈和徧服曰順歐陽云謂一日克己而天下歸仁也韓詩外傳云水淵深廣則龍魚生之山林茂盛則禽獸歸之禮義脩明則君子懷之故禮及身而行修禮及國而政明能以禮扶身則貴名自揚天下願焉令行禁止而王者之事畢矣詩曰有覺德行四國順之夫此之謂也又云齊桓公見小臣五往而德見也天下諸侯聞之謂桓公猶下布衣之士而況國君乎于是相率而朝靡有不至桓公之所以九合諸侯一

匡天下者此也詩曰有覺德行四國順之禮記緇衣篇
子曰上好仁則下之為仁爭先人故長民者章志貞教
尊仁以子愛百姓民致行已以說其上矣詩云有棣德
行四國順之孝經子曰昔者明王之以孝治天下也不
敢遺小國之臣而況于公侯伯子男乎故得萬國之惟
心以事其先王治國者不敢侮于鰥寡而況于士民乎
故得百姓之惟心以事其先君治家者不敢侮于臣妾
而況于妻子乎故得人之惟心以事其親夫然故生則
親安之祭則鬼享之是以天下和平災害不生禍亂不
作故明王之以孝治天下如此詩云有覺德行四國順
之按以上數條引詩意皆恍惚相近又毛傳訓覺為直
與爾雅棣較等字同解皆以音同通用而未詳其義所
出左襄二十一年范宣子因叔向樂王鮒見叔向曰吾
為子請叔向弗應出不拜其人皆咎叔向叔向曰必祁
大夫外舉不棄讐內舉不失親其獨遺我乎詩曰有覺
德行四國順之夫子覺者也昭五年叔孫昭子朝其家

衆曰豎牛禍叔孫氏殺適立庶罪莫大焉豎牛懼奔齊殺諸塞闔之外仲尼曰叔孫昭子之不勞不可能也周任有言曰為政者不賞私勞不罰私怨詩云有覺德行四國順之按左傳所引有覺皆取訓直之義但于詩意甚遠不必從訐謨二句承無競二句而言訐即實覃實訐之訐鄭以為張口嗚呼是也謨說文云議謨也徐鍇云汎議將定其謀曰謨定朱子云審定不改易也命政令也第五章所謂出話者指此言嗟呼衆人使各出其議論以為酌定政令之地絕無自廣以狹人之心又不止于無競而已猶本獸名其性多疑故借為謀慮之義曰遠猶者呂祖謙云所謀不止于一身而計天下之安危不止于一時而監百世之損益長慮却顧思其所終稽其所做也辰毛云時也按爾雅以不辰為不時告當通作誥爾雅云誥也嚴云入告爾后于內之告言人君誠樂于求言則凡有深遠之圖者得以時時入告此即上文所謂四方其訓之者孟子有言夫苟好善則四海

之內皆將輕千里而來告之以善正謂此也世說新語云謝公因子弟集聚問毛詩何句最佳公曰許謨定命遠猶辰告此句偏有雅人深致敬慎二句承上文有覺二句而言敬慎者有覺之本也敬慎其怠慎防其疎必能敬慎威儀然後德行之見于外者始于茲大著矣則鄭云法也其儀不忒而後民法之上文所謂四國順之者此也匡衡云聖王之自為動靜周旋奉天承親臨朝享臣物有節文以章人倫蓋欽翼祇栗事天之容也溫恭敬遜承親之禮也正恭嚴恪臨衆之儀也嘉惠和說饗下之顧也舉錯動作物遵其儀故形為仁義動為法則孔子曰德義可尊容止可觀進退可度一臨其民是則以其民畏而愛之則而象之大雅云敬慎威儀維民之則徐幹云夫法象立所以為君子法象者莫先乎正容貌慎威儀是故先王之制禮也為冕服采章以旌之為佩玉鳴璜以聲之欲其尊也欲其莊也焉可懈慢也夫容貌者人之符表也符表正故情性治情性治故仁義

存仁義存故盛德著盛德著故可以為法象斯謂之君子矣詩云敬爾威儀惟民之則若夫墮其威儀恍其瞻視忽其辭令而望民之則我者未之有也莫之則者則慢之者至矣小人皆慢而致怨乎人患己之卑而不知其所以然哀哉左襄三十一年衛侯在楚北宮文子見令尹圉之威儀言于衛侯曰詩云敬慎威儀惟民之則令尹無威儀民無則焉民所不則以在民上不可以終公曰善哉何謂威儀對曰有威而可畏謂之威有儀而可象謂之儀君有君之威儀其臣畏而愛之則而象之故能有其國家今聞長世臣有臣之威儀其下畏而愛之故能守其官職保族宜家順是

其在于今

叶庚韻讀如京

興迷亂于政

叶庚韻諸盈翻

顛覆厥德荒湛

先君諱漢書作沈韓詩作湛

于

酒

叶篠韻子小翻

女

音汝

雖湛樂

音維

從弗念厥紹

葉韻

罔敷求先王

陽韻 克共 豐本作恭 明刑 叶陽韻胡光翻諸本祖毛鄭皆 肆皇

天弗尚 辰羊翻 如彼泉流 讀書記大全朱傳 無淪胥以

亡 歐陽以其在于今至此為第三章今從之 賦也今

朱子云武公自言已今日之所為也蓋使人箴儆而

為是切責之辭非必真有是事所謂諷王者正在于此

興迷亂于政者鄭云興猶尊尚也尊尚小人迷亂于政

事者一說蘇轍云作起迷亂之人而任之以政也皆通

顛覆也興迷亂于政則與訂謨定命反矣顛覆厥德則

與敬慎威儀反矣荒蕪湛沒也俱見說文初則荒蕪而

不治繼則沉沒而不還均是縱情于酒而亦有淺深時

必王有此事又武公亦曾蹈此觀初筵詩可見女朱子

云武公使人誦詩而命已之辭也後凡言爾言女言小

子者放此又云如幕中之辨人反以女為叛臺中之評

詩經世本古義

四十八

人反以女為傾等類亦是自謂古人此樣亦多從隨也
謂與沈湎為樂之人相隨也念說文云常思也紹爾雅
云繼也朱子云謂所承之緒也罔通作亡與無同意敷
說文云施也求通作述說文云斂聚也先王之典章法
度其猶存者則不能施布之其散逆者則不能斂聚之
共通作恭刑通作刑法也明刑謂成法之昭垂者王安
石云弗念為人子孫當紹祖考故罔敷求先王克共明
刑克共者不敢慢之謂也愚按敷求以事言克共以心
言前空言先王尚未知何所指故以明刑實之肆承上
起下之辭說文以為極陳也皇說文云大也惟天為大
故曰皇天尚通作上猶言崇重也弗尚朱子云厭棄之
也言如上文所為自絕于天故不為天所崇尚而喪止
之禍亦將及矣無通作毋朱子云言無者戒之欲其不
至是也如彼泉流者輔廣云如泉流之不可止季本云
其止如流泉趨下之易韓詩云順流而風曰淪胥爾雅
云皆也方言云東齊謂皆曰胥歐陽云淪胥以止者君

臣皆將滅亡矣郝敬云言當早隄防之無使淪沒相率以亡可也

夙興夜寐寘韻灑埽

外傳庭陸本讀詩記大全內叶寘韻維民之章陽韻脩爾

車潛夫論馬弓矢戎潛夫論兵叶陽韻用戒戎作潛夫論

戎作爲用邊潛夫論蠻方陽韻諸本皆以肆皇天至此

爲第質鹽鐵論作詰外爾人民說苑鹽鐵論謹左傳爾

侯度韻遇用戒不虞叶遇韻慎爾出話敬爾威儀叶歌韻

無不柔嘉叶歌韻居何翻歐陽以質爾人民至此爲第

興六句是不泄邇不忘遠之意上文言迷亂于政則事之大者且置不理何況細行故此言及寢興洒掃舉細

以該大也近而易見者且或遺忘何有遠慮故此言及修武備邊蠻方舉遠以該近也夙興夜寐是無逸之念言須侵早而即起夜分而後卧也洒滌埽棄也俱見說文孔云洒埽者謂以水洒地而掃之庭說文云宮中也洒掃庭內是慎微之念此兩句正克勤之實崇功廣業皆基于此韓詩外傳云子路治蒲三年孔子過之入境而善之曰繇恭敬以信矣入邑曰善哉繇忠信以寬矣至庭曰善哉繇明察以斷矣子貢執轡而問曰夫子未見繇而三稱善可得聞乎孔子曰入其境田疇草萊甚辟此恭敬以信故民盡力入其邑墉屋甚尊樹木甚茂此忠信以寬故民不偷入其庭甚閑此明察以斷故民不擾也詩曰夙興夜寐洒埽庭內章通作彰明著之義維民之章承上二句言民皆曉然知上之勤于政事也脩道作修說文云飾也戎兵孔云戈盾矛戟之類戒說文云警也謂警備也過毛云遠也說文無過字當通作逖蠻方鄭云蠻畿之外也孔云周禮九服六服之內為

中國七服以外為夷狄而第六者大行人謂之要服職方氏謂之蠻服大司馬謂之蠻畿此經有二義用戒戎作為中國則用邊蠻方為夷狄且蠻方與彼蠻夷同故知是蠻畿之外也按周禮大司馬職云蠻畿外方五百里曰夷畿又其外方五百里曰鎮畿又其外方五百里曰蕃畿孔云言當修治汝征伐之車馬及弓矢與戎兵之器用以此戒備戎兵動作之處當征伐之又用此以驅遠蠻方之來內侵者當逐令遠去使不得來侵也李氏云當時沉荒于酒貪目前之樂而忘意外之變故戒之如此以上兩段皆推開一步說質爾人民以下始就其本諸身者而言質猶証也據說文為以物相贅之義徐鍇云質實也事疑虛以人物實之也人謂羣臣民謂庶民質爾人民質證之人民以驗其信從與否下章言慎出話之事則曰惠于朋友庶民言敬威儀之事則曰不僭不賦鮮不為則是也侯度諸侯所以律身治國之常度不越出話威儀二者但未說出耳曰謹者即下文

言慎言敬之謂戒備也虞本獸名爾雅訓虞為度未詳其義疑即是慮字之誤故音與度叶而朱子亦訓虞為慮虞字從虎而吳聲故宜為思慮雖字形相似而所從各別又有訓虞為樂者正當通作娛耳不虞者孔云非意所億度之事愚按謹侯度正所以戒不虞二句相聯說人民皆我之人民一旦離心不為我用是不虞也若侯度克謹自不至是一說質爾人民與天保民之質矣同意謹爾侯度與尚書明乃服命同意亦通說苑及辯詩外傳云古者必有命民命民能敬長憐孤取舍好讓居事力者告於其君然後君命得乘飾車駢馬未得命者不得乘乘者皆有罰故其民雖有餘財侈物而無仁義功德則無所用故其民皆興仁義而賤財利則不爭不爭則彊不陵弱衆不暴寡是唐虞所以興衆刑而民莫敢犯法民莫犯法而亂斯止矣皆引此詩左襄二十二年鄭公孫黑肱有疾歸邑于公召室老宗人立段而使黜官薄祭盡

歸其餘邑曰吾聞之生於亂世貴而能貧民無求焉可
以後亡敬共事君與二三子生在敬戒不在富也君子
曰善戒詩曰慎爾侯度用戒不虞鄭子張其有焉以上
皆從後說慎說文云謹也徐鍇云心真為慎不鹵莽也
話爾雅說文皆云善言也鄭云謂教令也慎爾出話必
如前章所云遠猶足以定命者而後出之無不柔嘉單
承敬爾威儀說觀後章言輯柔爾顏俾臧俾嘉皆敬威
儀之事曰無不者內自深宮外至大庭凡動容周旋之
間無不氣象從容中規中矩也柔指氣象嘉則極致其
贊美之辭王應麟云古之君子剛中而柔外仲山甫之
德柔嘉維則隨會柔而不犯韓文公為王仲舒銘曰氣
銳而堅又剛以嚴哲人之常與其友處順若婦女何德
之光愚按慎出話從虛受中來敬威儀從慎獨中來禮
記緇衣篇子曰君子道人以言而禁人以行故言必慮
其所終而行必稽其所敝則民謹於言而慎於行詩云
慎爾出話敬爾威儀劉向說苑云夫樹曲木者惡得直

景人君不直其行不敬其言者未有能保帝王之號垂
顯令之名者也易曰夫君子居其室出其言善則千里
之外應之況其邇者乎居其室出其言不善則千里之
外違之況其邇者乎言出於身加於民行發乎邇見乎
遠言行君子之樞機樞機之發榮辱之主君子之所以
動天地可不慎乎天地動而萬物變化詩曰慎爾出話
敬爾威儀無不
景嘉此之謂也
白圭之玷說文豐本俱作刮下同尚可磨叶歌韻眉

波也斯言之玷不可為叶歌韻也諸本皆以質爾人無翻

易音由言無曰苟矣補大全云此二句不用韻豐氏考莫

捫朕舌韻屑言不可逝食叶屑韻矣歐陽以白圭至無言墨

言下有不讎叶宥韻承呪翻列女無德墨子德下不報

而字

不讎

傳作

讎

外傳

作

無德

有而

字

不報

叶宥韻敷救翻漢書引此句下有惟民之則一句

惠于朋友庶民

句叶陽韻小謨陽翻

子子孫繩繩

蒸韻爾雅作繩外傳作承承

萬民靡

陸云一本作是

不承

蒸韻亦叶

陽韻辰羊翻諸本皆以無易由言至此為第六章賦也此章言慎爾出話之事圭說文云瑞玉也上園下方按王摺大圭長三尺執鎮圭長尺有二寸公執桓圭九寸侯執信圭伯執躬圭皆七寸凡有土地者必有圭故其字从重土珣本作訓說文云缺也磨謂以石磨之使平也斯鄭云此也孔云白玉為圭圭有損缺猶尚可磨鑣而平若此政教言語之有缺失則遂往而不可改為王者安危在于出令故特宜慎之愚按詩人以白圭為喻原非汎論圭乃國之守器雖珣尚可磨猶未至于失國也若條教號令一失其當則必有危亡之禍不可解救夫有天下國家者而一出言所係其重若此等而下之士庶人不能慎言則必至于亡其身矣此南容一日

三復白圭獨居思仁公言必于仁義孔子謂其邦有道
不廢邦無道免于刑戮而以其兄之子妻之也劉向說
苑云口者闕也舌者機也出言不當反自傷也故荊子羽曰言
者闕也舌者兵也出言不當反自傷也故荊子羽曰言
猶射也括既離弦雖有所悔不可從而追已因引此詩
左僖九年晉獻公疾召荀息曰以是藐諸孤辱在大夫
其若之何稽首而對曰臣竭其股肱之力加之以忠貞
其濟君之靈也不濟則以死繼之及里克弑奚齊及公
子卓荀息死之君子曰詩所謂白圭之玷尚可磨也斯
言之玷不可為也荀息有焉無易由言四句戒之也無
道作毋禁止辭易通作傷說文云輕也任意而言曰由
言嚴云由言者自由之言所謂惟其言而莫予違也無
曰苟矣莫捫朕舌二句相聯說荀說文訓草古義又相
傳訓且者取麗亂之意猶云草草也捫說文云撫持也
朕說文云我也蔡邕云古者上下共稱咎繇與帝舜言
稱朕伊尹曰惟朕以懌周公曰朕復子明辟屈原曰朕

皇考至秦始皇二十六年始尊為天子之自稱漢因之
不改按朕之訓我其解難明字左从舟於義甚遠吳氏
謂从身不从舟宜若可信右施并上火下升其字說文
不載音義俱無傳余再四尋繹忽憶秦趙高謂二世曰
天子不宜親近卑賤之人但示之朕兆而已索隱為之
解曰才有朕兆不見其形也以此義推測知朕乃至小
之稱因悟并字从火又从升之說升音拱人竦兩手也
火至熱之物而人敢以兩手拱之此必火之至小者其
音似當與朕同古人自稱曰朕蓋謙居渺末之辭猶曰
寡人曰小子云耳非趙高言幾不識朕字本義誰謂六
書不可以意道哉逝也鄭云女無輕易於教令無曰
苟且如是今人無持我舌者而自聽恣也教令一往行
于下其過誤可得而已之乎孔云往則不可復改故時
須慎之雌爾雅云匹也說文云猶磨也从言又从隹雙
鳥為雌匹之義也孔云匹敵相報也愚按易云出其言
善則千里之外應之大學云言悖而出者亦悖而入善

悖之報皆如其所施非相匹而何德指言之根乎德者
即下文所謂惠是也無言不讎兼善惡而汎論之無德
不報則專指言之善者惠于朋友庶民三句正承此一
句而言前用戒此下則用勸也惠鄭云順也朋友謂羣
臣與假樂篇義同有德之言據理而發自然順于人心
故不獨同朝之羣臣皆以為然轉屬而下至于庶民亦
莫不以為然也小子武公自謂也使人誦于己側為命
己之辭謙卑之至也小子之子孫謂繼世而為君者繩
說文云索也繩繩嚴云如繩之牽連不絕萬民即上文
之庶民承說文云奉也受也小子子孫繩繩者謂其善
言可以為後世無窮之法則萬民靡不承謂言出而人
無不尊奉之正上文所謂無德不報也君者出令臣者
行君之令而致之民故靡不承
但以庶民言而不及朋友焉
視豐本作眎爾友君子輯

柔爾顏

叶真韻魚巾翻
叶先韻倪堅翻亦

不遐有愆

先韻亦叶真韻乞
鄰翻歐陽以無言

至此為相去聲在爾室尚不愧陸本作媿于屋漏宥韻無曰不顯

莫予云覲宥韻神之格陌韻亦叶藥韻葛鶴翻思不可度叶陌韻亦叶格翻亦叶

藥韻連思矧可射叶藥韻夷益翻亦思諸本以視爾至

陽以相在至辟爾為德俾臧俾嘉叶歌韻淑慎爾止不

愆禮記作讐于儀叶歌韻不僭不賊職韻鮮不為則職韻歐陽

此為第九章賦也此章言敬爾威儀之事視猶云交接也友即上章朋友爾友君子謂爾所友之君子指士

大夫也輯說文以為車和輯也調和之意柔與第四章柔嘉義同謙卑之意顏說文云眉目之間也不過有愆

問辭也不過言近也愆說文云過也主威儀言不敬則愆矣言爾當交接諸君子之時必和柔其顏色以質證

于君子曰吾之舉動得無有未遠于過差者乎然威儀之所以敬全本于心故下文又以謹獨之事言之正抑抑之所從出非徒簡束其外已也相省視也尚庶幾也愧慚也俱見說文爾雅云西北隅謂之屋漏李氏云曾子問謂之當室之白孫炎云當室之白日光所漏入也舍人云古者徹屋西北隅以炊浴沒者訖而復之故謂之屋漏言爾自視獨居在室之時雖未與君子相接其敬與否人不得而知之然室有屋漏光斯入焉庶幾求不愧之可也中庸云君子之所不可及者其惟人之所不見乎因引此詩而足之曰故君子不動而敬不言而信薛應旂云屋漏非身之所處乃心之所存心曲隱微之中自家照自家慚阻畧無所容如何可愧下文特把神明來形容不可愧之意非是為鬼神而求其不愧也無通作毋無曰者戒辭也不顯莫予云觀六字相貫觀說文云遇見也格通作假說文云至也度猶量也矧說文云况也从矢从引取詞之所之如矢也射通作穀說

文云鮮也三思皆語辭爾無以屋漏為不顯之地而人莫我見也當室之白則非不顯矣且人縱不見而神則無不體神之往來不可測度不顯亦臨何如可畏況可自解散其精神而不敬乎謝枋得云莊子曰為不善于顯明之中者人得而非之為不善于幽暗之中者鬼神得而責之君子無人非無鬼責亦此意也真德秀云人之常情祇敬于羣居者易淵蝸蟻伏之地無法家拂士之在側有近習褻御之旁環而能凜然自持不愧屋漏者雖明主猶或難之故武公自謂無曰此非顯明之地而莫予見也當知鬼神之妙無物不體可有厭黷之意乎子思作中庸推明其說曰微之顯誠之不可揜也嗚呼武公其聖賢之徒與辟爾為德以下復舉敬威儀之效驗以勸勉之與上章惠于朋友庶民三句對看辟說文云法也法爾為德於威儀上徵之威儀其可見者德其不可見者觀其威儀則可以知其德矣首章所云德隅次章所云德行意正如此俾使臧善嘉美也言臧又

欽定四庫全書

卷十九之上

言嘉猶云盡善盡美也下文淑慎二句正所以使之藏
嘉者淑通作淑說文云善也止者心之所止與虞書安
汝止商書欽厥止同義善其所止澄然粹白無妄念之
參謹其所止亶然惺存無一刻之懈此申上相在爾室
七句而言乃不愆于儀之本領處武公之學至是亦可
謂深矣不愆以工夫言不使其有愆也舍威言儀者凡
動容可象者皆謂之儀威亦儀也觀古人以經禮為禮
儀以曲禮為威儀可見又禮記緇衣篇子曰王言如絲
其出如綸王言如綸其出如綍故大人不倡游言可言
也不可行君子弗言也可行也不可言君子弗行也則
民言不危行而行不危言矣詩云淑慎爾止不譽于儀
按此似與詩意相遠僭說文云假也毛云差也愚按有
所假借則失其當然之則而至于差矣二義俱通賊朱
子云害也鮮通作匙說文云少也則法也季本云僭則
有愆而害德不足以為民則矣此申前章敬慎威儀維
民之則意又左僖九年公孫枝曰維則定國詩曰不識

不知順帝之則文王之謂也又曰不僭不賊鮮不為則
無好無惡不忌不克之謂也昭元年會于訖趙文子曰
武將信以為本循而行之譬如農夫是糖是莖雖有饑
饉必有豐年且吾聞之能信不為人下吾未能也詩曰
不僭不賊鮮不為則信也能為人則貴而敬之不肖者
子云仁者必敬人敬人有道賢者則貴而敬之不肖者
則踈而敬之其敬一也其情二也若夫忠信端慤而不
害傷則無接而不然是仁人之質也忠信以為質端慤
以為統禮義以為文倫類以為理喘而言騰而動而一
可以為法則詩曰不僭不賊鮮不為則此之謂也以上
皆借辭立義
非詩本旨
投我以桃報之以李紙韻彼童而角實虹

小子

紙韻諸本以此為第八章

荏染柔木言緡之絲支韻

溫溫恭

陸本人維德之基

支韻歐陽以此為第十章

其維哲人

叶先韻如延翻

告之話

說文作詁

言順德之行

叶先韻胡千翻

其維愚人覆謂我僭

叶侵韻千尋翻

民各有心

侵韻諸本以荏染至此為第九章歐陽以其維哲人至此

為第十一

章

比而賦也此下皆教之以聽言也凡人有投我以桃者我必報之以李感其善意故也今人有

進美言于我者而我顧不思所以報之乎夫至聞言思報則其欣然嘉納絕無扞格可知矣舊說以為承上文

鮮不為則而喻上感下應之理果爾則當云投之以桃報我以李不宜云投我報之也彼童而角指當時少年

用事者即第三章所稱迷亂于政之人也童通作僮按說文童奴也僮幼也今文僮幼字作童童僕字作僮相

承失也下文以而角為言則此童乃指畜類之幼者猶易言童牛詩言童羖也角者堅剛之物故易云始其角

新進少年見事風生不知遠猶之所在不念明刑之當導但逞其意見恣為議論如戴角之牛羊遇物無所不

牴觸也然天下無童牛羊而有角者曰童而角則更可
異矣甚怪而賤之辭也虹毛云漬也嚴云謂幻惑也
如蚘蛛不正之氣暫見于天頃臾散滅也小子指武公
也孔云言而角以漬小子則是專恣之人能亂朝政者
也愚按武公自責而亦以諷王意正在此書曰聽德維
聰惟主聽不聰則貪小之言皆得起而潰亂之而於忠
直之言鮮不以為逆耳而見擯者故下文又反覆以虛
懷聽納之理告之荏染陸元朗云柔意鮮見巧言篇柔
木鄭云柔忍之木緇爾雅云綸也孔云綸則繩之別名
言緇之絲正謂以絲為繩被之于木有荏染然柔忍之
木是維可以為弓之幹我乃緇被之以絲則有弦而成
弓按考工記弓人為弓取幹之道七柘為上櫟次之栗
桑次之橘次之木瓜次之荆次之竹為下自柘至荆皆
所謂柔木也溫者和柔之意以氣象言恭者謙下之意
以存心言俱與下章盈字相反基說文云牆始也此以
柔之和木乃弓之材比溫恭之人乃德之基溫恭之所

以基德者正謂其能容受善言故其德日進于高大特
此尚未說出耳輔廣云人纔溫柔則便是消磨了那客
氣消磨得客氣則其德方可進故明道謂義理與客氣
常相勝只重消長分數為君子小人之別消盡者為大
賢而橫渠亦言學者先須去其客氣惟溫柔則可以進
學蔣惺生云人謙卑與順納諫受言則過而能改善言
日聞而可以為進德之基苟或剛懷自用則善言不聞
過不能改而終無以入德矣表記篇子曰恭近禮儉近
仁信近情敬讓以行此雖有過其不甚矣夫恭寡過情
可信儉易容也以此失之者不亦鮮乎詩云溫溫恭人
維德之基荀子云君子寬而不侵廉而不剋辨而不爭
察而不激寡立而不勝堅彊而不暴柔遠而不流恭敬
謹慎而容夫是之謂至文詩曰溫溫恭人維德之基此
之謂也又云君子耻不修不耻見汙耻不信不耻不見
信率道而行端然正已不為物傾側夫是之謂誠君子
詩云溫溫恭人維德之基此之謂也哲人愚人與首章

相應陸化熙云明繇虛生恭人即哲人也話爾雅說文皆云善言也順德指話言說德者人心同得之理言之善者必與德相合哲人於人所告之話言知其順乎德即從而行之無留難也劉向新序云葉公諸梁問樂王鮒曰晉大夫趙文子為人何若對曰好學而受規諫葉公曰疑未盡之矣對曰好學智也受規諫仁也江出汶山其源若甕口至楚國其廣十里無他故其下流多也人而好學受規諫宜哉其立也詩曰其惟哲人告之話言順德之行此之謂也左襄二年齊姜薨初穆姜使擇美櫝以自為襯與頌琴季文子取以葬君子曰非禮也禮無所逆婦養姑者也虧姑以成婦逆莫大焉詩曰其惟哲人告之話言順德之行季氏於是為不哲矣杜預云言智者行事無不順按觀此足以識順德二字之義覆鄭云猶反也僭義見前其維愚人有如我告以順德之言彼必反以為假設之辭謂非實有此理也民各有心專承愚人說而致其慨嘆之意言人之度量相越如

哲人之心以善言為當受而愚人則不然其心之不同
有如此者泛就民說似推開一步而諷動之意愈深後
章放此陸云順行之哲人所以有哲人於音烏呼
之隅謂僭之愚人所以成愚人之疾

後小子

韻紙

未知臧否

補叶紙韻

匪手之攜言示之事

韻叶紙

同

韻叶紙

里翻匪面命之言提其耳

韻紙

借

作漢書

曰未知亦既抱子

見上

民之靡盈

庚韻

誰夙知而莫

音暮陸

成

庚韻

諸本以此章為第十章歐陽以

為第十二章

賦也

為鳥也乎通作呼於乎歎聲如鳥之吁呼也此章蓋追其昔日而責之若曰女之不肯

受言自少時而已然矣未知臧否猶俗人言不識好醜

指其年幼未有知識之時也手攜四語皆昔日事匪通
作非言不但也攜說文云提也鄭云掣也提本訓挈焦
竑云此提當音抵言附耳以教之也禮少儀牛羊之肺

離而不提心史記薄后以冒絮提文帝漢書景帝以博局提殺吳太子楊雄酒箴身提黃泉皆作抵音若平聲讀當作揪扯之義不如前說為雅鄒忠盾云此解甚精且於匪面命意闕切淮南子有云握火提人反先之熱亦是義也嚴云曲禮云長者與之提攜則兩手奉長者之手負劔辟咥詔之注謂傾頭與語又云口耳之間曰咥是攜手提耳皆長者教誥小子之常也手攜既指點其大槩矣又嫌其踈畧且隨事而為之指示面命既啓迪之無餘矣又慮其忽忘且附耳而加之儆惺我之所誨爾者一日如是日日亦如是可謂勤矣假設爾猶曰未有所知則韶華不待爾亦既忽然抱子為人父矣斯時年已長大非復未知臧否之時也而顧猶然懵懵耶靡之言無也盈滿夙早也莫毛云晚也成說文云就也凡汝所以懵懵如斯者坐繇盈滿為累以中堅成外拒不能受人言耳假使凡民而皆能除去盈滿之念虛懷聽納則其早歲必有所知以成就其德宣俟晚年而

後成就耶知與成相因惟風之不知則不能無待于晚
成矣吾之所懊恨于爾之昔日者如此陸燧云知則必
成夙知則必夙成聽言始能夙知不聽言必
滿之為害耳民泛言是論從來道理如此
昊天孔

昭叶藥韻元若翻我生靡樂叶藥韻歷各翻視豐

作爾夢夢我心慘慘叶藥韻七各翻大金云當作誨爾

諄諄雅陸本俱作訕訕聽我中論藐藐叶效韻匪用為

教韻效覆用為虐藥借曰未知亦聿既耄叶藥韻慕各翻

第十一章歐陽以為第十三章賦也上章以晚成為
言則當其抱子之時雖曰未知猶冀其末路有知之日
及今年已老大而其未知者猶故也故此章特據今日
之所見者而切責之昊天孔昭遙應前皇天非尚言元

氣皓肝謂之昊天天道虧盈益謙其理甚明故曰孔昭
我生靡樂託為誦詩者自警之語謂我生無日非恐得
罪于天之日不見有可逸樂也凡人忽于修德者其病
只在樂之一字故言此以深惕之亦與前樂從句相應
夢猶今人言醉生夢死者視爾夢夢即前所稱顛覆厥
德一段正與靡樂相反夫然故我心慘慘然為之憂也
慘當作慄慘訓毒慄訓愁二義相近特作慄則於韻為
叶耳誨說文云曉教也諄說文云曉教之熟也誨爾諄
諄從我心慘慘來惟憂之深故誨之切通以上所言者
皆是藐適作邈說文云遠也聽我藐藐於我所言汎汎
置之不相闕切也匪通作非虐猶苦也不以我之諄諄
為意欲曉教之反以我言太多為將欲煩苦之也韋通
作吹說文云詮辭也曲禮云八十九十曰耄借曰爾此
時尚猶然未知臧否如前則年亦已踰耄矣將待何時
而後能知乎然則向所冀晚成者竟終于無成已耶左
史謂衛武公作詩自警在年九十有五之時於既耄句

見可於乎小子告爾舊止紙韻豐聽用我謀庶無大悔

叶紙韻天方艱豐本難曰韓詩喪去聲厥國職韻取譬列女

辟不遠昊天不忒職韻田適其德俾民大棘職韻諸本以

二章歐陽以為第十四章賦也舊久也言我之告爾

非一日也止語辭我謀即前所言者勸脩德正所以計

保國也大悔指喪國言此厥不聽將有敗亡之禍彼時

悔之亦無及矣曰庶無者望之也方者近今之辭天步

近方艱難亦既有喪國之禍矣指幽王驪山之事也譬

說文云喻也徐云猶匹也匹而論之也取譬即前喪國

之譬其事甚近言無多日欲其以幽王為戒也愚指此

詩謂兼諷平王者於此可見忒說文云更也毛云變也

天道終古不變有德者興無德者亡也此亦與孔昭句

相應但孔昭以理言不忒以效言回轉也適回避也俱

見說文回轉而避于正道即是自盈滿不聽用我謀不
修政令不謹威儀而迷亂顛覆意棘通作韃說文云急
也字从草亟聲徐云求物之急莫若草大棘鄭云大困
急也以不修德之故而使民至于大困急則國之喪亡
無日矣總是反覆望其聽言之意黃佐云是詩也雖古
聖賢之檢身亦不過是而衛武公乃能身體而力行之
至使人直呼為小子而無一毫自恃自高之意其亦有
得于切磋琢磨之力而然與鄧云篇中精言類臯謨質
言類說命深言為學庸源乃諄恒似周文
公書金錫圭璧故君子兢兢三復終身焉

抑

國語作懿子貢傳
申培說俱作懿戒

十章二章章八句三章章十

句一章章十一句二章章十三句一章章十四句

一章章十六句

諸本皆作十二章三章章八句九
章章十句歐陽脩云舊分斷章句

皆失其本既害詩義不可以不正也詩句無長短之限短或一二言長至八九言取其意足矣分爲十四章四章章六句一章章七句四章章八句一章章九句三章章十句一章章十一句今皆不從序云衛武公刺厲王亦以自儆也朱子云此詩之序有得有失蓋其本例以爲非美非刺則詩無所爲而作又見此詩之次適出于宣王之前故直以爲刺厲王之詩又以國語有左史之言故又以爲亦以自儆以詩考之則其曰刺厲王者失之而曰自警者得之也夫曰刺厲王之所以爲失者史記武公即位於宣王之三十六年不與厲王同時一也詩以小子目其君而爾汝之無人臣之禮與其所謂敬威儀慎出話者自相背戾二也厲王無道貪虐爲甚詩不以此箴其膏肓而徒以威儀詞令爲諄切之戒緩急失宜三也詩詞倨慢雖仁厚之君有所不能容者厲王之暴何以堪之四也或

以史記之年不合而以爲追刺者則詩所謂聽用
我謀庶無大悔非所以望于既往之人五也曰自
警之所以爲得者國語左史之言一也詩曰謹爾
侯度二也又曰曰喪厥國三也又曰亦聿既耄四
也詩意所指與淇澳所美賓筵所悔相表裏五也
二說之得失其佐驗明白如此必去其失而取其
得然後此詩之義明歐陽云鄭於蕩謂召穆公畏
王監謗不敢斥言王而遠引殷商於抑則以小子
皆爲斥王何前後之不類也召穆衛武皆厲王時
人不宜相戾如此臣斥其君爲小子義亦難安也
今徧考詩書稱小子者多矣皆王自稱爲謙損自
卑之言也未見臣呼其君爲小子者也書曰小子
封小子胡君命其臣可也周公呼成王爲孺子者
成王幼周公屬親而尊其語或然其曰公將不利
於孺子者蓋言成王之幼疑周公害之猶言孤兒
耳理亦通也衛武公於厲王非如周公之尊親而

厲為暴虐之長王斥以小子而乳臭待之理必不然况考詩義亦非也嚴云或又以為武公老作此詩故呼其同寮為小子武公學問深粹謙抑自處年九十有五猶求益于其國之臣若哆然以老成自處而呼王朝同寮為小子不似武公之氣象也愚按武公為諸侯實在宣幽平三王之世是詩既非所以刺宣而篇中有既耄之語計其年歲亦非當幽之時况武公入為王卿士乃在東遷之後則是詩為平王而作無可疑者其惓惓忠君之意欲顯語之不能故託之自儆耳篇末言曰喪厥國正指驪山往事而言國乃天下之通稱朱但以為侯國而引此語為自警之證亦非也或引左襄四年魯人之歌云我君小子然彼稱幼君為小子乃私刺之辭而又有引天保卷阿之詩謂古人亦爾其君則美惡原不同文在彼為親而在此為賤據斯為解其迂甚矣申培說謂衛武公自警兼訓國人

訓國人之說尤為無謂子貢傳
但存衛武二字而其餘闕文

淇奥衛人美武公之德也

出朱傳 申培說以為美

公好學明德國人美之徐幹中論云昔衛武公年過九十猶夙夜不怠思聞訓道命其羣臣曰無謂我老耄而舍我必朝夕交戒又作抑詩以自儆也衛人誦其德為賦淇奥序云淇奥美武公之德也有文章又能聽其規諫以禮自防故能入相于周美而作是詩也數說皆相為出入孔叢子載孔子曰於淇奥見學之可以為君子也

瞻彼淇奥

大學孔叢子子貢傳皆作澳

綠

爾雅大學陸璣疏豐氏本俱作藁

竹

韓詩石經

豐本俱作薄下同

猗猗

叶歌韻於何翻陸璣疏作猗猗

有匪

大學釋文豐本俱作斐下同韓詩作

邛云豐本君子如切作屑如磋歌韻如琢豐如磨叶歌韻眉

本作摩豐本瑟豐本今倭倜倭今倭赫倭今倭咍倭阮韻亦叶元韻許元翻

詩作宣說文作愴分有匪列女傳君子終不可諼元韻亦叶阮

學列女傳今興也淇衛水也鮮見泉水篇與通作澳說

豐本作諠今興也淇衛水也其內曰澳其外曰隈爾雅作

隕李巡云厓內近水為隕是也又艸木疏云與亦水名

水經注云美溝水東南注淇水博物志謂之與水流入

于淇並存之綠色也竹艸屬戴凱之云謂竹是艸不應

稱竹竹是一族之總名一形之偏稱也植物之中有艸

木竹猶動品之中有魚鳥獸也又云根深耐寒茂被淇

苑班彪志云淇園衛地殷紂竹箭園也漢志武帝塞瓠

子決河薪柴少乃下淇園之竹以為捷又寇恂傳伐淇園

之竹為矢百餘萬則淇上多竹在漢世猶然矣詩故云

河朔無竹淇澳獨產興武公特稟異氣而生也又陸璣
云綠竹一州名其莖葉似竹青綠色高五六尺今淇澳
傍生此人謂此為綠竹未知是否猗通作倚季本云猗
與依同倚也互相依倚則不摧折而得以成其美以興
工夫之夾持也匪斐通考工記曰且其匪色必似鳴矣
匪者有文章之謂也君子指武公切說文云刊也磋廣
韻云磨治象牙也按說文無磋字當通作𦵏𦵏者齒不
齊之名蓋以器之有齒者磨之使光朱子謂磋以𦵏齒
是也琢者治玉器加功而成之名磨治石也按爾雅云
象謂之鵠角謂之𦵏犀謂之剡木謂之剡玉謂之雕金
謂之鏤木謂之刻骨謂之切象謂之磋王謂之琢石謂
之磨象言鵠又言磋玉言雕又言琢者爾雅疏云鵠𦵏
剡劇雕皆物未成而治其璞也鏤刻切磋琢磨皆物之
已成而復治之也朱子謂治骨角者既切復磋治玉石
者既琢復磨似無據郭璞云骨角須切磋而為器人須
學問以成德玉石之被琢磨猶人自修飾也又荀子云

人之於文學也猶玉之於琢磨也詩曰如切如磋如琢如磨謂學問也和之璧井里之厥也玉人琢之為天子寶愚按武公之學脩如楚倚相所云在與有旅賁之規位宁有官師之典倚几有誦訓之諫居處有贊御之箴臨事有瞽史之道宴居有師工之誦皆切磋琢磨之實此就成德後敘述故以四如言亦狀其有匪之象如此耳論語子貢曰貧而無諂富而無驕何如子曰可也未若貧而樂富而好禮者也子貢曰詩云如切如磋如琢如磨其斯之謂與子曰賜也始可與言詩已矣告諸往而知來者蓋樂與好禮原非二事惟有切磋琢磨之工夫者則皆能之觀武公之充耳會弁是其好禮也寬綽戲謔是其樂也豈徒借此以馭貧富哉此孔子所謂知來者也瑟續密也按瑟二十五絃其絃甚密故訓瑟為密個說文云武貌按荀子陋者俄且個釋之者引晉魏之間謂猛為個左傳個然授兵登陴皆武意也武公賁性嚴武故謚曰武觀此可見赫明威貌字从二赤言火

盛也。咍殷敬順云：寬綽貌。張氏家誨云：汗綽貌。按說文：朝鮮謂兒泣不止曰咍，亦綽意也。瑟，憊憊赫咍俱以德容言。諼，爾雅云：忘也。曰終不可諼者，猶言到底如此，非沒世之謂是義也。大學傳言之詳矣。如切如磋者，道學也；如琢如磨者，自修也。瑟兮，憊兮者，恂慄也；赫兮，喧兮者，威儀也。有斐君子，終不可諼兮者，道盛德至善，民之不能忘也。然玩此詩三章，皆以匪之一字為言，還是就德容上想，象意居多。左昭二年：韓宣子聘于衛，衛侯享之，北宮文子賦淇澳。瞻彼淇奧，綠竹青青。有匪君子，克耳琇瑩。

君子克耳琇瑩

說文作琇瑩，豐本作秀。

瑩

叶青韻，戶局翻。

會

說文作會，體云骨摘之可會髮。

弁

瞻彼淇奧綠

豐本作葉下同

竹青青

韻釋文作菁菁

有匪

如星

青韻

瑟兮憊兮

赫兮咍兮

見前

有匪君子終不可諼

見前

兮

興也。青青者青而又青，堅剛之貌。陸佃云：竹之初生，其色綠，長則轉而青矣。宋熙寧中，太子右贊善大夫

吳安度召試舍人院賦入第三等論入第四等止綠竹
青青詩不依註解作王葛篇竹遂定入第五等因是改
一官放罷宰臣富弼言切詳安度命意必謂王葛篇竹
柔脆常艸不足以詠武公之德又按史記河渠書云淇
園之竹則知淇與之竹祇是竹箭之竹也又按陸德明
釋文青音菁茂盛之貌於理甚通未為不識題意乞再
取安度所試下學士院看詳於是賜安度進士出身程
大昌云漢世下淇園之竹為楫又詩籊籊竹竿以釣于
淇衛竹大可以為河楫而其竿之長可以垂釣則其不
為王葛之艸亦已明矣克耳瑱也惟服冕旒時有之若
皮弁以下不得有克耳按周禮弁師職云掌王之五冕
皆玄冕朱裏延紐五采纁十有二就皆玉采玉十有二
玉弁朱紱諸侯之纁旒几就瑤玉三采其餘如王之事
纁旒皆就玉瑱玉弁王之皮弁會五采玉璫象邸玉弁
注謂王之冕不言玉瑱於諸侯言之者以互見為義又
王之皮弁不言玉瑱可知瑱惟服冕時有之矣琇釋文

云石之次玉者毛傳云天子玉璫諸侯以石蓋據此文
為說按說文無璫字當通作秀禾實也禾有實則其象
下垂克耳之形亦如之故都人篇亦曰克耳璫實也璫
潔也說文云玉色引逸論語曰如玉之璫會弁如星者
鄭云會謂弁之縫中飾之以玉皤皤而處狀似星也弁
皮弁也按周禮注皮弁以皮六方縫之會其合縫處每
貫結五采玉以為飾五采玉者五色之王琢為珠貫之
如冕旒之數其名曰璫通作綦即此詩會弁如星及其
弁伊綦是也天子璫飾十二玉五采侯伯璫飾七子男
璫飾五璫玉三采璫石似玉者不以玉三采注謂朱白
蒼也不以五皆如其冕旒七就五就之數天子諸侯皆
服皮弁以視朝禮在朝君臣同服時武公入相于周則
亦在王朝之服也詩人瞻望丰儀肅然讚歎以行之堅
剛興其服飾之崇嚴正抑詩所云抑抑威儀惟德之隅
敬慎威儀惟民之則者上章所咏瑟僖赫
赫桓之氣象于斯倍為盛溢故申詠之

瞻彼淇輿綠

竹如簣

陌韻亦叶錫韻則歷翻韓詩作簣字

有匪君子

如金如錫

韻亦叶陌韻思積翻

如圭如璧

陌韻寬兮綽兮

猗猗

豐本作倚

重

平聲

較兮善戲謔

藥韻

兮不為虐

藥韻

兮

興也擅弓注云簣謂床第即床棧也

竹之疎密得宜似之陸佃云曰如簣則又以明其為竹矣凌濛初云簣竹所為也即以既比之竹形容在林之竹巧于取喻萬時華云猗猗興其進修青青興其尊嚴如簣興其成就然言有次第意無淺深按爾雅云葦王芻竹篇蓄舊說以為即綠竹也讀至如簣之句而始悟其不倫王芻篇蓄安能如簣則綠竹之是竹非艸無可疑者金黃金也錫說文云銀鉛之間也徐鍇云銀色而鉛質也顧起元云攻金之工如築冶龜巢段桃以金工料言之宜用銅鐵等物為多特總名曰金錫以分六齊六分其金而錫居一為鍾鼎之齊五分其金而錫居一

為斧斤之齊四分其金而錫居一為戈戟之齊三分其金而錫居一為大刀之齊五分其金而錫居二為削殺夫之齊金錫半為鑑燧之齊使如今時所謂錫則豈堪為斧斤戈戟矢刃哉巢氏改煎金錫定火候以青黃黑白之氣而使以鑄量使如今時所謂錫則豈能聲中黃鐘之宮哉觀史記平準書及漢食貨志亟稱銀錫漢武帝造銀錫為白金可以見古者銀與錫通稱白金考工先秦古書當以錫為銀鉛之總名說文謂錫曰銀鉛之間稍近古意徐氏不察考工金錫之說殊失許叔重本旨周禮卅人職金皆言金玉錫石蓋銅鐵銀錫皆取升煉成言錫而不必枚舉銅銀鐵也嘗歎漢儒拘爾雅之文於升人之注直以錫為銅鉛爾雅專以銀為白金不思漢時固以錫為白金其注錄銀鈹金名物瑣細而於考工金錫之義乃無所發明曾不若說文能合銀鉛以言錫也職方氏於揚州言金錫荊州言銀以今出產之地言之則銀在揚而錫在荊錫亦銀也特以荊揚地利

互文見之爾若如今人分別銀錫則考工所謂金錫於理有不通者故著其說使讀考工記者無惑焉今世用物銅鐵為多經文絕少言銅亦罕言銀鐵考工言金者銅鐵在其中言錫者銀鉛在其中合而言之總曰金錫爾聞決銀者言錫能賊他金似不宜混合然物各有用攻金之工不一銅鐵及鋤銅得錫愈佳鑄銅得鉛益骨金錫相湏尚矣圭瑞玉也其製上圓下方璧亦瑞玉其製外圓內方如金如錫言其從革之隨宜從容中道也如圭如璧言其方圓之不毗周旋中禮也綠竹挺于淇濱其疎密得宜象亦如此故因以起興寬者屋寬大之義故因訓為大綽說文云緩也倚通作倚說文云依也孔穎達云周禮與人注曰較兩轡上出軾者今謂之平較但周禮無重較單較之文楊慎云轡是兩邊植木較橫轡上轡兩而較一說文作較通作較云車轡上曲銅也蓋較在軾上恐其墜故以曲銅闕之古謂較為車耳故諺云仕宦不止車生耳三國志吳童謠云黃金車斑

蘭耳聞閭門見天子符曲銅之說矣晉崔豹云重耳古重較也文官青耳武官赤耳或曰重較在軍車藩上重起如牛角故云重較耳呂和叔云古者車箱長四尺四寸三分前一後二橫一木下去車牀三尺三寸謂之軾又于軾上二尺二寸橫一木謂之較去車牀凡五尺五寸古人立乘平常則憑較若應為敬則落手憑下軾而頭得俯又按補傳云較高五尺五寸軾高三尺三寸較既出于軾上故曰重較亦通車上之人致敬則憑軾間適則憑較故以目寬綽時馬戲通作摩即摩字以音同通用摩者用旌旗以指麾也人之舉止散誕象亦如之謔說文亦訓戲但字从言則當為戲言耳善戲謔兮者頤氣解言不立崖岸載色載笑與孔子莞爾之戲同陳傳良云古人肅肅不廢雍雍僮僮不廢祁祁有所拘者必有所縱也虐者戲謔之過必至任情凌物玩一善字已是中節特言不為虐以足之耳非二時事首言如切磋琢磨是何等工夫末言如金錫圭璧是何等造詣前

二章皆美其瑟憺赫喧此更美其寬綽戲謔卷舒張弛各得其宜是所以謂有匪也與徐光啓云有謂上二章末四句猶有英氣末章末四句則渾化無迹為武公漸進之益此說不是盛德容貌當敬而敬則瑟憺赫喧當和而和則為寬綽戲謔如孔子有時而踧踖色勃有時而申申天天豈有到寬綽戲謔時便不瑟憺赫喧乎詩人之言本自互見而不知者巧生意見便錯認詩意不可不察

淇奥三章章九句

嚴粲定為幽王時詩然以幽王之暴虐至于殺身武公于此畧

不見有庇君匡國之效何哉考世家武公四十二年犬戎殺幽王武公將兵佐周平戎甚有功平王命武公為公意必此時始入相耳徐幹中論謂此詩之作武公年九十作抑武之後而歐陽氏補圖屬之于平蓋有見矣

終南秦人美文公也始得岐周之地國人矜而祝之

按史記秦本紀云秦襄公以兵送周平王平王封襄公為諸侯賜之岐以西之地曰我無道侵奪我岐豐之地秦能攻逐戎即有其地與誓封爵之襄公於是始國與諸侯通使聘享之禮十二年伐戎至岐卒生文公文公十六年以兵伐戎戎敗走於是文公遂收周餘民有之地至岐岐以東獻之周以竹書攷之事在平王十八年襄公雖受岐西之賜于周而未能有其地至文公始大敗戎師而後取之此詩以終南入咏當在文公時孔穎達云本紀謂文公收周地至岐岐以東獻之周按終南之山在岐之東南則亦得岐東非惟自岐以西也

終南何有有條

釋文有條

有梅

叶支韻莫悲翻豐氏本作某

君子至止錦

衣狐裘

叶支韻渠之翻豐本作求

顏如渥丹

韓詩作汭云赭也外傳作赭

其君也

哉

叶支韻將其翻興也終南山名即中條山在今陝西西安府或謂一名太乙非也按太乙在終南之南

嚴粲云周都豐鎬面對終南平王以岐西之地其名山莫如終南舉終南則可以該岐西北鄒忠肅云九州之險終南居一焉其地據天之中在都之南連岡乎嶠冢西至于褒斜又西至于隴首以臨于戎東至于商顏又東至于太華以拒于闕抱杜含鄠欽豐吐鎬爰有藍田珍玉是之自出班固所謂華實之毛則上腴防禦之阻則奧區實能作固以屏王室平王一旦捐以畀秦秦得百二竇始基之而周則自失其險矣條陸璣以為楸今山楸也皮葉白色亦白材理好宜為車板宜陽共北山多有之按爾雅云楸山楸又云楸條是則山楸名楸條白名楸無緣以楸為條也然以條為楸亦未足信列子曰吳楚之國有大木焉其名為楸食其

皮汁已憤厥之疾齊州珍之渡淮而北而化為枳也故
曰橘柚有鄉崔蒲有叢又曰橘柚凋于北徙若榴鬱于
東移也據此柚不北徙則終南不宜有之矣梅爾雅說
文皆云柟也孫炎云荊州曰梅楊州曰柟按梅柟異木
何得相混柟木似豫章陳文帝嘗出柟木造戰艦即此
柟也梅似杏古者用以和羹然陸佃有云梅至北方多
變而成杏故北人有不識梅者是則亦非終南所宜有
矣愚意此梅但當通作枚與汝墳篇條枚義同條自榦
而出興丈公之為諸侯枚自條而出則以興丈公之羣
臣也章末其君也哉言使羣臣共戴之為君正興意歸
結處君子指丈公也至止者鄭玄云受命服于天子而
來也錢天錫云至止句最重言逐戎之後奄有岐豐八
百里之地而終南為秦鎮也此不比游觀覽勝看玉藻
云錦衣狐裘諸侯之服也又云君衣狐白裘錦衣以裼
之君子狐青裘豹裘玄緇衣以裼之陳皓云古人之衣
近體有袍襍之屬其外有裘夏月則衣葛或裘或葛其

上皆有褐衣褐衣上有襲衣襲衣之上有常著之服則皮弁服及深衣之屬是也孔隸達云君衣狐白毛之裘則以素錦為衣覆之使可褐也袒而有衣曰褐必覆之者裘襲也陳祥道云古者行禮之裘必以羔與麋燕居之裘必以狐與貉狐白為人君之服所以象德之成狐青而下為君子之服所以象仁之發言君子之服則大夫士同之也夫天下無粹白之狐而有粹白之裘則狐白裘天下之尤難得者也士不衣狐白裘不特以其德之未成也蓋亦不敢以賤服貴歟渥說文云霑也毛云厚漬也丹說文云巴越之赤石也鄭云顏色如厚漬之丹言赤而澤也一說凌濛初云渥丹花名似鹿蔥而小色甚紅見仙經又名華丹見抱朴子此言如正喻其顏之紅也程良孺云今其種不一有散丹有捲丹其君也哉蘇轍云嚴憚之辭也韓嬰云上之人所遇色為先聲音次之事情行為後故望而宜為人君者容也近而可信者色也發而中者言也文而可觀者行也故君子容色

天下儀象而望之不暇言而宜人為人君者詩曰顏如
渥赭其君也哉蔡汝南云秦人之稱其君曰其君也哉
而生其矜心周書則曰孺子王矣而生其懼心敬肆之
所以闕乎盛衰也黃佐云終南者周之故都也東遷而
王轍不西矣蓋復周公之宇魯人所以願僖公而鄭伯
以璧假許田春秋譏之終南入秦周欲不亡得乎又蘇
轍云終南有草木以自衣被而成其深君子則有終
服章以自嚴飾而成其尊愚按此說于興意亦近

南何有有紀

釋文崔靈恩集註
初學記俱作此

有堂

陽韻

君子至止黻衣

繡裳

陽韻

佩玉將將

叶陽韻資良翻
中論作鏘鏘

壽考不忘

陽韻毛詩
作止興

也紀通作紀毛傳云基也謂山基也解見陟岵篇又崔
靈恩云終南之旁有岷山今未詳其處堂朱子云山之
寬平處也按爾雅云山如堂曰密郭璞以為形如堂室
者尸子謂松柏之鼠不知堂密之有美樅是也毛傳誤

因爾雅有畢堂牆之句遂解云畢道平如堂今考畢即周公葬畢之畢以為終南之道名是矣但既謂其平如堂則爾雅又不應即以畢為堂牆也愚意凡厓岸如堂牆之形者名之為畢原與畢道無涉上章咏有條有梅取有君有臣之義以興文公之能為人君此章咏有紀有堂亦猶祝如山如阜如岡如陵之意以興下文之壽考不忘也黻有二義考工記及說文皆以為黑與青相次韋孟詩註云畫為亞古弗字增韻云為兩已相背形周禮注云黻取臣民背惡向善亦取君臣有合離之義去就之理孔云鄭於周禮之注差次章色黻皆在裳言黻衣者衣大名與繡裳異其文耳愚按九章盡于黻故以黻該之黻衣繡裳猶云此有黻之衣其繡之則在裳也以五采刺文謂之繡以黑青兩色繡為兩已相背則名黻須兼此兩義始全衣之章用繪裳之章用繡故云繡裳佩玉見非三命黜珩之舊玉藻云天子佩白玉公侯

佩山玄王大夫佩水蒼玉世子佩璫玉是佩各不同也將通作殤說文云玉聲也壽考不忘祝願之辭欲其居此位服此服長久安寧不忘王命也呂祖謙云蘇氏謂周之失計未有如東遷之謬使平王定不遷之計收豐鎬之遺民以形勢臨諸侯齊晉雖大未敢貳也此論考之不精岐豐之地自犬戎盤據舊都非周所有故平王遂以賜襄公使之自取其勢非可以不遷也金履祥云秦與戎世為不共戴天之讐勢不兩立其與戎力戰固亦為已不獨為王室也當時犬戎盤據岐豐之間平王不得不許秦秦亦不得不取之然西戎方熾父子力戰二十一年而始得之固不暇東畧矣危言云世儒多咎周平王不宜以岐周之地予秦宜自取之竊謂不然夫大戎之力足以弑幽王取宗周則亦非一二諸侯之所能制也且召犬戎者申侯也立平王者申侯也平王能背申侯以令諸侯乎申侯能率諸侯以攻犬戎乎惟犬戎於秦為世讐而其地相近故不得不賜之岐西而與

之誓曰能逐犬戎即有其地是藉手于秦以報其讐而償利於秦以動其心地之與秦猶愈于犬戎平王此舉未甚失也鄒忠肅云秦能以一國取之王獨不能率諸侯取之乎竟使千年堂構一旦瓦解周人方悲其離秦而秦人且侈其條梅代興之兆於是見矣

終南二章章六句

朱子但以爲秦人美其君之辭而不著其世序謂戒襄公也能

取周地始爲諸侯受顯服大夫美之故作是詩以戒勸之子貢傳則云襄公克戎始取周地秦人矜之歐陽修謂自我侵岐豐周遂東遷雖以岐豐賜秦而終襄公之世不能取之但嘗一以兵至岐至文公始逐戎而取岐豐之地據此則是詩爲咏文公非咏襄公明矣若申培說以爲襄公初爲諸侯秦人祝之而作則詩之發首即以終南何有爲言自是誇其得地非但美其爲諸侯也

兼葭刺秦也未能用周禮將無以固其國焉

出序但原本秦

下有襄公二字今去之秦至襄公子文公始有岐
豐之地則此詩當屬之文公邾敬云周道親親尚賢
平易忠厚黜詐力而卑武功自文武至宣幽國于岐
豐民習先王禮教數百年矣平王東遷秦據有其地
始以攻戰為事刑殺為威其民愁居懾處思昔大和
景象不復可見東望河洛有游從宛在之思西視秦
邦有艱難牽率之苦文武成康之澤維係民心而秦
人慘礪之法束縛其手足自立國之初已然矣序所
以謂之將無以固其國蓋周之興也詩歌茁葭是春
和之明景也周禮行而忠厚篤祐開卜世有道之長
秦之興也詩歌兼葭是肅殺之蕭晨也周禮廢而強
梁腊毒兆二世撲滅之禍聖人刪定法戒昭然後儒
不達詆詩序為鑿空豈不誤乎

蒹葭蒼蒼

陽韻

白露為霜

陽韻

所謂伊人在水一方

陽韻

溯

爾雅

作汧說文作源豐氏本同下三邈如字

洄

豐本作回

從之道阻且長

陽韻

溯游從

之宛

釋文作苑

在水中中央

陽韻

璞云蒹葭之未秀者即今之蒹葭

葦之未秀者即今之蘆葦高數尺今人以為蒹葭因此為名也葭一名華至秋堅成謂之萑葦詩曰八月萑葦

莊子曰欲惡之孽為性萑葦蒹葭始萌以扶吾形尋擢吾性則明此幼曰蒹葭長曰萑葦矣又云萑荻也荻之

初生曰荻一曰蘆一曰離蒹葭其未秀者也按此則蒹自小至大有七名荻蘆離蒹葭荻萑也葭自小至大有四

名葭華蘆葦也二物共十一名覽者易混詳載于此蒼蒼深青色毛傳云盛也白露為霜者孔穎達云八月白

露節秋分八月中九月寒露節霜降九月中鄭玄云蒹葭

在衆艸之中蒼蒼然彊盛至白露凝戾為霜則成而

黃愚按露主敷施霜主刻制白露沉周霜以沉秦言時
值白露蒹葭之色尚蒼蒼然今也陰氣過盛露忽凝而
為霜則蒼蒼者將忽變而為黃矣以興岐豐之地今為
秦有秦變周道非復昔日忠厚德澤之舊也民何以堪
伊說文云从人从尹尹正也又云尹大治天下者所謂
伊人言追思昔日正治天下之人指文武也文王都豐
武王都鎬豐依澧水鎬依鎬水故以在水一方言之一
方解見汾沁篇以後章湄涘推之乃近水之地與下文
水中不同邇本作游說文云向也爾雅云逆流而上曰
邇洄順流而下曰邇游孫炎云逆渡者逆流也順渡者
順流也水道也增韻云山巖曰陰水隔曰阻宛說文
云屈草自覆也掩蔽而不能自達之意央說文云中央
也从大在口之內徐鍇云从大取其中正會意禮記集
解方氏云央以適當言之惟中乃可言央詩人設為立
此望彼之言云彼近水一方之地恍惚見伊人在焉必
逆水以求庶有登岸相見之期然其如目前之苦難何

若順水而求則愈趨愈下而伊人終不可得而見矣何者伊人所居原不在水而求之于水此必不得之數也嚴粲云遠方之俗不聞中國之禮義將使之逆流而上以往求攸濟歟則路險阻而且長遠喻其狃于功利以道為遠而難致必不能彊勉而行之也將使之順流以涉而聽其所止與則宛然惟在水之中央喻繇今之道無變今之俗終必亡而已矣道本非遠而秦人以為遠所謂安能邑邑以待數百十年而為帝王也故詩人因秦人之意以道阻且長言之又云周弱而繇秦彊而顛繇其禮之存亡異焉耳蘇轍云秦起于西垂與遠裔襟居本以彊兵富國為先而不知以禮義終成之故其後世狃于利而不知義至商君厲之以法卒以此勝天下既勝之後二世而亡其數有以取之矣

蒹葭淒淒

叶支韻此移翻石經豐氏本俱作萋萋

白露未晞

叶支韻讀如義虛宜翻

所謂伊人在水之湄

支韻豐氏本作蘼

溯洄從之道阻且躋

叶支韻讀如支章移翻釋文作齊

溯游從之宛在

水中坻

支韻尚盛也

興也

淒通作萋說文云艸盛也

言萋葭未晞鄭云未為霜孔云匪暘不

晞言見日則乾此篇上章言白露為霜則此言未晞謂未乾為霜與彼異蓋時當八月雖氣候早寒而露亦有

未盡凝為霜者以喻王澤之猶未熄也湄毛云水隙也爾雅說文皆云水草交為湄孔云謂水草交際之處水

之岸也釋名云湄眉也臨水如眉臨目也躋爾雅公羊皆云陞也逆流漸上與陞高同也坻水中地之畧高者

爾雅云小洲曰渚小渚曰沚小沚曰坻

蒹葭采采

叶紙韻此禮翻

白露未已

紙韻

所謂伊人在水之涘

紙韻

溯洄從之道阻且右

叶紙韻羽軌翻

溯

游從之宛在水中沚

紙韻

興也采說文云捋取也曰采采者非一辭也先言蒼蒼象其

色繼言淒淒美其盛至是則可以采矣然猶是八月之時故白露下方而未止也子貢曰文武之道未墜于地白露未已之況也渙厓也水濱之地言渚比一方為近言渙比渚又為近以況王道之近人也人病不求耳右者在我之右也初言道阻且長似蒞蒞未有窮期次言躋則道雖阻然已近在我之上更一躋而是耳此言右則道雖阻然已迫居我之右但一轉而是耳亦漸求而漸近之況也止釋名云止也可以止息其上言如狃于所趨必無見伊人之日初言在水中央或猶可以縱一葦凌蒞然而改途以求至焉過此遡游不已則登岸何從將有小于止之坻為之礙矣又將有大于坻之止為之礙矣是又愈隔而愈遠之況也詩言之婉而多風如此

蒹葭三章章八句

朱子謂此詩不知何所指而以序說為鑿夫不能虛心以求其

義則序說誠鑒也子貢傳申培說皆以為君子隱于川上秦人慕之于語意近似然詩人託物起興皆有深意存焉白露為霜白露未已語自有骨豈徒紀時而已乎序深得之但以為刺襄公則此詩乃刺文非刺襄也

黍離閔宗周也周大夫行役至于宗周過故宗廟宮

室盡為禾黍閔周室之顛覆犴狴不忍去而作是詩

也

出序朱傳從之按武王作邑于鎬京謂之宗周是為西都成王在豐欲宅維邑使召公先相宅以

庶殷攻位于洛汭在澗水東瀍水西既成謂之王城今河南是也是為東都召公既相宅周公又再卜瀍水東以居殷頑民謂之成周今維陽是也是為下都已而成王遷九鼎于維邑而復還歸處西都至十一

世幽王嬖褒姒生伯服廢申后太子宜臼奔申申侯
與犬戎攻宗周殺幽王于戲晉文侯鄭武公迎宜臼
于申而立之是為平王以亂故徙居東都王城及襄
公興兵討西戎救周乃以岐豐之地賜之秦遂有西
都宗周畿內八百里之地自平王東遷之後凡稱西
周者指豐鎬也稱東周者指東都也及威烈王而後
東都下都又分二周所謂西周則東
都河南也所謂東周則下都維陽也

彼黍離離

說文作
稿稿

彼稷之苗

蕭韻

行邁靡靡中心搖搖

蕭韻

爾雅作
慄慄

知我者謂我心憂

尤韻

不知我者謂我何求

尤韻
悠

悠蒼

釋文
作倉

天

先韻下叶真
韻汀因翻

此何人

真韻亦叶先
韻如延翻

哉

賦而
興也

彼彼宗廟宮室黍說文云禾屬而黏者也以大暑而種
故謂之黍本艸注云黍似粟而非粟也有二種米黏者

為秋可以釀酒不黏者為黍如稻之有秬糯耳羅願云
孔子曰黍可以為酒禾入水也然則又以禾入水三字
合而為黍家語孔子曰黍者五穀之長祭先王以為上
盛離乃鳥名當通作麗說文云艸木相附麗土而生重
言離離者謂衆黍分布相屬著也稷似黍而小黑色亦
謂之粟古謂之粱曲禮稷曰明粱是也亦謂之稭穆天
子傳赤鳥之人獻稭百載是也徐鉉云闕中謂之糜羅
願云冀州謂之纂凡艸之生于田者曰苗故字从艸从
田初生亦曰苗論語謂苗而不秀秀而不實蓋自苗而
秀而實是其序也孔云黍言離離稷言苗則是黍秀稷
未秀按出車謂黍稷方華則二物大時相類但以稷比
黍黍差為種故黍秀而稷苗也陸化熙云詩為閔故宗
廟宮室作而詩中不見一字直將彼字暗指而已此是
感慨最深處又程氏解彼黍者我后稷之苗也殊穿鑿
一說季本云宗廟宮室盡為禾黍以事理論之似不盡
然當時周雖東遷雖邑而岐周舊地已盡封秦假使故

欽定四庫全書

卷十九之上

宮為其所毀則都城之內宜為室廬乃以黍稷為言則當在野外之地而豈可語于城內哉且五穀者民之所資以養者也而稱其黍稷之盛則其民尤為勤力似有歎羨之意與言蔓草荆榛者不同矣其必秦得岐周之後務本力農周大夫出過其地而見之知秦地廣民勤將以富強雄天下而傷周室之不競乎亦通行邁以往來之人言邁說文云遠行也靡說文云披靡也徐鍇云披靡分也故於非取相違之義往者過來者續觀茲丘墟景象已習為故常但分道而馳畧無停步低徊之意所謂靡靡也搖搖者心憂而無所附著戰國策謂心搖搖如懸旌是也下文兩謂我正是靡靡情狀我見行者邁者之靡靡則中心益搖動而不能自己間有一二知者或亦謂此人必有所憂然其實非真知也其不知者怪我低徊不去謂我將何所求乎一腔隱痛向伊誰訴言下已有欲呼天之意矣鍾惺云知我者謂我心憂不知我者謂我何求蓋以黍離為固然而不復知此為何

地此詩之作為何錄矣那得不哭悠說文云憂也爾雅云思也蒼天以體言之尊而君之則稱皇天元氣廣大席稱昊天仁覆閔下則稱昊天自上降鑒則稱上天據遠視之蒼蒼然則稱蒼天孔云爾雅春為蒼天夏為昊天秋為昊天冬為上天謹按尚書堯典羲和以昊天總勅以四時故知昊天不獨春也左傳夏四月孔子卒稱曰昊天不弔非秋也六藝之中諸稱天者以情所求之耳非必于其時稱之浩浩昊天求天之博施蒼天蒼天求天之高明昊天不弔求天之生殺當其得宜上天同雲求天之所為當順其時也此之求天猶人之說事各從其主耳若察於是則堯命羲和欽若昊天孔子卒昊天不弔無可怪耳陸佃云詩于高遠難訴每稱蒼天巷伯之矜此勞人黃鳥之殲我良人皆是也又云爾雅于春言其色于夏言其氣于秋言其情于冬言其位相備也悠悠蒼天言我之憂思惟蒼天知之而已此何人哉不忍斥言蓋指平王也對彼言此謂此居東都之人也

舊說以為指幽王然幽王已成往事似不足言矣大夫之為此詩其有志于興復者乎謝枋得云能為閔周之詩者一行役大夫之外無人也不知平王而聞此詩也亦有惻于中否乎吾觀書至文侯之命知平王之不足有為矣所以訓戒晉文侯者惟曰自保其國而已王室之盛衰故都之興廢悉置度外吾于黍離之詩重有感夫蘇軾云周之失計未有如東遷之謬也自平王至于亡非有大無道者也顓王之神聖諸侯服享然終以不振則東遷之過也昔武王克商遷九鼎于洛邑成王周公復增營之周公既沒蓋君陳畢公更居焉以重王室而已非有意于遷也周公欲葬成周而成王葬之畢此豈有意于遷哉今夫富民之家所以遺其子孫者田宅而已不幸而有敗至于乞假以生可也然終不敢議田宅今平王舉文武成康之業而大棄之此一敗而鬻田宅者也夏商之王皆五六百年其先王之德無以過周而後王之敗亦不減幽厲然至于桀紂而後亡其未亡

也天下宗之不如東周之名存而實亡也是何也則不
鬻田宅之效也盤庚之遷復殷之舊也古公遷于岐方
是時周人如狄人也逐水草而居宣所難哉衛文公東
徙渡河恃齊而存耳齊遷臨淄晉遷于絳于新田皆其
盛時非有所畏也其餘避寇而遷都未有不亡雖不即
亡未有能復振者也春秋時楚大饑羣蠻叛之申息之
北門不啓楚人謀徙于阪高蔣賈曰不可我能往寇亦
能往于是乎以秦人巴人滅庸而楚始大蘇峻之亂晉
幾亡矣宗廟官室盡為灰燼溫嶠欲遷豫章三吳之豪
欲遷會稽將從之矣獨王導不可曰金陵王者之都也
王者不以豐儉移都若弘衛文大帛之冠何適而不可
不然雖樂土為墟矣且北寇方彊一旦示弱竄于蠻越
望實皆喪矣乃不果遷而晉復安賢哉導也可謂能定
大事矣嗟夫平王之初周雖不如楚之疆顧不愈于東
晉之微乎使平王有一王導定不遷之計收豐鎬之遺
民而修文武成康之政以形勢臨東諸侯齊晉雖強未

敢貳也而秦何自霸哉魏惠王畏秦遷于大梁楚昭王畏吳遷于郢頃襄王畏秦遷于陳考烈王畏秦遷于壽春皆不復振有亡徵焉東漢之末董卓劫帝遷于長安漢遂以亡近世李景遷于豫章亦亡故曰周之失計未有如東遷之謬也

彼黍離離彼稷之穗實韻行邁靡靡中心如

醉實韻知我者謂我心憂見前不知我者謂我何求見前悠悠

蒼天見前此何人哉賦而興也穗本作采說文云不成秀也通志云稷穗似蘆而米可食如醉

者言憂之沉昏而不醒如醉然也彼黍離離彼稷之實實韻行邁靡靡

中心如噓叶質韻於悉翻知我者謂我心憂見前不知我者謂我

何求見前悠悠蒼天見前此何人哉賦而興也實謂成實而堅也孔云三章歷

道其所更見大夫役當有期而反但事尚未周了故也
或疑稷文有改易而黍文不變何也按羅願云黍以大
暑而種故農家以三月上旬為上時四月上旬為中時
五月上旬為下時月令仲夏之月農既登黍天子以雖
嘗黍羞以含桃先薦寢廟黍固有早晚其晚者不妨至
孟秋始熟故庶人秋乃薦黍此天子之禮自重其先熟
者而當薦之耳據此黍既有早晚三輩則當離離時而
或值稷之苗稷之穗稷之實蓋以早晚為異理固然也
楊慎直以為猶興桃夭者因葉及華因華及實蓋一時
所見一日所賦則詩人乃是懸空託咏似未是又羅云
黍大體似稷故古人併言黍稷行役之人有憂于內則
有不察于外故于此或不能辨也此說在太平御覽先
有之故劉勰云思親者莪蒿不分閔周者禾稷莫辨蓋
心在於憂與哀而視物之似而誤也亦通孔云噎者咽
喉蔽塞之名言憂深不能喘息如噎之然三章所以為
賦而興者蓋以苗之搖曳興搖搖以穗之下垂興如醉

以實之堅滿興如噎也按小弁之詩云踧踧周道鞠為茂草若預知有今日然者箕子朝周過殷墟城壞生黍箕子傷之乃作麥秀之詩曰麥秀漸漸兮禾黍油油彼姦童兮不我好仇其語意與此相類但彼所謂姦童正指紂此則意在平而不在幽耳

黍離三章章十句

序不錄作者姓名而子貢傳以為尹伯封之作至申培說獨詳

云幽王伐申申侯逆戰于戲射王弑之立平王于申自申遷雒命秦伯帥師逐犬戎于鎬京尋遣尹伯封犒秦伯之師過故宗廟宮室秦人皆墜為田成生禾黍旁皇不忍去故作此詩因記曹植云昔尹吉甫信後妻之讒而殺孝子伯奇其弟伯封求而不得作黍離之詩而太平御覽亦載韓偓云黍離伯封作也離離黍貌也詩人求亡不得憂慙不識于物視彼黍離離然憂甚之時反以為稷之苗

乃自知憂之甚也則此詩之為伯封作相傳已久
特作詩之指異耳乃劉向新序則云衛壽閔其兄
伋之且見害作憂思之詩黍離是也其事與伯封
事相類但黍離為王風之首向之言殆未可信或
訛以傳
耳

中谷有蓷宗周當喪亂之後地棄不恤其人民饑荒

離困罔克匡生之象該乎詞矣

出程仲虞紫雲隱書序云閔周也夫婦

日以衰薄凶年饑饉室家相棄焉申培說亦云民饑
而流夫婦不保君子閔之而作是詩孔穎達嚴粲皆
皆屬之平王時然則直是王室東遷舊都之民無所
依怙故其顛沛流離遂至于此誠可閔也胡安國云
男女居室人之大倫也婚姻之禮廢則夫婦之道苦
淫辟之罪多矣氓之詩所以刺衛中谷有蓷所以閔

周易序咸恒為下經首春秋內女出夫人歸凡男
女之際詳書于策所以正人倫之本也其旨微矣

中谷

陸璣疏
作谷中

有推曠

說文作瀟云水濡而乾
也陸德明本一作瀟

其乾

叶寒
韻居

寒翻

矣有女仳離嘒其嘆

叶寒韻他干翻
陸本一作歎

矣嘒其嘆

同上

遇人之艱

豐氏本
作難

難矣

興也爾雅云水注川曰谿注
谿曰谷菲艸名說文云萑也

陸佃云葉形似萑方莖白華華生節間如雞冠子黑色
細長三稜羅願云全似杜天麻而不生橫枝陸璣云舊

說及魏博士濟陰周元明皆云菴蘭是也韓詩及三蒼
說悉云益母也故曾子見益母感恩郭璞云今荒蔚也

本艸衍義云荒蔚子葉至初春亦可煮作菜食凌冬不
凋瘁一名益母一名益明一名大札一名貞蔚劉歆李

巡皆以為臭穢艸即荒蔚也毛鄭誤解為離按離乃萑
之別名即萑也初生為萑長大為荒成則名萑又名為

離一物四名其字从艸萑聲萑音完从艸从卂乃山
羊角今文於萑省卂故作萑耳與名萑之萑相亂而實
不同此萑从艸佳聲音追不可不辨嚴粲云舊以萑艸
宜生高陸生谷中則傷于水非也據本艸茺蔚正生海
濱池澤其性宜濕暝早燥也易曰燥萬物者莫暝乎火
說文云耕暴田曰暝毛傳解暝為菸以為萎死之義非
是乾亦燥也指推而言嚴云谷中之地陰潤其推艸宜
難旱也今暝燥其乾者旱則乾者先燥也與饑饉則貧
者先悴也萬尚烈云推蓋母也故以與女仇說文云別
也鄭氏云近曰離遠曰別有女仇離者有女為其夫所
棄或近而離或遠而別見非一女也嘔嘆聲徐鍇云意
氣有所鬱慨然也歎說文云吟也亦謂之長太息人嘔
嘆則息大而長也人謂夫也艱難猶言窮厄也蓋歸咎
其夫之所遭云爾未有怨意范祖禹云世治則室家相
保者上之所養也世亂則男女相棄者上之所殘也其
使之也勤其取之也厚則夫婦日以衰薄而凶年不免

于離散矣又羅願云推一名益母曾子見之而悲詩人之托此亦其窮而反本氓之詩色衰相棄則歎兄弟之不知竹竿適異國而不見答則嘆父母之相遠此所以獨感于益母與亦通

中谷有推曠

其脩

叶屋韻式竹翻陸云或作蔭

矣有女仳離條其猷

叶屋韻式六翻陸云或作

嘯

矣條其猷

同上

矣遇人之不淑

屋韻豐本作叔

矣

興也脩說文云脯也旱既

久則艸乾之極如脯然也條猶長也漢郊祀歌云聲氣遠條猷吹聲也解見江有汜篇嚴云條條然而長猷其

悲恨深于歎矣淑通作淑不淑不善也鄭玄云言君子與己不善此正斥其夫之行而言蓋怨辭也

中

谷有推曠其濕

緝韻蘇子繇本作隰

矣有女仳離

韓詩本作悒外傳作掇

其泣

緝韻

矣啜其泣

同上

矣何嗟及

緝韻

矣

興也濕廣韻云水露也嚴云生于濕

者今亦為所曠興富足者亦乏絕矣凶年饑饉之甚貧
富皆憔悴也啜說文云嘗也爾雅云茹也詩詒云泣而
縮氣也泣說文云水洩也無聲出涕曰泣徐鍇云泣哭
之細也微子過殷墟欲哭則不可欲泣則以其似婦人
是也補傳云敵甚于歎泣甚于敵蘇轍云中谷之漙旱
之所難及也今也既先燥其乾者及其甚也則雖其生
于濕者亦不免也旱及于濕則盡矣譬如周人風俗衰
薄其始也人之艱難者棄其妻耳其後人之不善者棄
之矣及其既甚至有無故而棄之者故其以艱難而見
棄者則嘆之嘆之者知其不得已也以不善而見棄者
則條條然而歔歔者怨之深矣及其無故而見棄也則
泣而已泣者窮之甚也何嗟及者言何所嗟悔而可及
蓋雖其所遭之不幸亦自傷其所從之非人也說苑引
孔子曰不慎其前而悔其後雖悔無及矣詩曰啜其泣
矣何嗟及矣言不先正本而成憂于末也黃佐云周官
行于盛時每遣小行人調委其凶荒今也不然室家相

棄則亦付之無
可奈何而已

中谷有蓷三章章六句

子貢傳申培說豐氏本篇名俱作中谷按詩序乃

詩人閔周之作朱子改為婦人自述其悲歎之辭非也觀篇中云有女仳離安在其為婦人自作也

子貢傳中有闕文大抵與申培說同

碩人衛傳母作也莊姜始嫁至衛先容後禮傳母作

此以勵之

劉向列女傳云齊女為衛莊夫人號曰莊姜姜姁姁好始往操行哀憤心淫佚冶容傳

母見其婦道不正諭之曰子之家世世尊榮當為民法則子之質聰達于事當為人表式儀貌壯麗不可不自修整衣錦綢裳飾在與馬是不貴德也乃作詩曰碩人其頡衣錦綢衣齊侯之子衛侯之妻東宮之

妹邢侯之姨譚公維私砥厲女之心以高節以為人
君之子弟為國君之夫人尤不可有邪僻之行焉女
遂感而自脩君子善傳母之防未然也愚因此悟子
夏禮後之說其所謂素以為絢者蓋咏象服耳先儒
謂象服者畫翟羽于其上故孔子以繪事後素解之
詩人但咏姜氏族類容貌服飾之盛而絕無一語稱
贊其德子夏心疑詩人之有微辭也若曰君夫人信
美矣但象服禮服也詩人何為僅附見于容貌之後
倘亦刺其修容而簡禮乎此即傅母立言之指所謂
意在言外者故孔子許之曰起予者商也始可與言
詩已矣今文逸素絢一語而舊解禮後復牽強不可
通非列女傳孰使正之哉他詩若刺宣姜刺魯桓亦
俱言服飾容貌威儀技藝之美而闕失自見其機軸
頗與此同甚矣古詩之微而婉也又按史記衛武公
卒子莊公揚立莊公五年取齊女為夫人好而無子
以竹書紀年推之武公之薨在平王十三年則莊公

取齊女之歲實平
王之十八年也

碩人其碩

微韻

衣錦褰

禮記列女傳俱作綢說文作縠書大傳作縠

衣

微韻

齊侯

之子衛侯之妻

叶支韻
子宜翻

東宮之妹邢侯之姨

支韻

譚

白虎通作

覃

公維私

支韻

賦也頭大曰碩故碩為大義碩人尊大之人指莊公也白華之詩申后亦稱幽王

為碩人說文無碩字本作頽其義則面頽也然莊子云

其頽頽然注以為大朴之貌又爾雅貝虵博而頽注云

頽者中央廣兩頭銳合此二說可以得用頽字之意蓋

摹擬莊公容貌如此衣錦以下始咏莊姜衣錦三句頽

一氣讀急回顧與首句相應言此衣錦褰衣而來者乃

是以齊侯之子而為衛侯之妻也錦說文云裏色織文

按裏者襟色也劉熙云錦金也作之用功重其價如金

故字从金帛衣錦者言以錦為衣也舊注衣錦之衣去

聲謂衣著。裴衣之衣如字。謂衣服然。半之詩云。衣錦。裴衣與此文正同。下文對裳。錦裴裳則以上衣為衣著者。非也。鄭玄云。國君夫人翟衣而嫁。今衣錦者在塗之所服也。裴說文云。裴也。裴者。象屬羅。願云。裴高四五尺。或六七尺。葉似苧。實如大麻。子今人績為布。或作穎。稌記云。三年之喪。既穎是也。通作綱。王藻云。禪為綱是也。禪者衣不重也。亦作景。士昏禮云。女登車。姆為加。景乃驅是也。古婦人盛服。必加禪衣于外。即周禮六衣之素沙。君子偕老。篇之蒙彼。綯締中庸。所謂惡其文之著者也。孔穎達云。婦人之服尚輕細。且欲露錦文。必不用厚繒。故鄭箋云。以禪穀為之。而許慎說文字作裴。沈括謂是織。裴麻以成布。未知孰是。嚴粲云。齊侯之子嫁為衛侯之妻。言匹敵也。東宮以下。又自齊侯一語。而推衍言之。乃文法波瀾處。東宮太子所居之宮。杜預云。太子不敢居上位。故常處東宮。孔穎達云。四時東為春。萬物生長在東西。為秋。萬物成就在西。以此君在西宮。太子常處

東宮也易象西北為乾乾為君父故君在西方震震為長男故太子在東也按左傳東宮名得臣孔云齊世家莊公生僖公東宮得臣未知何公太子按史記年表衛莊公之立在春秋前二十五年齊僖公之立在春秋前八年然則莊姜必非齊僖之女蓋是莊公之女僖公姊妹也得臣為太子早死故僖公立也不言僖公姊妹而繫得臣者見其是適女也爾雅云男子謂女子先生為姊後生為妹張揖云妹末也劉熙云妹昧也猶日始入歷時少尚昧也孔云繫太子言之明與同母見夫人所生之賢邢周公子所封邑左傳所謂邢茅昨祭周公之肩者在今直隸順德府邢臺縣侯爵也譚國名在今山東濟南府歷城縣路史云嬴姓春秋莊十年書齊侯滅譚譚子奔莒則譚本子爵而得稱公者白虎通云伯子男臣子於其國中褒其君為公以為諸侯有會聚其事相朝聘之道故稱公而尊或稱伯子男而卑為交接之時不私其臣子之義心俱欲尊其君父故皆令臣子

得稱其君為公也此詩亦言公者蓋依其臣子之稱便
文耳爾雅云妻之姊妹同出為姨女子謂姊妹之夫為
私郭璞云同出謂其已嫁劉云姊妹互相謂夫曰私言
於其夫兄弟之中此人與已姊妹有恩私也孫炎云私
無正親之言然則謂吾姨者我謂之私邢侯譚公皆莊
姜姊妹之夫互言之耳劉公瑾云歷言此者以見莊姜
之姊妹與莊公之姻婭其尊皆同也鄒云按漢儒謂禮
惟嫁長女餘皆為媵然碩人既為衛侯妻而邢譚之夫
人又皆其姊妹行也
亦足證漢儒之誕妄
手如柔荑
葉支韻
膚如凝脂
支韻
頷如蝤蛴
釋文作齊
齒如瓠犀
葉支韻
息滋翻
螭
說文
云好
首娥眉
支韻
巧笑倩
霰韻
釋
兮美目盼
叶霰韻
匹見
貌
石經俱作盼
盼胡計翻
恨視貌
佩觿集云
流俗以盼恨之盼為盼
睞之盼莫以為非
兮
論語此
下有素

以為絢兮一句豐氏本同朱子謂碩人詩四章而皆七
句不應此章獨多一句蓋不可知其何詩賦也茅之
始生曰萑解見靜女篇按萑不專為茅萑說文徐鍇云
萑初生艸也一云卉木初生葉貌相經云筋不束體血
不華色手無春萑之柔髮有寒蓬之樵蓋形之下也膚
本作臚說文云皮也禮運疏云革外薄皮曰膚膚內厚
皮曰革凝冰同字故有凝結之義內則疏云凝者為脂
釋者為膏孔云脂有凝有釋散文則膏脂皆總名對例
即孫炎云膏凝曰脂是也領說文云項也一名頸蝻蝻
蟲名方言作蝻蝻爾雅云蝻蝻蝻蝻蝻蝻蝻蝻蝻蝻蝻
蝻桑蠹孫炎據方言云蝻蝻謂之蝻自闕而東謂之蝻
蝻梁益之間或謂之蝻秦晉之間謂之蠹然則蝻蝻也
蝻蝻也蝻蝻也蝻蝻也蝻蝻也蝻蝻也蝻蝻也蝻蝻也
郭璞云蝻蝻在糞土中蝻在木中陸佃云蝻蝻外黃內
黑亦或謂之蝻蝻列子所謂石生金木生蝻是也化書曰燥
蝻內外潔白符子所謂石生金木生蝻是也化書曰燥

濕相育不母而生蝻蝻此即木中蠹蟲亦曰桑蠹繇是以觀蝻蝻名蝻蝻名蝻原是兩物而蝻蝻與桑蠹則蝻蝻之別名也以其在木中白而長故以況莊姜之領七辨云蝻蝻之領阿那宜顧是也蝻蝻屬陸佃云長而瘦上曰蝻短頸大腹曰蝻犀爾雅作棲字異音同通用孫炎云蝻中辨也齒如蝻犀者朱子云言其方正潔白而比次整齊也按相法齒辨白如蝻犀青如榴子者饗螻鄭玄云謂蜻蜻也郭璞云如蟬而小有文爾雅翼云之比蝻蠶蛾也陸佃云繭生蛾蛾生印蝻者蠶之所化蛾者蝻之所化荀卿蠶賦云蝻以爲母蛾以爲父是也蝻一名蝻蝻一名羅孫炎以爲蝻即是雄蝻即是雌蛾似黃蝶而小其眉句曲如畫故曰蛾眉也巧猶工也笑解顏啓齒也字从竹从夭李陽冰云竹得風其體夭屈如人之笑故蘇子瞻作文與可畫竹贊云竹亦得風夭然而笑是也倩說文云美也徐鍇

云若艸木之蔥蒨也毛傳以為好口輔韓詩以為倉白
色俱無據盼說文云目好貌按盼本作盼从目从分毛
傳解以為目黑白分者是也是則莊姜客貌之美又有
如此者鄒云此章妙寫媚麗後世騷人辭賦祖之如大
招篇云朱唇皓齒嫵以姱只豐肉微骨體便娟只曾頰
倚耳曲眉規只小腰秀頸若鮮卑只靨輔奇牙宜笑嗎
只招魂篇云娼光眇視目曾波些被文服纖麗而不奇
些長髮曼鬢豔陸離些好色賤云眉如翠羽肌如白雪
腰如束素齒如含貝雄神賤云肩如削成腰若約素延
頸秀項皓質呈露雲髻峩峩修睂聯娟丹唇外朗皓齒
內鮮明眸善睐靨輔承權皆此詩為之嚆矢也

碩人教教

豪韻

說

釋文

豐氏

于

農郊

叶豪韻
居勞翻

四牡有驕

叶豪韻
起勞翻

朱幘鑣鑣

叶豪韻
博毛

庶翟第

周禮注作
蔽又作茝

以朝

叶豪韻
直高翻

大夫夙退

列女傳
作夜

無使

君勞

爾雅韻

賦也

碩人指莊公也教說文云出遊也說

行親迎之禮故因莊姜未至而出遊舍止於近郊以待之也四牡以下皆謂莊姜之與馬也四牡車之四馬驕壯貌說文云馬高六尺為驕轡鑣飾也毛傳云人君以朱鑣鑣且以為飾按說文無轡字疑通作噴噴者吒也蓋鑣在馬口傍時或噴吒而出涎沫故鑣謂之排沫其纏之則以朱為飾但以其正當馬噴吒之處故曰朱噴也噴訛為轡今謂朱是鑣飾之色則可謂朱為鑣飾之名則不可鑣者馬銜外鐵釋名云包也在旁也斂其口也一名扇汗一名排沫爾雅謂之鑣嚴粲云鑣鑣非一鑣也每馬之鑣皆有朱色之飾故曰鑣鑣翟翟車也夫人以翟羽飾車第者艸盛之義艸盛則能蔽物故謂車蔽為第爾雅輿革前謂之鞮後謂之第易婦喪其第是也孔云婦人乘車不露車之前後設帳以自隱蔽謂之第因以翟羽為飾周禮巾車注引此謂厭翟也厭翟者

次其羽使相迫也朱憤擬人君之翟芾極小君之儀嫡
夫人之正禮以朝者莊姜已至于衛而入君之朝也風
早退罷也禮玉藻云君日出而視朝退適路寢聽政使
人視大夫大夫退然後適小寢釋服國人樂得夫人以
為君配而又鄭重大昏之禮故謂大夫之在公者宜早
退無使吾君勞倦于政事而于禮文或有所闕耳非恐
其不得相親之謂也

河水洋洋北流活活

曷韻說文作活

施眾

說文作畧

濊

濊

叶曷韻呼括翻又叶月韻許月翻說文作濊

鱣鮪發發

月韻叶曷韻北末翻韓詩作鱣說文

本作鰈豐氏

葭莢揭揭

叶月韻語許翻又叶曷韻烏割翻

庶姜孽

孽

屑韻韓詩豐本俱作孽云長貌

庶士有暵

屑韻亦叶月韻丘謁翻韓詩豐本俱作桀云健也

興也此即來途所見以起興河在齊西衛東自齊適衛
河界其中北流入海洋洋盛大貌活活說文云水流聲

爾雅魚畧謂之𩚰注云網最大者濊濊朱子云畧入水聲也說文云凝流也本作濊楊慎云水平則流凝杜詩江平不肯流李端詩水深難急流是也又馬融云大魚網目大豁豁也比但以音解似無據郭璞云鱣大魚如鱣肉黃大者二三丈今江東呼為黃魚即是也陸佃云俗謂之玉版嚴云本州以鱣為鱣魚俗作鱣即鱣魚也鱣屬陸佃云鱣岫居至春始出而浮陽北入河西上龍門入漆沮故詩言漆沮入河逆道此魚按爾雅鱣能度龍門則為龍故禮記云龍以為畜故魚鱣不塗鱣從龍者也陸璣云鱣出江海三月中從河下頭來上鱣身形如龍銳頭口在頷下背上腹下皆有甲縱廣四五尺今于盟津東石磧上釣取之大者千餘斤可烝為臠又可為鮓魚子可為醬鱣魚形似鱣而青黑頭小而尖似鐵兜鍪口亦在頷下其甲可以磨薑大者不過七八尺益州人謂之鱣鱣大者為王鱣小者為鱣鱣色白

味不如鱸也宋祁云王鮪腥不可近官以為鮓獻御其
味甚美發韓詩作鱖魚掉尾也云發發者馬融云魚著
網尾發發然即諺所云撥刺是也爾雅云葭蘆葦蘆蘆
蘆云分別葦類之異名按葭葦之未秀者即蘆也葦蘆
之初生者似葦而小長大名蘆成則名葦又名蘆陸璣
云蘆或謂之荻其初生三月中其心挺出其下本大如
箸上銳而細揚州人謂之馬尾揭說文云高舉也云揭
揭者爭長而競進之貌馮時可云葭蘆出河中者得氣
尤厚故衛風曰河水洋洋葭蘆揭揭北魏信都芳為律
管吹灰之術得河內葭灰用之應節便飛餘灰即不動
也可以信詩人之深于物理矣庶姜謂姪娣莊姜為東
宮之妹乃莊公之嫡出曰庶姜則同姓之媵也嚴云庶
出為孽言孽孽者衆多之貌猶言非一孽也庶士毛傳
云齊大夫送女者孔云左傳凡公女嫁于敵國公子則
下卿送之於時齊衛敵國莊姜齊侯之子則送者下卿
也大夫卿之總名士者男子之大稱故云庶士竭說文

云去也字从去楚辭車既駕兮竭而歸即此竭也庶士
送莊姜而來今既畢事則有去衛國而歸者矣詩之興
意以施魚罟于河中而得大魚興莊公求昏于齊而得
貴女以河上葭莢之艸揭揭然興庶姜庶士從莊姜而
來歸也夫以莊姜所居之貴齊國資送之盛如此方為
衛人所仰望而可不以禮自修乎鄭重言之使其自悟
傳母之所以為善諷也左僖二十三年公子重耳于秦
秦伯納女五人懷嬴與焉他日公享之公子賦杜水杜
預以為逸詩韋昭國語注以為當作汙水取朝宗于海
之義今按二說皆非也河水即此章因秦伯納女故有
庶姜孽孽之詠然不云碩人之四章而
但舉章首二字史筆固不拘一法耳

碩人四章章七句

左傳云初衛莊公娶于齊東宮
得臣之妹曰莊姜美而無子衛

人所為賦碩人也序泥其說遂以為閔莊姜也莊
公惑于嬖妾使驕上僭莊姜賢而不答終以無子

國人閔而憂之子貢傳申培說亦云衛莊公娶于齊夫人賢而不禮焉國人閔之今按此詩作于莊姜始至之時初無閔意左傳所云衛人為之賦碩人者但謂碩人之詩為莊姜咏耳非謂以莊姜無子之故然後賦此詩也不善讀古書者以辭害意弊率類此

綠衣衛莊姜傷已也妾上僭夫人失位而作是詩也

出序按左傳衛莊姜美而無子公子州吁嬖人之子也有寵而好兵公弗禁母嬖子驕所謂妾上僭而夫人失位者也

綠子貢傳作萊

今衣兮綠衣黃裏

紙韻

心之憂矣

紙韻

曷維其已

紙韻比也綠蒼黃之間色黃中央之正位劉公瑾云青黃赤白黑五方之正色也綠紅碧紫纁五方之間色

也蓋以木之青克土之黃合青黃而成綠為東方之間
色郝敬云婦人衣夫者也夫人位中宮黃者中央土之
正色襍以青則為綠青木氣也木克土中宮所以見逼
于旁孽也綠兮衣兮者言此間色之綠也今乃為衣也
按玉藻云衣正色裳間色是間色不可為衣而正色當
為衣也嚴粲云讀詩不可鹵莽如讀綠兮衣兮不可但
言是綠色之衣當玩味兩兮字詩有黃鳥白華不言黃
兮鳥兮白兮華兮惟綠衣曰綠兮衣兮蓋綠衣字皆有
意義綠以喻妾衣以喻上僭故以二兮字點綴而丁寧
之裏說文云衣內也孔云間色之綠不當為衣猶不正
之妾不宜嬖寵今間色之綠為衣而見正色之黃反為
裏而隱以興不正之妾今蒙寵而顯正嫡夫人反見疏
而微綠衣以邪干正猶妾以賤凌貴夫人既見疏遠故
心之憂矣何時其可已止也張敬夫云綠衣之憂言嫡
妾之亂其弊將至于不可勝言者憂
在家國也夫豈特為一身之私哉

綠兮衣兮綠衣

黃裳

陽韻

心之憂矣曷維其亡

陽韻

比也上曰衣下曰裳孔云以興不正之妾今

蒙寵而尊正嫡夫人反見疏而卑雖嫡妾之位不易而莊公禮遇有薄厚也嚴粲云綠衣黃裏言掩蔽而已綠衣黃裳則貴賤倒置夫人失位矣曾鞏云亡失也不須訓為忘言此心之憂無時失去也真德秀云嫡妾之亂其弊將有不勝言者曰曷維其已曷維其亡蓋雖欲亡憂而不可得也其後嬖妾之子州吁果以篡立而衛為之大亂莊姜之憂於是乎驗有國者其可不鑒于茲張洽云夫君臣父子夫婦之分一失其正則亂之所從生衛莊溺愛而使內寵僭嫡嬖子害正辨之弗早貽禍後嗣可謂慘矣

綠兮絲

支韻

兮女所

治

叶支韻
澁之翻

兮我思古人俾无訖

叶支韻
盈之翻

兮

比而賦也
兮絲兮者言

此間色之綠也本是絲也女泛指婦女治謂染治之也
皎皎練絲在所染之不然奚聘而有此綠也以比妾之

所以能上僭者皆繇已不德致然此與下章皆自訟之辭也古人泛言古之人或有處此者說文云罪也黃佐云天下無難處之事善處嫡妾之間則亦必敬必戒無違夫子不使有愆而已程子云衛莊姜傷已無德以致之行有不得反求諸己而已矣絲之綠繇女之染治以成言有所自也締綌所以來風也又魯語公父文伯之母欲室文伯享其宗老而為賦綠衣之三章師亥聞之曰善哉宗室之謀不過宗人謀而不犯微而昭矣詩所以合意歌以詠之度於法矣賦詩之意亦取章首二句欲其慎于始耳

締兮綌兮淒

箋云

妻旁二點者从冰也寒也妻旁三點者从水也水雲淒澹之貌此淒其以風及鄭風風雨淒淒四月秋日淒淒皆當从冰今按說文只有从水之淒無从冰之淒當以淒字為正

其以風

叶侵韻

我思

古人實獲我心

侵韻

毛傳云寒風也按說文淒雲雨起也今

以狀風者取其陰涼慘淡亦如雲雨方起之時耳締綌乃來風之物紵綌綌綌以禦風吾知其難矣故古語云禦寒莫如重裘止謗莫如自修也或以上章綠綌比少艾之妾言惟其綠而絲也故人愛而欲治之此章喻已之過時言締綌本暑服今乃當淒然寒風之候猶班婕妤怨歌行所謂常恐秋節至涼飈奪炎熱者蓋怨已諒人絕無爭寵之心雖摹情近似然斤斤以色之盛衰為較量其于義末矣獲我心謂先得我心孟子曰心之所同然者何也謂理也義也聖人先得我心之所同然耳我思古人其處夫婦嫡妾之際實有當于我心者我其可不自勉乎古人不知何所指蓋亦如關雎鵲巢之類當時女史所載也曰無訖只委曲以全婦道猶有模範古人之意實獲我心則古人來合我矣俾字與實字遙相呼應陳櫟云不得于夫而不疾其妾惟思古人以自修其身憂而不傷怨而不怒孔子謂詩可以怨其此類也夫鄧元錫云鏡古所以平心也困而能適憂而維則

其惟綠衣乎又左成九年季文子如宋致女復命公享之賦韓奕之五章穆姜出于房再拜曰大夫勤辱不忘先君以及嗣君施及未亡人先君猶有望也敢拜大夫之重勤又賦綠衣之卒章而入亦借辭取義

綠衣四章章四句

子貢傳申培說皆謂衛莊公嬖人

之而作今按此詩無刺及好兵之義

終風衛莊姜見怒于莊公賦此

出子貢傳徐光啓云詳味日月終風見

莊姜惻然望夫之情見詩人忠厚之意長門賦義本于此

終風且暴

號韻說文作瀑

顧我則笑

號韻讀如爆先到翻古本一作咲陸德明云俗字

也謔浪笑敖

疑到翻

中心是悼

號韻比也終風終日風也暴說文云晞也亦

風亦曰比莊公之意態變幻不可測識也顧說文云還視也笑喜也顧我則笑玩一則字便見原無笑意謹說文云戲也浪者水流之名教通作傲說文云倨也此承上笑字而言言不過是戲謹放浪以笑為傲而已悼說文云懼也不知其所以待我者終將何如惟有中心自悼懼而已

終風且霾

叶支韻陵之翻

惠然肯來

叶支韻陵之翻

莫往莫來悠悠我思

雅說文

比也爾

而雨土為霾孫炎云大風揚塵土從上下也肯之言可莫之言無皆音近也惠然肯來乃期望之辭言莊公仁愛于我庶其可一來乎莫往莫來者言我不往則彼亦不來也悠說文云憂也莊姜無自往之理則莊公終不來矣是以使我思之而憂愁不置蓋望其君子之深厚之至也

終風且曠

霽韻

不日有

曠

見上

寤言不寐願言則嚏

霽韻

韓詩陸本作走云一作嚏又作震

比也曠說文云

陰而風也有之言又亦音近也呂祖謙云陰風終日意
其止矣不旋日而又曠焉厭苦之辭也愚按三章之言
終風同然始而曰暴則尚有日繼而曰霾則不見日矣
又重之以不日之曠則無開霽之時矣比莊公之狂惑
日甚也說文云寐覺而有言曰寤論語註云自言曰言
寐說文云卧也願通作愿說文云謹也曰願言者以其
心之所謹念者發之于自言也噓說文云悟解氣也徐
鍇云腦鼻中氣壅塞噴噓則通鄭玄云噓讀當為不敢
噓咳之噓我其憂悼而不能寐汝思我心如是則噓
也今俗人噓云人道我此古之遺語也宗鏡錄云心者
形于未兆動靜無不應于自心如詩之願言則噓謂人
思已則噓故知心應千里設有處遠而思者我皆知矣
是以萬事惟心先知故得稱心靈也豐熙云此承莫往
莫來而言不敢望君之復來矣但得一處及之而使
一噓亦足矣蓋

曠曠

韓詩豐氏
本作壇壇

其陰

豐本
作

虺虺

其雷

灰韻寤言不寐願言則懷叶灰韻胡猥翻此也重言瞠

云蛇之小者為虺虺電光之貌諺謂蛇子霍閃是也前三章皆言風此不言風而獨終之以需者風比莊公之初惑于嬖妾及其惑之甚而至于昏則取象于霍瞠又其甚也則將有無道之施于嫡矣故以需終之也首章曰中心是悼莊姜已懼及此懷說文云念思也嚴粲云我為傷悼汝之故寤覺而不寐願汝思懷我而悔悟也豐熙云此承願言則嚏而言不敢望君之道我然亦願君之一思及之乎至此則望之極矣亦因以見其君之至薄也

終風四章章四句

序以為衛莊姜傷已也遭州吁之暴見侮慢而不能正也申培

說則云莊姜戒州吁公不悅姜憂而作詩朱子謂詳味此詩有夫婦之情無母子之意

日月衛莊姜傷已也

出序朱子云明是莊公在時所作其篇次亦當在燕燕之前

按史遷有言甚哉妃匹之愛君不能得之于臣父不能得之于子沉卑下乎賢如莊姜而不見禮卒於無

子信有命焉

日居月諸照臨下土

虞韻

乃如之人兮逝不古

豐氏本作故

處

叶虞韻讀如取此主翻

胡能有定寧不我顧

叶虞韻果五翻陸德明本作顧興也日

月鄭玄云喻國君與夫人也居諸皆語助辭與柏舟篇解同又吾師蔡先生穀中云居諸分屬日月亦有義居言日新之日居然無改諸言生明生魄諸常改易亦一說也孔穎達云日以照晝月以照夜同曜齊明照臨下土以興國君視外治夫人視內政之人鄭云是人也謂莊公也逝者一往而不反之意古處朱子云以古道相

處也古人于夫婦之倫必以道相處如文王之刑于寡妻是也輔廣云觀綠衣之詩所謂我思古人則于此歎莊公不以古道處己者宜也自處以古人為法而望人以古道處己莊姜之處己望人皆有則矣胡之言何音之轉也定說文云安也寧猶壹也顧說文云還視也言是其心志回惑何能有安止之時乎使其能有定也豈終棄我而不顧乎此二句皆期之之辭朱子云見棄如此而猶有望之意焉此詩之所以為厚也又韓詩外傳云君子之聞道入之于耳藏之于心察之以仁守之以信行之以義出之以遜故人無不虛心而聽也小人之聞道入之于耳出之于口苟言而已譬如飽食而嘔之其不惟肌膚無益而于志亦戾矣詩曰胡能有定按此借辭取義然于刺莊公處夫婦之間不能以古道自持其意亦復相合

日居月諸下土

是冒

號韻

乃如之人兮逝不相好

叶號韻

虛到翻

胡能有定寧不

我報

號韻之意愛而不釋

曰好韻會云

李氏云亦照臨下土

張氏云以禮事莊公不以恩答已

劉公瑾云每章末二

句皆有望之之意

孫能傳云寧不我顧猶望其顧也

寧不我報猶望其報也

語意何等繼續玉臺新詠載王僧

孺為姬人自傷詩還君與妾扇歸妾奉君裘斷絃猶可

續心去最難留果於自絕無少顧戀失詩人忠厚之意

矣

日居月諸出自東方

陽韻

乃如之人兮德音無良

陽韻

胡能有定俾也可忘

陽韻

雄云月未望則載魄于西月既望

則終魄于東朱子云旦必出東方月望亦出東方陸

佃云日月之盛皆在東方愚按此詩言日月皆以日月

相望之時言敵體同德之意也音聲良善也嚴粲云此

德音無良及邶谷風言德音莫違皆婦人言其夫待已

德音無良及邶谷風言德音莫違皆婦人言其夫待已

德音無良及邶谷風言德音莫違皆婦人言其夫待已

之意耳故為聲音言語朱子云德音美其辭無良醜其寔陸化熙云德音如顧我則笑之類然皆出于戲慢故曰無良忘說文云不識也謂遺忘也言何時能有定乎果有定則向日所以待我者庶幾使我可以遺忘之而亦不復記憶之追答

日居月諸東方自出

質韻父兮母

兮畜我不卒

叶質韻即事翻

胡能有定報我不述

質韻文選注作衍薛君云

法也興也畜養卒終也朱子云不得其夫而歎父母養我之不終蓋憂患疾痛之極必呼父母人之至情也徐光啓云畜我不卒非欲父母養之終身也只如今人說養我不了悞我一生真婦人語也述說文云循也循其事而稱述之也言何時能有定乎則向日莊公之所以報我者亦不復稱述之矣厚之至也

日月四章章六句

序以為衛莊姜遭州吁之難傷已不見答于先君以至困窮之

詩蘇轍引左傳石碣之諫莊公曰將立州吁乃定之矣若猶未也階之為禍莊公不從故及于禍此胡能有定之謂與呂祖謙亦云子叔姬妃齊昭公生舍叔姬無寵舍無戚夫人見薄則冢嗣之位望亦輕此國本所以傾搖也莊姜既不見答則桓公之位何能有定乎今繹詩中全無此意其解有定二字甚牽強朱子以為詩言寧不我顧猶有望之意又言德音無良亦非所宜施于前人者明是莊公在時所作其辨甚核然不以首句日月為取興而云是呼日月而訴之則迂矣至如子貢傳中培說皆謂州吁弑桓公莊姜大歸于齊而作是詩蓋悞認詩中有父兮母兮畜我不卒之言然其事據無

簡兮衛之賢者仕于伶官

出序

而作此詩刺莊公廢教

也

衛風碩人之詩為莊姜作也其兩言碩人則指莊公也此詩及考槃之詩皆有碩人之語與彼同文

故知亦刺莊公也伶官樂官也自黃帝時使伶倫氏截竹而吹之以為黃鐘之宮及周景王鑄無射而問律于伶州鳩是伶氏世掌樂官故後世多號樂官為伶官左傳鍾儀對晉侯自稱伶人魯語伶簫詠歌及鹿鳴之三是也此詩言萬舞者伶官之事其所以通于教者何也周禮大司樂以樂教國子樂師教國子小舞籥師掌教國子舞羽吹籥諸侯之禮止先儒謂彼雖天子之法推此諸侯亦有國學也按王制云諸侯天子命之教然後為學是則侯國設學之明證然祭祀燕享亦皆有舞何知此為學中之舞月令仲春上丁命樂正習舞釋菜合舞舍菜即釋菜也入學者必致諸子春入學舍菜合舞舍菜即釋菜也入學者必釋菜以禮先師其時在仲春即此詩所云日之方中者也衛自桓公始入春秋莊為桓父其行事無所表

見但以左傳所載寵州吁一節觀之公子州吁嬖人之子也有寵而好兵公弗禁石蜡諫曰臣聞愛子教之以義方弗納邪驕奢淫佚所自邪也弗聽其子厚與州吁游禁之不可夫州吁石厚皆國子之流而所行若是然則莊公當時之廢教蓋可知矣又篇末有西方美人之語則此詩之為東遷後作無可疑者

簡

陸德明云或作簡非也豐氏本作東云伶官名

今簡兮方將萬舞

麋韻

日之方

中在前上處

叶麋韻讀如取此主翻朱傳自章首至此為第一章今依毛鄭舊本章

碩人侯

侯

麋韻韓詩作侯侯侯云美貌

公庭萬舞

麋韻

賦也簡通作東說文云分別之也謂分別其能舞

與否者將使之舞也舊說訓簡為簡易不恭按周禮小胥巡舞列而撻其怠慢者若使當舞之時簡易不恭豈得為賢者乎方將猶言且也萬初學記云大舞也所以名萬者何休以為象武王以萬人定天下民樂之故名

之然商頌曰萬舞有奕夏小正曰丁亥萬用入學竹書
帝舜十七年春二月入學初用萬則萬之稱其來已久
或但取萬物得所之義耳舞者用兩足左右相背故其
字从舛山海經云帝俊八子始為舞又呂氏春秋云陰
康氏之始陰多滯伏民氣鬱閉故作舞以宣導之毛傳
云以干羽為萬舞按武舞名干舞干則有戚矣文舞名
羽舞言羽則有籥矣或又以文舞為籥舞呂祖謙云鄭
康成據公羊傳以萬舞為干舞蓋公羊釋經之誤也春
秋書萬入去籥言文武二舞俱入以仲遂之喪于二舞
之中去其有聲者故去籥焉公羊乃以萬舞為武舞與
籥舞對言之失經意矣若萬舞止為武舞則此詩與商
頌何為獨言萬舞而不及文舞耶左氏載攷仲子之宮
將萬焉婦人之廟亦不應獨用武舞也然則萬舞為二
舞之總名明矣又左莊二十八年楚令尹子元欲盡文
夫人為館于其宮側而振萬焉夫人聞之泣曰先君以
是舞也習戎備也蓋謂萬舞之中有武舞焉非專以萬

舞為武舞也孔穎達云月令仲春之月命樂正習舞入學者必釋菜以禮先師此日之方中即彼春入學是矣謂二月日夜中也尚書日中星鳥左傳馬日中而出皆與此同也愚按竹書所載二月入學初用萬及夏小正所云丁亥萬用入學即月令仲春上丁之制也在此者在下文公庭之前上謂上頭也處說文云止也此教舞之伶官在公之前其所止之地位則在衆舞者之上頭也孔云在前列上頭唯教者為然碩人指莊公也解見碩人篇侯說文云大也以容貌言言莊公以侯侯之容臨之于上也公庭者公所居之庭禮仲春入學習舞此日中之時舞當在學乃令之于公庭而萬舞焉莊公之肩越禮教於此徵之矣

有力如虎

虞韻

執轡如組

虞韻朱傳自碩人至此為第二章今依毛鄭舊本

左手執籥

藥韻豐本作龠

右手秉翟

叶藥韻讀如

赫如渥赭公言錫爵

藥韻賦也

句與舞事無關意是武舞之形容耳有力如虎言其武力比于虎也執持也轡馬韁也組說文云綬屬詩詁云間次五采為之織組者總紃于此而成文于彼御者執轡于此使馬騁于彼如織組也按武舞中有所謂發揚蹈厲者故見其如虎有所謂夾振駟伐者竊意即謂駟馬以往伐故有執轡之事先儒謂駟通作四恐未然也又呂氏春秋云詩云執轡如組孔子曰審此言也可以為天下子貢曰何其躁也孔子曰非謂其躁也謂其為之于此而成文于彼也聖人組修其身而成文于天下矣淮南子云聖人在上化育如神太上曰我其性與其次曰微彼其如此乎故詩曰執轡如組易曰含章可貞動于近成文于遠斷章取義古人說詩類如此禮記云伊耆氏作葦籥陸元朗云以竹為之長三尺執之以舞劉熙云籥躍也氣躍而出古者取卯地之竹以為籥春分之音萬物振躍而出也易林云茅藥生達陽唱于外陳暘云道生一則奇而為陽一生二則偶而為陰二

生三因陰陽參合而為冲氣籥之為器如笛而三孔律
度量衡所出陰陽冲氣所生伊耆氏用葦以始之後世
用竹以易之徒度所生陰陽合焉所以通中聲也又云
易曰震為萑葦為蒼筤竹葦籥竹籥皆震音也蓋太極
元氣函三為一行于十二辰而律呂具矣籥之為器本
於黃鐘之籥竅而三之所以通中聲而上下之律呂之
所繇生也古之人始作樂器而葦籥居其先焉震為六
子之首籥為衆樂之先又毛傳以為六孔廣雅以為七
孔云即笛是也按爾雅籥有三種大籥謂之產其中謂
之仲小者謂之蕤其七孔六孔三孔之異乎孔云籥雖
吹器舞時與羽並執故得舞名是以賓之初筵云籥舞
笙鼓公羊傳云籥者何籥舞是也按周禮言舞羽歛籥
蓋執羽舞吹籥為節陳氏云舞羽皆執籥以聲音之本
是故也秉持也翟說文云山雉尾長者此云秉翟謂持
翟雉之羽而舞公羊說樂萬舞以鴻羽取其勁輕一舉
千里韓詩說萬以夷狄大鳥羽非也南齊鄭義奏更以

翟為笛謂笛飾以髻簫飾以羽梁武帝曰翟是五雉之一取其義羽以秉之耳寧謂羗笛耶宋元豐三年詳定朝會儀注以為今文舞所秉翟羽以雉尾掉髹漆之柄求之古制蓋無所本景祐廣樂記載聶崇義圖羽舞所執類羽葆幢析羽四重以結綬系之于柄請依崇義圖以翟羽為之今按此說與古義合陳暘云簫所以為聲翟所以為容聲絲陽來故執簫於左左陽故也容自陰作故秉翟於右右陰故也李照舞節論云翟進則簫退簫進則翟退按書言舞于羽于兩階樂記言皆音而樂之及于戚羽旌謂之樂郊特牲明堂位祭統皆言朱干玉戚以舞大武皮弁素積以舞大夏則皆用于與羽矣其所以先武後文者兩階之舞則以苗民逆命故也湯武征伐則以有武功為大故也此詩先言有力二句愚以為武舞繼言執簫秉翟則是文舞亦先武後文者蓋周時萬舞之制然耳漢舞先武德後文始唐舞先七德後九功其意以謂武以威衆而平難文以附衆而守成

平難在所先守成在所後唐太宗謂封德彝曰朕始雖
以武功興終以文德綏海內謂文容不如蹈厲斯言過
矣厥指正同又按周禮大司樂以樂舞教國子雲門大
卷大咸大磬大夏大籥大武此六者謂之大舞雲門大
卷黃帝之樂也大咸堯樂也大磬即韶舜樂也大夏禹
樂記言二十舞大夏則六舞皆學而特舉大夏者舊謂
自夏以上揖讓得天下自夏以下征伐得天下夏為文
武中故特舉之可以兼前後也大籥湯樂大武武王樂
若內則言成童舞象左傳季札見舞象箭南籥者象箭
武舞南籥文舞此皆文王之樂不列于六舞之內赫通
作絕說文云大赤也渥說文云霑也毛傳云厚漬也孔
云渥者浸潤之名漬之久厚則有光澤故以興顏色之
潤耑說文云赤土也鄭玄云容色赫然如厚傳丹愚按
此贊伶官容貌之美蓋德充之符睟然見于面序所以
稱之為賢者也公謂莊公也言謂命也錫通作賜說文
云予也爵飲器似雀所以飲器象雀者取其鳴節節足

足也按錫爵樂工其禮有二一則祭統有昇鞞胞翟閑之禮翟者樂吏之賤者也毛傳以為見惠不過一散孔

云禮器云禮有以小為貴者貴者獻以爵賤者獻以散祭統云尸飲九以散爵獻士散受五升一則儀禮有君

燕臣而獻工之禮臣為賓公命宰夫為主樂賓升歌工歌鹿鳴四牡皇皇者華卒樂主人洗升獻工工不與

左瑟一人拜受爵若與四方之客燕舞則以勺今詳此詩乃上丁習舞之禮與祭祀燕享不同既以教國子為

職則與有教化之責今乃以昇翟獻工之禮施之賤斯甚矣自簡兮至此該括當日習舞始終上章刺意在公

庭萬舞此章刺山有榛真韻釋文作桑隰有苓叶真韻意在公言錫爵蔡說文作桑

離珍翻豐云誰之思西方美人真韻彼美人上同今西方之

人上同今興也榛木名本作桑陸璣云桑屬其子小似梯子表皮黑味如棗羅願云枝莖如木蓼葉如牛

李色高丈餘子如小栗關中廊坊甚多其字从秦從此
意也周禮籩人職云饋食之籩其實榛左傳云女贄榛
栗棗脩下濕曰隰苓艸名說文云卷耳也按爾雅卷耳
苓耳也解見卷耳篇諸家相傳則謂詩中咏苓乃爾雅
之蒿一名大苦今之甘艸是也本艸名為國老陸佃云
解百藥毒安和七十二種石一千二百種艸故號國老
之名國老賓師之稱蓋藥有一君二臣三佐四使苓者
又其賓師也故藥罕不用者雖非其君而君實宗焉蔓
生葉狀似荷少黃莖赤有節節間有枝相當喜生下澤
或云似地黃又名美丹又名蜜甘又名美艸又名蜜艸
又名落艸愚按甘艸味甘而爾雅名之大苦者反言之
也榛可供籩實資民生之用苓可備藥物救民之患害
皆有益于人者此以興教化行則人才盛也山有榛以
興國君之子隰有苓則興卿大夫之子耳今莊公所寵
之公子如州吁其州吁所從游之人如石厚有愧榛苓
多矣西方指西周也晉語齊姜氏引西方之書韋昭亦

以為西周也朱子云西方美人托言以指西周之盛王也如離騷亦以美人目其君也又曰西方之人者歎其遠而不得見之辭也所以思西方美人者非泛然懷明王之思而已春夏學于戈秋冬學羽籥文王之教也樂正司業父師司成武王周公之制也其教之成則大樂正論造士之秀者以告于王而升諸司馬曰進士司馬辨論官材論進士之賢者以告于王而定其論論定然後官之任官然後爵之位定然後祿之所謂山有榛而隰有苓者也且唐虞三代舞用國子意亦欲其早習于道非如後世給繇役之賤者而已唐臣趙慎言有言古之舞者即諸侯子孫故神祇降福靈光燭壇是以其教之人亦必擇賢人君子為之其所以立教之意何如鄭重而公僅以伶工視之徒取供悅目之娛而已教化不興則人才何以逮古可勝歎哉王應麟云大司樂言樂德樂語而終于樂舞樂師言樂成告備而終于皋舞孟子言仁義禮樂之實而終于不知手之舞之記言詩言

志歌咏聲而終于舞動容此舞所以為樂之成也繇小學之書以進于瞽宗之禮樂而成之以東序之舞則周之教法可知矣

簡兮三章章六句

朱傳作四章三章章四句一章六句序謂刺不用賢也衛之

賢者仕于伶官可以承事王者也按詩中廢教簡賢二意皆有而刺廢教之意居多若申培說以為伶官心乎王室而自傷之詩子貢傳則謂邶之伶東心乎王室又若在武庚之時然者今以詩詞觀之若有力如虎赫如渥赭皆旁觀贊歎之詞絕非自作之語至以東為伶名則別無經見尤不足信

考槃刺衛莊公也不能繼先君之業使賢者退而窮

處

出序莊公名揚武公子鄧元錫云夫武公之德聖矣務士于交儆終老弗懈也莊公有溺志賢者

退而適于野孰與盡規倣哉先公之業宜替矣故序
以為刺愚按此詩與簡兮篇宜皆為一人之作以考
槃二字知之君不用賢使之沉淪下位與伶人賤工
為伍尚能俛首求容乎所以考槃而自樂也孔叢子
載孔子曰吾于考槃見
遊世之士無悶于世

考

孔叢子呂氏讀
詩記俱作攷

槃

韓詩豐氏
本俱作盤

在澗

叶先韻居賢翻
詩作于云境埵之

處文選注云地下
黃曰于豐本同

碩人之寬

叶先韻
驅圓翻

獨寐寤言

元韻

永矢

弗諼

元韻按二章三章四句俱一韻而此上下二句各
自為韻賦也考通作攷說文云敏也毛傳云擊

也槃木器說文云承槃也籀文作盤陳氏云蓋扣之以
節歌如鼓盆拊缶之為樂也爾雅云山夾水曰澗碩人
之寬刺莊公之辭也碩人解見碩人簡兮篇寬說文云
屋寬大也莊公為人好醜兼容賢不肖無別故以寬目

之孔子所謂糟者猶糟玉者猶玉血者猶血酒者猶酒是也觀當時知州吁之好兵而不禁知石厚之匪類而不絕非寬而何寐卧也寐覺而有言曰寤俱見說文自言曰言獨寐寤言者既寐而寤既寤而言皆獨自也後放此永說文云長也矢爾雅云誓也蓋謂意之激切如矢之直也諛說文云詐也奉身而退處澗谷之間獨自寐獨自寤獨自言可謂離索寂寞矣然長久誓願如此非敢有詐所以自表其素心亦憤懣之極也記曰道合則從又曰事君者量而後入既已沉伏下僚而人君又以俳優畜之度無復表見之時矣不然學期世用而顧世耶

考槃在阿

歌韻

碩人之邁

歌韻

韓詩作

獨寐寤

歌

韻

永矢弗過

歌韻

賦也

毛傳云

曲陵曰

阿文選注

云曲景曰

阿孔穎達云

以大雅云

有卷

者阿則

阿有曲者

于隱邁為

宜想碩人

所居之地

兩山

夾水其旁

有阿也

邁說文云

艸也碩人

之邁者刺

莊公

時政憤亂亦如艸之蕪穢荒裸也歌咏也徐鍇云長引其聲以誦之也過說文云度也永矢弗過者長誓栖託于此山阿之中不復別有所從矣

考槃在陸

屋韻

碩人之軸

屋韻爾雅作逐云病

也

獨寐寤宿

屋韻

永矢弗告

叶屋韻

居六翻賦也陸說文云高平地在澗在阿在陸

釋名云抽也入穀中可抽出也碩人之軸者言其意向

總是一處蓋謂左右前後之相近者軸說文云持輪也釋名云抽也入穀中可抽出也碩人之軸者言其意向無定如軸之隨輪以轉徙也誦終風日月之篇莊公之所以待莊姜者如彼則其為人可知矣宿說文云止也獨寐寤宿者言獨寐而覺既覺而仍然止宿于彼也告通作誥謂相曉示也永矢弗告者長誓不以姓字告人如韓休逃名是也

考槃三章章四句

子貢傳申培說皆謂廊人美其君子不仕亂邦賦此殊無明據

朱傳但以爲詩人美賢者之詩而不著其世

采葛懼讒也

出序左傳稱鄭武公莊公爲平王卿士王貳于號鄭伯怨王王曰無之故周

鄭交質此詩疑鄭莊公所作也周之東遷晉鄭焉依平王不知以何事愛號而憎鄭及桓王立遂奪鄭伯政至有繻葛之役鄭固不臣而周之所以待鄭亦失其道矣

彼采葛

叶月韻居謁翻

今一日不見如三月

韻

今

比也田藝衡云彼謂君也

愚按此不敢斥言王故託之乎彼也葛解見葛覃篇田云葛性善攀附蕭艾並腐穢之物喻小人也采喻君方暱近之也小人为本好讒君又暱近之則易讒歐陽修云詩人以采葛采蕭采艾者皆積少以成多如王聽讒積微而成惑夫讒者疎人之所親疑人之所信奪人之所愛非一言可効一日可爲必須累積而後成或漸入而

日深或多言之並進故曰浸潤之譖又謂積毀銷骨也
采葛之義如是而已郝敬云葛之為物可以織讒言蔓
引何以異葛愚按葛生于初夏采于盛夏故下承三月
也一日不見謂偶以事他出不進見于君也如三月兮
如三月之久其中變態有不可知者也李氏云小人之
譖人多乘間而讒之如上官桀等謀譖霍光伺光出沐
日奏之弘恭石顯欲譖蕭望之候望之出沐日上之郝
云君臣相與近則親而遠則疎君子在君側精誠可
以直通羣邪有所畏而不敢孟軻致主憂十寒于退後
趙高竊秦使二世深居人不得見而後馬鹿之計行自
古小人排君子權奸欺庸君未有不始于離間而終于
陷害者詩人憂慮深矣古語曰一日不朝其間容刀李
觀云夫君臣之禮不可以不接不接則上恩不下流下
情不相通嫌疑易以生毀譽易以入在易天地不交則
否柔進而上行則錫馬蕃庶晝日三接也先王知其如
此故制諸侯之朝遠者不過六歲以之圖事比功陳謀

協慮發禁施政則言何以不納行何以不見知奸邪何以介其間左右何以塞其路漢刺史奏事京師其是之謂乎石顯五鹿充宗疾京房欲遠之元帝以房為魏郡太守房自請歲盡乘傳奏事天子許焉房未發詔止無乘傳奏事房意愈恐繇此觀之臣子不得見君父其禍何如詩曰彼采葛兮一日不見如三月兮一日之中尚

曰如三月三秋三歲況其久者乎

彼采蕭

韻亦叶尤
韻疎鳩翻

兮一日不見如

三秋

尤韻亦叶蕭
韻七遙翻

兮

比也蕭解見生民篇祭祀以脂藝之為香郝云蕭之為物可以藝讒

言熏灼何以異蕭姚舜牧云蕭采于秋故下承三秋又孔云年有四時時皆三月設言三春三夏其義亦同作

者取其韻耳

彼采艾

泰韻亦叶霽
韻魚刈翻

兮一日不見如三歲

霽韻

亦叶泰韻與艾翻

兮

比也爾雅云艾冰臺博物志云削冰令圓舉以向日以艾承其影得火故號冰臺一

名灸艸亦名醫艸為其可用以灸又名病艸師曠占云
歲欲疫病艸先生是也羅願云蕭與艾本皆香艸古者
天子祭以鬯諸侯蕙大夫蘭士蕭庶人艾至離騷則薄
之曰戶服艾以盈要兮謂幽蘭其不可佩又云何昔日
之芳艸兮今直為此蕭艾也蕭艾雖非惡物然比之蕙
蘭芳艸則有間矣愚按蕭艾乃士庶人所用豈得非賤
郝云艾之為物可以灸讒言燥膚何以異艾歲年也郭
璞云取歲星行一次歲星者木星也越歷二十八宿宣
徧陰陽十二月一次晉灼注天文志云太歲在四仲則
歲行三宿太歲在四孟四季則歲行二宿二十八宿三
四十二而行二十八宿十二歲而周天此星行一次而
四時功畢故年謂之歲羅云艾以久畜為善孟子所謂
七年之病求三年之艾艾之久畜者至三年此采艾者
所以一日不見如三歲也孔云積日成月積月成時積
時成歲故以月秋歲為次鄧元錫云夫尊賢莫先于去
讒已則不明好摘伺為明即有讒如或酬之親而暫離

斯有隙矣隙斯投投斯售矣嗟夫主之不明宣足賴哉
乃安得無懼矣唐人傷之曰春明門外即天涯善夫一
說此賢臣見棄而思君之作葛藟蔓延本支聯屬比君
臣情誼相維也蕭可薦祭香氣上達比君臣誠悃相通
也父可療疾采而預蓄久而益善比君臣休戚相關也
今君棄予一日不見則思之極其切矣故于采葛見慕
君之至也亦通

采葛三章章三句

子貢傳云某王好讒大夫憂之於王字上闕一字申培說以為

賢者被讒見黜于野周人閔之而作總之不能知其世以意想像之耳至如朱子目為淫奔者懷人之詩則猥斯甚矣鄭譜屬此詩于桓王謂桓王之時政事不明臣無大小使出者則為讒人所毀故懼之此但據篇次而為之說要不必有所本

詩經世本古義卷十九之上

欽定四庫全書

經部

詩經世本古義卷十九之下

詳校官監察御史_臣曹錫寶

通政使司副使_臣莫瞻菴覆勘

總校官降調編修_臣倉聖脈

校對官編修_臣吳錫麒

謄錄監生_臣程晉錫

欽定四庫全書

詩經世本古義卷十九之下

明何楷撰

周平王之世

遵大路周公卿欲留鄭莊公也

左隱三年初鄭武公莊公為平王卿士王

貳于號鄭伯怨王王曰無之故周鄭交質王子狐為質于鄭鄭公子忽為質于周君子曰信不繇中質無

益也明恕而行要之以禮雖無有質誰能間之按國語史記當幽王之時褒姒與號石父比實廢平王而

竹書又載驪山之亂號公輸立王子余臣于攜是為攜王與平王並立至平王二十一年余臣始為晉文

侯所殺然則號者平王之仇宜不得與東遷所依之
鄭莊等王不知何意反貳于號此鄭莊之所以怨王
也既而王亦自悟睚號貳鄭之非故有交質之事以
自解于鄭意即此詩之所繇作其後平王崩桓王立
復欲畀號公政於是周鄭交惡莊公如周朝王王不
禮焉周公黑肩言于王曰我周之東遷晉鄭焉依善
鄭以勸來者猶懼不說
况不禮焉鄭不來矣

遵大路

遇韻今按後章亦用路字與

兮摻執子之祛

叶

韻區

兮無我惡

叶遇韻

兮不寔

俗作

故

遇韻

也

釋文作兮

也遵說文云循也路即道也字从足从各言人足有所
適也一云道客三軌曰路摻毛傳云擊也孔穎達云以
摻字从手又與執共文故為攬也按說文無摻字宜通
作攬云好手貌執持也子謂鄭莊公也按莊公以平王

二十八年即位初為周卿士王貳于號當在此時以即位未踰年故稱子耳祛徐錯以為袖口也孔云禮喪服云袂屬幅祛尺二寸則袂是祛之本祛是袂之末無母通止辭也惡如周鄭交惡之惡寔說文云居之速也字从山从走山者屋也走者疾也言不必退居之速時莊公欲自周歸鄭故云然故舊也周公卿見莊公有不在于周之意心欲留之乃擬為遵循于大路之間攬持其袂末而告之曰子毋惡我遂歸而不留也我雖不德然不汲汲于退居者亦故舊之誼當然子寧不以厚道自處乎不言其惡平王而以為惡我婉辭也言故言好非止為挽留莊公亦所以諷王也鄭于周有興復之勲自桓公武公父子為周卿士善于其職甚得周眾其子莊公繼輔平王乃以王貳于號之故不能安于其位此周公卿所深惜也誦周公黑肩告桓王之辭可以得周公卿欲留莊公之意

遵大路

豐氏本

兮摻執子之手

有韻

兮無我

魏

有韻說文作駁釋文作敬又作穀豐本作盪云忤視貌

今不寔好

叶有韻也賦

鄭玄云言執手者思望之甚醜亦惡也孔云醜與醜古今字謂醜惡可棄之物好情好也故以誼言好以情言

遵大路二章章四句

序以為思君子也莊公失道君子去之國人思望焉今按

鄭莊公在位之時已入春秋其失道而為君子所去傳無所見愚不敢信其然朱子初亦從序說既而見宋玉登徒子好色賦有曰鄭衛溱洧之間羣女出桑臣觀其麗者因稱詩曰遵大路兮攬子祛贈以芳華詞甚妙以為宋王去此詩之時未遠其所引用當得詩人之本旨然彼為男語女之詞而此似女語男之詩又疑大道之傍不應顯然執男子之手則又指謂淫婦為人所棄者之作果爾于義更猥矣子貢傳申培說意與朱傳同而但列此詩于鄆風謂是鄆氏夫婦相棄之詞總之無據

白石刺昭公也昭公分國以封沃沃盛強昭公微弱

國人將叛而歸沃焉

王風鄭風俱有揚之水今摘篇中白石二字命篇以為識別

申培說云成師有篡國之謀國人知之而作是詩按叔虞始封于唐至子變改為晉侯再傳成侯南徙居曲沃又三傳僖侯再傳穆侯始徙居于絳穆侯卒弟殤叔立為穆侯太子仇所殺仇立是為文侯即書文侯之命平王稱父義和者仇之字也卒子昭侯立元年封文侯之弟成師于曲沃為曲沃伯而徙于翼翼在平陽絳邑縣東晉始分而為二時魯惠公之二十四年也及惠之三十年晉潘父弑昭侯而納桓叔晉人發兵攻桓叔桓叔敗還歸曲沃晉人殺潘父立昭侯之子孝侯後八年成師卒子躒立是為莊伯惠四十五年莊伯伐翼弑孝侯晉人攻莊伯莊伯復入曲沃翼人立孝侯之弟鄂侯魯隱公五年曲沃莊伯以

鄭人邢人伐翼王使尹氏武氏助之鄂侯奔隨己而
曲沃叛王命虢公伐曲沃而立鄂侯之子哀侯于翼
哀侯立二年莊伯卒子稱代立是為曲沃武公魯桓
公二年哀侯侵陘庭之田陘庭南鄙啓曲沃伐翼三
年春曲沃武公伐翼次于陘庭逐翼侯于汾隰驂絃
而止夜獲之晉人立其子小子侯桓七年武公誘晉
小子侯殺之八年春曲沃滅翼冬王命虢仲立晉哀
侯之弟緡于晉及魯莊公十六年曲沃武公伐晉侯
緡滅之遂并晉國是年王使虢公命曲沃伯以一軍
為晉侯即武公也已即位三十七年矣以上晉封曲
沃及曲沃并晉本末如此事見春秋傳竹書紀年史
記及鄭氏譜左傳注鄭敬云此托為國人從沃之詞
刺昭公之失民也章潢云讀其辭若美曲沃推其意
實刺晉昭意在言外諷詠當自得之嚴粲云時沃有
篡宗國之謀而潘父陰主之將為內應而昭公不知
故此詩深警之謂昭公勿以沃為患之在外而猶緩

也今國內有謀應之者欲奉沃以為君而篡汝之位
腹心作難而外患乘之禍已迫矣此正發潘父之謀
其忠告于昭公者可謂切至若真欲從沃則是潘父
之黨必不作此詩以泄漏其事且自取敗也又云將
叛者潘父之徒而已國人拳拳于昭公無叛心也異
時潘父弑昭公迎桓叔晉人發兵攻桓叔桓叔敗還
歸曲沃皆可以見國人之厚也

揚

子貢傳申培說豐
氏本俱作錫後同

之水白石鑿鑿

韻藥

素衣朱襮

韻藥

谷從子于沃

叶藥韻
勢縛翻

既見君子云胡不樂

韻藥

叶藥韻歷各
比而賦

也揚解見王風水喻晉侯石喻桓叔石在水中為水所
蕩滌故白鑿器之能穿木者廣韻以為鑿也石之廉利
似之揚水以求其能流雖物之易流者有不能流矣而
況于石乎但見其鑿鑿然立于水中水緩而石壯也晉

弱沃強何以異此素絲也衣中衣也中衣者朝服祭服之裏衣也後世謂之中單嚴云凡服先以明衣親身次加中衣其制如深衣但袖小長耳此以素為衣是以絲為之按玉藻云以帛裹布非禮也注謂中外宜相稱也冕服絲衣也中衣用素皮弁服朝服玄端麻衣也中衣用布大夫以上祭服中衣用素其朝燕之中衣皆以布為之士祭以朝服中衣以布惟助祭于君則中衣亦用素但不得用朱襮也朱者赤色染繒為純純者緣也襮者繡刺黼文為襪襪者領也此諸侯中衣之制也按郊特牲云繡黼朱丹中衣大夫之僭禮也大夫服之則僭知諸侯當服之也今國人具此服將以進之桓叔見欲奉為諸侯耳即一旦黃袍加身之意嚴云子指叛者下文君子既指桓叔則此言子者設言欲叛之人如潘父之徒也于往也我將從子往沃以見此桓叔其意謂國中有相與為叛以應曲沃者矣此微詞以泄其謀欲昭公聞之而戒懼早為之備也沃曲沃也地理志云河東

聞喜縣故曲沃也漢武帝元鼎六年更名應劭云武帝于此聞南越破故曰聞喜既見君子云何不樂與草蟲章同意乃未見之時而想既見之樂如此

揚之水白石皓皓

叶號韻胡暴翻

素衣

朱繡

叶號韻讀如燥先注豐氏本俱作繡

從子于鵠

叶號韻居

號

既見君子云何

石經作胡

其憂

叶號韻讀如與於到翻比而賦也說文無皓字當

作顯云白貌水微而石顯也繡毛傳云黼也孔穎達云郊特牲文繡黼丹朱中衣注謂繡讀為綃以考工記云白與黑謂之黼五色備謂之繡若五色聚居則白黑共為繡文不得別為黼稱繡黼不得同處明知非繡字也綃是繒綺別名于此綃上刺為繡文故謂之綃黼也綃上刺黼以為衣領然後名之為褱故爾雅黼領謂之褱褱為領之別名也如傳意繡得為黼者繡是畫繡是刺刺雖五色備具乃成為繡初刺一色即是作繡之法故

繡為刺名傳言繡黼者謂于繒之上繡刺以為黼非訓
繡為黼也孫炎注爾雅取毛繡黼為義不破繡字義亦
通也鵠毛云曲沃邑也孔云晉封桓叔于曲沃非獨一
邑而已其都在曲沃其旁更有邑按鵠地所在今未詳
愚意蓋指欲叛者所居之邑也曰云何其憂者晉衰
沃盛從沃之願既遂則可以免禍而無危何憂之有

揚之水白石粼粼

真韻陸德明本又作磷

我聞有命不敢以告人

真韻荀子引此詩曰國有大命不可以告人妨其躬身
疑詩原有此末句而孔子刪之第觀左傳駟赤以揚水
卒章為四言則荀子所引亦未可據此而賦也鄰說
文云水生厓石間粼粼也徐鍇云水流石間不駛也此
言水落而石見也言桓叔篡晉之謀已定如白石在清
水之中昭然可見所謂司馬昭之心路人所知也曰我
聞者通國皆知之辭命桓叔之命言已命其徒以舉事
也曰不敢告人則固已告矣語甚隱妙是巧于告密者

嚴云昭公諸詩皆以沃強為憂山有樞言死亡之迫最
激切而微詞深意未若此詩末章之云蓋反詞以見意
故泄其謀欲昭公知之忠之至也諸家皆謂國人助之
而匿其情且引陽生夜至于齊國人知之而不言為此
晉人之心異于齊也自桓叔至武公屢得志矣而晉人
終不服相與攻而去之其後更六世逾六七十載迫于
王命而後不敢不聽在昭公之初晉人之心豈從沃哉
若助桓叔而匿其情則此詩不作可也亦既聲之于詩
使采詩者賦之以諷其君矣安在其為匿之也故言不
敢告人者乃所以告昭公言我聞有命者又以見其事
已成禍至甚迫所以激發昭公者至切切也執詩之辭
而不能以意逆志固哉說詩風人之情遠矣凌濛初云
素衣朱襪何等服物我聞有命何等密謀而明明見之
篇什且不敢告人一語直同兒戲不虞敗乃公事耶謬
意此陽雖為沃陰實聳晉猶廝養卒所謂名為求趙王
實欲燕殺之也惜哉晉主孱庸辜負此一片深心耳左

傳定十年侯犯以邱叛叔孫武叔謂駟赤曰將若之何對曰臣之業在揚水卒章之四言矣

白石三章二章章六句一章四句

朱子解此詩為叛者自作非也

無論民欲叛主斷無敢作詩以自明者縱使有之亦不義之甚聖人胡為錄之于經以為後世亂臣賊子口實哉

子貢傳闕文

山有樞刺晉昭公也

序

諸大夫哀昭公之將亡而私

相告語之詞

申培說以為唐人憂國之詩按左傳云初晉穆侯之夫人姜氏以條之役生太

子命之曰仇其弟以千畝之戰生命之曰成師仇立為文公卒昭公立封成師于曲沃是為桓叔桓叔有不軌之謀而昭公不知諸大夫難察察言之故作此詩以使之覺悟非相勸為樂也胡眉嘉云是時昭公

弱不自豎桓叔強且漸逼若朝生之菌夕而即落識者傷之以甚愚之主至急之勢百務頽廢不舉之時而欲告之以保身寧家之道則其說也長而其入也無緒故喟然曰與其齷齪以待死亡何如快樂以永日所以發其傷心之痛而振其欲死之氣詩人語苦而意感迫矣其後昭公卒為潘父所弑何其難悟耶

山有樞

虞韻亦叶尤韻烏侯翻爾雅作樞石經作蔭

隰有榆

虞韻亦叶尤韻夷周翻

子

有衣裳弗曳弗婁

尤韻亦叶虞韻龍珠翻

子有車馬弗馳弗驅

虞韻

亦叶尤韻祛尤翻豐氏本作駟

宛

陸德明云一作苑

其死矣他

豐氏本作它後同

人是

愉

虞韻亦叶尤韻他侯翻漢書文選注俱作愉樞榆屬亦名莖即所謂刺榆也陸璣云其針刺如柘

興也

其葉如榆淪為茹美滑于白榆榆之類有十種葉皆相似皮及木理異爾齊民要術注云今世有刺榆木甚牢

紉可以為犢車材挾榆可以為車轂及器物凡種者直
種刺挾兩種利者為多其餘軟弱例非佳好之木也隰
解見山有扶蘇篇嚴粲云曰榆者總言諸榆也榆之種
多不知所指也陸璣釋榆云白粉也誤矣爾雅謂榆白
為粉璣誤謂榆為白粉也粉乃榆之白者無綠榆又為
粉之白者然則此言隰有榆總言榆耳管子云五粟五
沃之土其榆條直以長羅願云按陳藏器云江南有刺
榆無大榆蓋大榆北方有之秦漢故塞其地皆榆塞榆
北方之木也是以江南無榆但見樞耳若晉風則山隰
兼有之按樞榆同類禰五行書云舍北種榆九株蠶大
得齊民要術亦云于北方種榆九根宜蠶桑田穀好又
榆種至十五年後中為車轂一樹三具考工記注云轂
用稭榆意者詩人因下文有衣裳車馬之咏故即樞榆
以起興歟子大夫相謂也曳猶披拂也孔穎達云曳者
衣裳在身行必曳之嚴云漢文帝贊衣不曳地曳有優
游娛適之意婁通作縷說文云綫也衣曳而至于敝壞

則當以綫紩之也馳說文云大驅也孔穎達云走馬謂之馳策馬謂之驅驅馳俱是乘車之事宛通作窓說文謂窓宛同字非也窓字从心即今人所謂惋惜是也白虎通云死之為言漸也精氣窮也愉通作覩說文云欲也詩人之意謂此岌岌者國也此衣裳車馬之物必非我輩所能享何不及今曳婁之馳驅之之為愉快而坐視其為他人所欲乎昭公聞此若會其言外之意則必瞿然知懼汲汲然思所以為防患之計矣

山

有拷

叶有韻去九翻詩草木疏云許慎讀拷為穆今人音考失其聲也今按說文本音考或陸璣所見本

異耳隰

陸璣疏作山

有扭

韻有

子有廷內弗洒

呂氏讀詩記豐氏本俱作灑

弗

埽

叶有韻蘇后翻

子有鐘鼓弗鼓

陸德明云或作擊

弗考

叶有韻去九翻

宛其

死矣他人是保

叶有韻補苟翻說文作柷亦云山樗也郭璞云拷似樗

興也爾雅云拷山樗

色小白生山中因名云亦類漆樹古俗語云櫟櫟漆相似如一張萱云楓櫟惡木也莊子吾有大樹人謂之櫟即此與椿相類櫟本以不才而壽故莊子因而有大椿之說耳又陸璣云山櫟與下田櫟畧無異葉差狹耳吳人以其葉為茗今所云為櫟者葉如櫟木皮厚數寸可為車輻或謂之櫟櫟未詳是否柎爾雅云櫟也說文云櫟柎也郭云似棟細葉葉新生可飼牛材中車輻關西呼柎子一名土樞陸璣云葉似杏而尖白色皮正赤為木多曲少直枝葉茂好二月中葉疎華如練而細藥正白蓋此樹也今官園種之正名曰萬歲既取名于億萬其葉又好故種之共汲山下人或謂之牛筋或謂之櫟材可為弓弩幹也考工記云取幹之道柎為上櫟次之張云櫟梓屬大者可為棺槨小者乃可為弓柎之名萬歲者以櫟有億萬之義也謝朓詩風動萬年枝即此楊慎云宮中多樹之取億萬之意謂之萬年樹注唐詩者以冬青為萬年枝非也廷庭通宮中也抑詩曰夙興

夜寐洒埽庭內孔云洒謂水濕地而埽之故轉為灑灑
是散水之名埽拚除也字从土从帚會意鐘鼓廷內所
設周禮小胥正樂縣之位王宮縣諸侯軒縣大夫判縣
士特縣曲禮云大夫無故不徹懸樂記云鼓無當于五
聲五聲不得和是則天子諸侯大夫士凡奏樂必有
鐘鼓也鐘鼓之鼓从支弗鼓之鼓从支顏師古云鼓者
動也嚴云動其聲也解見鼓鐘篇考通作攷說文云敝
也敝者擊也保猶守也此章以拷杻取興未喻其指豈
亦以拷全天年杻號萬
歲有長守之義故耶

山有漆

質韻豐氏本

隰有栗

質韻

豐氏本

子有酒食何

石經作胡

不日鼓瑟

質韻

且以喜樂

音

且

以永日

質韻

宛其死矣他人入室

質韻

興也漆解見定之方中篇栗解見東門

之墀篇漆可成琴瑟栗可供籩實故以興下文酒食鼓
瑟之事魯詩傳云天子食日舉樂諸侯不釋縣大夫士

日琴瑟陳暘云此與車鄰言瑟不及琴者琴則五絃瑟則二十五絃言瑟不及琴舉大以見之也與儀禮鄉飲燕禮皆言左何瑟樂記言清廟之瑟以見琴同意言何不日鼓瑟而鐘鼓不言日者以琴瑟常御之樂故也與士無故不徹琴瑟同意一說羅泌云登歌惟王備琴瑟諸侯則有瑟而無琴燕禮登歌有瑟而已所以別于王也二且字有勿問其他意永說文云長也毛云引也曰永日者嚴云言死亡迫矣不及時為樂則有倉卒之恨是來日已短宜及今為樂以延引此日也呂祖謙云詩人豈真欲馳驅飲樂者哉蓋曰是物也行且為他人所曾有曾不若及今為樂之為愈其激發感切之者深矣非勸其為樂也呂祿棄軍其姑呂嬃悉出珠玉寶器散堂下曰毋為他人守也乃此詩之意也未章可見愚按首言衣裳車馬是身中物次言廷內鐘鼓是家中物至末章則身家之物俱有所不暇念姑偷取目前之樂而已意愈悲而詞愈切矣通篇興意惟以章首六有字引起

下文五有字蘇轍所謂有衣服車馬鐘鼓飲食而不能
用譬如山木之不采終亦腐敗摧毀歸于無用而已

山有樞三章章八句

序云刺晉昭公也不能修道以正其國有財不能用有鐘

鼓不能以自樂有朝廷不能灑埽政荒民散將以
危亡四鄰謀取其國家而不知國人作詩以刺之
也朱子以宛其死矣之言謂非臣子所得施於君
父者序說大誤其論亦正惟謂此詩蓋亦答蟋蟀
之意而寬其憂則無據甚矣且及時行樂乃狃目
前細誤者之為此相勸宣足以訓愚詳味詩意
以為大夫相告語之詞者近是又季本云此刺儉
而不中禮之詩大意言天地變化草木蕃殖未嘗
闕而不發也人于衣服車馬宮室器具飲食凡禮
所當為者乃皆閉而不用徒自憂苦一生何哉是
說也吾有取焉可舉以破夫世之為
慳者然而非詩意也子貢傳闕文

椒聊晉人美當時忠臣不入沃黨者然終有寡不敵

衆之慮所以深危昭公也

此詩據序以為指曲沃桓叔之事而韓詩外傳引碩

大且篤以為贊君子之語故特主今說

椒

豐氏本作茶後同

聊之實蕃衍盈升

蒸韻

彼其之子碩大無朋

蒸韻

椒聊

蕭韻

且

子餘反後同

遠條

蕭韻

且

比而賦也椒聊二木名爾雅云椒檝醜萊檝菜

萸也醜類也

椒與菜萸之類皆有菜菜者裏實之房也陸璣云椒樹如菜萸有針刺葉堅而滑澤說文作菜徐

錯云按說文無椒字

此菜為椒字也椒叢生如薔薇之屬非木也故但从艸陸佃云酉陽雜俎曰椒可以求水

銀菜萸氣好上椒氣好下蓋椒氣性不上達故也聊舊以為語助辭似非文理按爾雅云杞藥梅扞者聊又云

杜赤棠白者棠以兩處文法例之赤棠名杜其白者名棠則繫梅名杌其杌者名聊也杌說文云高木也聊即杌之高者郭璞云杌樹狀似梅子如指頭赤色似小柰可食蕃茂衍饒盈滿也漢志云升者登合之量也禽十為合合十為升古升上徑一寸下徑六分其深八分詩取二樹之實以比從桓叔于曲沃者其黨繁盛如此又椒氣下求則桓叔之植黨似之聊樹上亢則桓叔之偏上似之詩人取類各有當也彼其之子指晉忠臣意如師服之流惜其姓名不顯按左傳晉始封桓叔于曲沃師服曰吾聞國家之立也本大而末小是以能固故天子建國諸侯立家卿置側室大夫有貳宗士有隸子弟庶人工商各有分親皆有等衰是以民服事其上而下無覬覦今晉甸侯也而建國本既弱矣其能久乎昭公不能用其後卒為曲沃所滅若師服者可謂忠于晉者也碩說文云頭大也碩以貌言大以德言白虎通云朋者黨也時晉人多趨曲沃而之子獨介然特立不與之

為黨故詩人云然然羽翼既成雖有之子將奈之何故
于章末復咏歎之曰此椒也聊也其枝條愈布發愈益
長遠勢必至遍地無非椒聊者猶之晉人趨曲沃者日
眾不至盡化為曲沃之人不止也范祖禹云椒聊且者
本其始也遠條且者言其枝別
將遠而無窮也朱子云且歎辭
椒聊之實蕃衍盈匊

屋韻釋
文作掬

彼其

韓詩外傳作已

之子碩大且

如篤

屋韻讀如

椒

聊且遠條且

此而賦也毛傳及廣雅皆以兩手為匊字
从勺从米徐云手掬米會意陸佃云先盈

升後盈匊古者甬大而升小升之所容不足以盈匊故
也范云盈匊者不復以升較言益多也篤通作竺說文
云厚也前言無朋此言且篤守志不移純乎忠者也韓
詩外傳云子路曰士不能勤苦不能輕死不能活貧
窮而曰我行義吾不信也昔者申包胥立于秦廷七日
七夜哭不絕聲是以存楚不能勤苦焉得行此比干且

死而諫愈忠伯夷叔齊餓于首陽而志益彰不輕死亡
焉能行此曾子褐衣緼絀未嘗完也糲米之食未嘗飽
也義不合則辭上卿不活貧窮焉能行此夫士欲立身
行道無顧難易然後能行之欲行義徇名無顧利害然
後能行之詩曰彼已之子碩大且篤非
良篤修身行之君子其孰能與之哉

椒聊二章章六句

子貢傳申培說豐氏本篇名皆
作柒 子貢傳闕文申培說文

唐昭侯封公子成師于曲沃成師治聚盛強師服
憂之而作是詩序亦云刺晉昭公也君子見沃之
盛強能修其政知其蕃衍盛大子孫將有晉國焉
二說皆相彷彿解者以無朋猶云無比然沃即大
都耦國尚未併晉何至便云碩大無比哉或謂此
句及下碩大且篤皆指桓叔之德而言如此贊詞
于義悖矣郝敬云彼其之子指昭公也無朋言寡
助也篤者馬行不進貌言遲鈍也以其身為諸侯

奄有邦國故以碩大稱之于文義亦通但從來未聞有國人斥其君為彼其之子者故不敢從若朱子則以此詩謂未必為沃而作且不

知其所指則又過于疑舊說者也

戍申

鄭風亦有揚之水今摘篇中戍申二字命篇以為識別

刺平王也不撫其

民而遠屯戍于母家周人怨思焉

出序按鄭譜云幽王嬖褒姒生伯

服廢申后太子宜臼奔申申侯與犬戎攻宗周弑幽王于戲晉文侯鄭武公迎宜臼于申立之是為平王竹書紀年云平王三十三年楚人侵申三十六年王人戍申愚按此詩當與君子于役合看彼為思婦之辭此為征夫之辭

揚

子貢傳申培說豐氏本俱作場下同然考字書無場字

之水不流東薪

真韻豐氏本作

新彼其鄭箋云或作記讀或作已之子不與我戍申真韻

懷哉懷

叶微韻胡威翻亦
叶仄韻胡隈翻

哉曷月予還歸

微韻亦叶仄
韻古回翻

哉

比也揚字从手乃以手播揚之義說文以為飛舉也
束說文云縛也字从口从木徐鍇云謂束薪也口音

圍象纏也大木可析曰薪蘇轍云揚之水非自流之水
也水不能自流而或揚之雖束薪之易流有不流矣水
之能自流者物斯從之安在其揚之哉周之盛也諸侯
聽役于王室無敢違命及其衰也雖令而不至嚴聚云
薪本浮物一束之薪非不可流轉若鑿鑿之白石也而
水淺弱不能流轉之喻諸侯本非難令而東周衰弱不
能號令之也朱子云其語助也歐陽脩云彼其之子周
人謂他諸侯國人之當戍者也戍守也字从人从戈人
持戈以守也申姜姓之國四獄之後初封于宛今河南
南陽府南陽縣至宣王時遷于謝則今汝寧府之信陽

州也鄭箋云平王母家中國在陳鄭之南迫近彊楚數見侵伐王是以戍之後竟為楚所滅呂氏云平王戍申與晉平公城杞相類懷念思也曷何也還復也俱見說文彼諸侯之人無肯與我共戍中國者而獨使我周人遠戍久而不得代故我思念不置未知何月而得旋歸也朱子云先王之制諸侯有故則方伯連帥以諸侯之師討之王室有故則方伯連帥以諸侯之師救之天子鄉遂之民供貢賦衛王室而已今平王不能行其威令于天下無以保其母家乃勞天子之民遠為諸侯戍守故周人之戍申者以非其職而怨思焉又況申侯實啟犬戎以致驪山之禍乃平王及其臣民不共戴天之讐也今平王知有母而不知有父知其立己為有德而不知其弑父為可怨至使復讐討賊之師反為報施酬恩之舉則其絕滅天理而得罪于民又益甚矣劉彞云六鄉六遂之兵所以制方伯之失職非以禦夷狄也嚴云宗廟禾黍曾不以之興懷而惟申國之憂失輕重矣郝

敬云是時周室播遷非有餘勇可賈特以受人施者畏人欲不為之役不可得耳寄生之天子既不能令于諸侯六百里之甸卒又無人可為踐更故行者有不均之嘆力本寡弱而使人又不以道人所以怨之苟師出有名討賊興復如夏少康一成一旅人誰敢謂為揚之水哉夫子刪詩存此篇書錄文侯之命其作春秋始平王垂戒遠矣揚之水不流束楚叶麋韻讀如彼其之子不與

我戍甫

麋韻

懷哉懷

見前

哉曷月予還歸

見前

哉

比也

楚叢木一名荆甫國

名本作呂姜姓史記云呂尚先祖為四嶽佐禹治水有功虞夏之際受封于呂尚書有呂刑之篇禮記引之皆作甫刑唐世系表云宣王世改呂為甫按括地志故申城在鄧州南陽縣北三十里故呂城在鄧州南陽縣西四十里同為宛縣地周時荆宛并韓皆近京師韓扞臨晉以制狄宛衛武闕以制楚其後申呂皆入于楚左傳

楚子重請取于申呂以為賞田中公巫臣曰不可此申呂所以邑也是以為賦以御北方若取之是無申呂也晉鄭必至于漢然則申呂相距不遠此周人戍申而亦以戍甫與又與地廣記載蔡州新蔡縣古呂國王應麟云以左傳考之楚有申呂時新蔡屬蔡非楚邑當以在宛縣為正

揚之水不流束蒲

叶麋韻
頗五翻

彼其之子不與我戍許

叶麋韻
火五翻

懷哉懷哉

見前哉曷

月子還歸

見前哉

比也蒲陸佃云水艸似莞而編有脊生于水厓輕揚善泛柔滑而溫可以為席

故男執蒲壁言有安人之道也按左傳城文仲妾織蒲即此豐氏云楚小于薪蒲輕于楚嚴云楚愈輕蒲又愈輕至不流束蒲則弱之極矣鄭玄解為蒲柳以首章言薪下言蒲楚則蒲楚是薪之木名不宜為艸陸佃駁之云夫芻亦艸也而綢繆之詩乃曰束薪束芻束楚則宣以言木故妨艸哉許國名亦姜姓在今河南開封府許

州即古許昌是也按國語曰齊許申呂繇大姜又曰申
呂雖衰齊許猶在然則許與申呂皆同姓鄒忠肅云甫
許與申接壤當時楚人因伐申而并侵甫及許容有之
即不然而二國惕于震鄰或邀王靈併為之戍亦非必
待其見侵也國語史伯曰王欲殺太子以成伯服必求
之申申呂方強其隕愛太子亦必可知也竹書紀幽王
既弑立宜曰于申者許男與焉則平王之德甫許當亦
德申之亞夫以天子恤諸侯之患豈非義舉第平王此
舉則私私其恩實私其讐呂氏謂平之戍申與晉平城
杞相類夫晉於杞戚也非讐也以其棄諸姬而屏夏肆
君子猶譏之若平王奄奄廿
為讐人役又未可同日語矣

戍申三章章六句

申培說謂荆子討申侯弑幽王
之罪伐申侵甫及許于他史無

所見蓋拮据詩辭而為
之反覺附會不可信

君子于役戍申者之妻所作

出申培說子貢傳云戍者不歸室家思怨今

按揚之水篇云懷哉懷哉曷月子還歸哉與此詩言君子于役不知其期曷至哉語意相類以為戍申者

之妻作亶其然矣

君子于役不知其期

支韻

曷至哉

叶支韻將其翻

雞棲于埭

釋文及羣

經音辨俱作時

日之夕矣羊牛下來

叶支韻陵之翻

君子于役如之何

勿思

支韻

賦也君子婦人目其夫之辭于往也役謂行役不知其期計時也猶云不知何時可以竣事

也謝枋得云雨雪霏霏遣戍役而預言歸期也卉木萋萋勞還卒而詳言歸期也四牡之役寧幾何時勞之曰我心傷悲吉甫在鎬不過千里勞之曰我行永久不如是無以體羣臣也本推已及物之恕為敘情閔勞之仁

豈有無期度者哉今君子于役至不知其期仁恕之意
泯然矣曷至哉計地也音耗久斷恐調發無恒并其所
至之處亦不能知也雖知時畜也棲本作西加木作栖
禽經云陸鳥曰栖說文云日在西方而鳥栖故因以為
東西之西後人于鳥之栖加木以別之李巡云寒鄉鑿
牆為雞作棲曰埽夕暮也字从月半見月初生則暮見
西方故半月為夕羊牛下來者鄭箋云羊牛從下牧地
而來陸佃云先羊後牛者羊性畏露晚出而早歸常先
于牛故也日之夕矣一句關上下兩語雞棲于埽則日
之夕日而已夕則羊牛下來明明見有出即有入有旦
即有暮而欲付萍踪飄泊杳無歸期之人于不思非人
情矣鄭云言畜產出入尚使有期節至于行役者乃反
不也愚謂詩意乃因思觸物猶唐人云月明花落又黃
昏有無限感嘆非緣感物興思而方人于物也重言君
子于役彌增淒惋鄒忠肖云悅以使民民忘其勞平王
遣畿內之民為讐人役周人固已不甘使其蚤畢事言

旋猶慰室家之望觀揚之水篇言曷月予旋則固已卜
歸休無期矣居者之思當亦猶行者之懷此于役所為
賤也嘗觀杜采薇悲日月之繼嗣多恤于匪載匪來
悼啟居之不遑烈憂於載饑載渴似與此詩不甚相遠
然彼則自上閔之此則自下述之民情舒鬱所繇異乎
嗟乎先王以人道使人後世以牛羊使人而不知牛羊
之歸猶有期也齊襄葵丘之戍瓜時而遣及瓜弗代而
無知之禍因之為人上者勿以于役為細故人情固聖
王之

君子于役不日不月

叶屑韻讀如

曷其有佻

叶

韻紀劣翻
說文作佻

雞棲于桀

屑韻爾雅作櫟

日之夕矣羊牛

朱傳作

下

括叶屑韻
紀劣翻

君子于役苟無飢渴

叶屑韻巨列翻 賦也
不日不月言君子往役

非一日一月之故是已往事佻說文云會也韓詩云至
也曷其有佻言何時而有聚會至止之期乎是將來事

爾雅云雞棲于杙為桀括說文云繫也繫之為義麻一
尚也禮記註云猶結也挈也蓋以繩繫之挈而來歸曰
下括也太玄經云四馬就括義亦同此苟無飢渴猶云
庶幾無疾病苟字最下得悽惋有無可奈何之意苟幸
無飢渴庶後歸有期此思之極也後漢書所謂萬里之外
以身為本亦此意也

君子于役二章章八句

序云刺平王也君子行役無期度大夫思其危難以

風馬呂祖謙云考經文不見思其危難以風之意
朱子亦云此國人行役而室家念之之辭序說誤
矣今按篇中有雞棲牛羊等語乃尋常村莊中景象絕不似冠蓋家口角

葛藟王族刺平王也周室道衰棄其九族焉

出序申培說

亦云王族流散而作子貢傳但存平王之族流散六字而其餘闕文

縣縣葛藟在河之澍

麋韻

終遠兄弟謂他

豐氏本作它下同

人父

麋謂他人父亦莫我顧

叶麋韻

果五翻說文云聯微也

毛傳云縣縣長

不絕之貌葛藟葛之蔓也解見樛木篇羅願云葛蔓延盛者牽其首以至根可二十步朱氏云葛藟支蔓聯屬有宗族之義左傳宋昭公將去羣公子樂豫曰不可公族公室之枝葉也若去之則本根無所庇廕矣葛藟猶能庇其本根故君子以為比況國君乎此諺所謂庇焉而縱尋斧焉者也必不可君其圖之親之以德皆股肱也誰敢攜貳若之何去之即此詩托物起興之意澍舊以水厓解似未是按爾雅釋厓厓云重厓岸岸上澍蓋厓乃水邊即下章之所謂澨厓之上又有厓則為岸岸上地則為澍也然于釋水又云澍水厓者或是謂澍之下乃水之厓非以水厓名澍也胡旦云周南葛之覃兮施于中谷又云南有樛木葛藟纍之邶風云旄丘之葛

兮何誕之節兮唐風云葛生蒙楚薺蔓于野大雅云莫
莫葛藟施于條枚然則葛藟必生于山谷丘野之地延
蔓于草木條枚之上不生于河澨水厓嚴聚云近水之
岸善崩將為水所盪猶王室衰微人將失其所依也又
陸佃云河澨為水所盪危地也然潤澤葛藟而生之則
亦所以自固今王棄其九族則曾是之不如也亦通終
遠兄弟以下皆指王言斥也非諷也終遠與繇繇字相
應謂他人父所謂不愛其親而愛他人者顧說文云還
視也王之終遠兄弟畧不以親親為念繇于不父其父
而以他人為父故視我輩漠然無親而亦不我肯顧也
幽王為申侯所弑平王但以其父昔日之廢已為可恨
感申侯之立己為有德父讐不討反汲汲圖報焉非謂
他人父而何鄭忠肅云周之盛也華鄂輝于常棣苞體
茂于行葦逮葛藟之刺興而維翰之勢日衰矣周所以
卒于不

競與

繇繇葛藟在河之涘

韻紙

終遠兄弟謂他人母

叶紙韻謂他人母亦莫我有

叶紙韻羽軌翻興而此也爾雅說文皆云溪為水

厓按此詩兩章以泚溪分言溪既為厓則泚之為岸而非厓明矣謂他人母者朱子云謂他人父者其妻則母也有鄭箋云識有也嚴云莫我有言視之若無也左傳曰不有寡君

縣縣葛藟在河之

潛

真韻

終遠兄弟謂他人昆

叶真韻俱倫翻

謂他人昆亦莫我聞

叶真韻微勾翻

興而此也按爾雅云夷上洒下不潛舊注謂夷上平上洒下陷下惟不字難解或以為發聲

或以為衍字愚意不即否字言其上面平夷而陷下處則否東陽許氏以為岸下為水洒蕩盪入若脣是也溪在泚之下潛在溪之下故其序云爾昆兄也本作累从弟从累徐鍇云累目相及也兄弟親比之義省作累與昆音同通用禮天子必有父諸侯必有兄故天子無兄禮令斥王謂他人兄者醜之也聞相聞知

葛藟三章章六句

朱子謂世衰民散有去其鄉里家族而流離失所者作此詩以

自嘆于義小矣味詩意實出于王族其辭甚直而不說出一王字故使觀者不覺耳

叔于田刺鄭莊公也

序弟叔段以好勇得衆而公不

教故詩人譏之

申培說云叔段多才而好勇大夫憂之而作是詩所謂憂之者蓋憂其將

為國禍不能令終也嚴粲云二叔于田皆美叔段之材武無一辭他及而序以為刺莊公蓋與春秋書鄭伯克段譏失教之意同蘇轍云言莊公力能禁之而不禁俟其亂而加之以大戮也章潢云詞雖美叔段意實刺莊公國人不敢直指其君故詞在此而意在彼乃風之體也

叔

豐氏本作示上
有大字下同

于田

先韻亦叶真韻他
因翻豐氏本作林

巷

豐氏本
作巷

無

居人

真韻亦叶先
韻如延翻

豈無居人

見上

不如叔也洵美且仁

真韻

亦叶先韻如延翻
韻達云其字曰叔于

賦也叔名段鄭莊公寤生之弟孔
往也田者獵之別名以取禽于田

因名曰田易所謂田有禽利執言是也巷說文云里中
道也古文作𡵓从𡵓从共言在邑中所共也省作巷又

省作巷增韻云直曰街曲曰巷洵通作恂說文云信也
美以態度言仁愛人也字从人从二通論云仁者兼愛

故人二為仁以叔與衆混處故見其仁歐陽修云國人
愛叔以謂叔出于田則所居之巷若無人矣非實無人

雖有而不如叔之美且仁也嚴云叔豈真美且仁哉其
黨私之之言猶河朔之人謂安史為聖也詩人之意謂

段之不令而羣小相與從吏如此必為厲階以
自禍莊公曷為不禁止之乎故序曰刺莊公也

叔于

狩

叶有韻始九翻春秋天王
狩于河陽穀梁傳作守

巷無飲酒

有韻

豈無飲酒

見上

不如叔也洵美且好

叶有韻許厚翻賦也狩者冬獵之名杜預云狩圍守也冬物畢成

獲則取之無擇也孔車攻注云狩者獵之總名冬獵大
于三時故名以狩又爾雅云火田為狩疏以為放火燒
草守其下風故名為狩若以後篇火烈等語例之則此
亦火田也說文又謂犬田為狩未詳孰是巷無飲酒者
叔出則巷無可飲酒之人也好者獻酬款洽
情意交通之謂以其與眾飲酒故見其好

叔適野

叶麋韻讀如羽王矩翻

巷無服馬

叶麋韻滿補翻史記索隱音姥凡馬皆讀如姥

豈無服

馬上見不如叔也洵美且武

麋韻賦也適說文云之也野說文云郊外也又爾雅云

牧外謂之野詩傳云以細別言之則郊外之地名牧牧
外之地名野若大判而言則野者郊外通名服馬鄭玄
云猶乘馬也孔云易稱服牛乘馬俱是駕用之義故云
服馬猶乘馬巷無服馬者言叔出則巷無能服馬之人

矣武亦于服馬見之聲控馳騁力能使馬之謂一說夾
轅兩馬謂之服馬後篇言兩服兩驂是也舉服以該驂
耳亦通彭執中云玩味此詩宛然如見叔段輕獧浮揚
之意如今之貴族輕薄子閭里少年朋徒追逐而極口
誇美之也

叔于田三章章五句

豐氏本作大叔于田序以此篇為叔于田後篇為大叔

于田今按段稱大叔據左傳在封京之後號為京
城大叔既受寵異之號又有民人兵甲之衆不得
出居閭巷下褻民伍玩此詩有巷無居人等語當
是未受封時事耳故篇名但以叔稱子貢傳謂大
叔段多才而好勇鄭人愛之賦示于田于詩意甚
合然却衍大之一字若序云刺莊公也叔處于京
繕甲治兵以出于田國人說而歸之則全未解古
人名篇之意所謂似是而非者也朱子于此詩既

從序矣而又云或疑此亦民間男女相說之詞則胡不思後篇獻于公所之語其為叔段之事鑿鑿明甚夫亦猶此叔于田也此而可疑孰不可疑耶

大叔于田刺鄭莊公也叔多才而好勇不義而得衆

也出序莊公封叔段于京之後段始有京城大叔之號此詩古篇名作大叔于田則受封後事也范祖禹云莊公之于段稔其惡而欲斃之也故春秋書克段于鄆以罪鄭伯詩人言叔多才好勇而得衆心以深咎莊公夫段之惡易知而莊公之罪難見故春秋書鄭伯而詩人刺其君皆本其所起以罪之所以為世戒也

叔

毛詩古本叔上有大字嚴粲云采詩之初未有序故于首章加大後有序因存而不去猶書序作堯典之

下復有堯典二字存其

于田乘乘

上乘平聲下乘去聲後倣此

馬

叶

韻滿

執轡

如組

慶韻

兩驂

如舞

慶韻

叔

在藪

火烈

文選

注作

列

具舉

語韻

禮

釋文作

袒

楊暴虎

慶韻

獻于公所

語韻

將叔

無

釋文豐本

狃戒其傷女

語韻音汝以此為叔之

賦也叔于田

毛傳

俱作母

有獻于公所之句故云爾若上篇叔于出則段自出田耳乘乘馬上乘駕也下乘四數也凡物之四數者皆名乘故四馬為乘馬四鴈為乘鴈四矢為乘矢又田制四丘曰乘亦其類也又陸佃云古者庶人駕一士駕二大夫駕三諸侯駕四天子駕六乘馬則借諸侯之禮矣蓋亂生于車馬衣服之間而已大叔于田乘乘馬而沃之大夫素衣朱襮此晉鄭之所繇亂也執轡如組解見簡兮篇轡御馬索所謂韁也車四馬各兩轡以驂馬內兩

轡繫于軾，驂馬外轡及兩轅，兩服馬轡分置兩手，故在手者惟六轡耳。驂說文云：「駕三馬也。」按夏初駕兩謂之麗，殷益一謂之駟，周又益一謂之駟。春秋時鄭有公子駟，字子駟，車駕駟馬在內，兩馬謂之服，在外兩馬謂之駟。駟是有駟乃成駟也。今曰兩驂者，一驂之外又益一驂，即駟是也。故禮記注云：「外駟曰驂。」董氏云：「五御之法有舞交衢者，蓋詩所謂如舞也。服制于衡，不得如舞，其言舞者，驂也。按周禮保氏掌教國子五馭，注云：「一曰鳴和鸞，和在軾，鸞在衡，皆鈴也。升車則馬動，馬動則鸞和應。」二曰逐水曲，謂車行如水順曲而流。三曰道君表，詩毛傳謂褐纒旃以為門表，纒質以為櫛，間容握驅而入，擊則不得入也。四曰舞交衢，謂車在交道旋應舞節。五曰逐禽左，謂田車逆驅禽獸使左，當君以射，此首言叔之善御是往田在道時自矜其能，親代御者執轡其御馬光景如此。至在藪以下則至其所而田矣。後章同韓詩云：「禽獸居之曰藪。」毛傳云：「藪澤禽之府也。」孔穎達云：「澤

水所鍾水帑曰藪俱是曠野之地但有水無水異其名耳爾雅釋地說十藪云鄭有圖田此言在藪蓋在圖田也烈說文云火猛也具通作俱偕也舉火之初舉也火烈具舉疏以為宵田故持火焰之按周禮大司馬中春蒐田用火爾雅冬獵名狩火田亦名狩曹氏謂王制昆蟲未蟄不以火田惟冬田乃用火孔穎達禮記疏則云今俗放火張羅從十月以後至仲春皆得火田是則田之用火凡春冬皆有之不必宵田也然春冬之火亦自有辨所云蒐田用火不過刈草為防驅禽而納之防中然後焚而射焉所以除陳草習火攻要其所焚者不出于防外非如冬之火田直是放火焚山林以獵也若此詩所云火烈具舉後又云具揚具阜其火勢之猛如此定不比春蒐之火或即冬之火田耳又叔馳逐自雄鄭伯不善教弟其射獵不必盡依禮法然以舉火為宵田則似屬無當禮說文作膾肉膾也脫衣而見體也亦作賁荀子露賁是也今文訛作禮按禮乃丹黻衣本作褻

亦作展即王后六服中之展衣也與肉臚義無涉楊說
文云袒也袒者衣縫解也暴當作暴說文云疾有所趣
也按暴暴字易相混不可不辨公莊公也孔云公亦與
之俱田也獻于公所者進之于君前一說胡眉嘉云所
不必于田所獻之曰公所則不在田可知將請也無通
作毋禁止辭狂說文云大性驕也字从犬爾雅云復也
顏師古云怵也孫炎云狂伏前事復為也蓋因驕成慣
故徐氏解以為怵慣習是也叔之徒見叔露體解衣疾
趨搏虎相與戒叔曰請叔無驕慣此事恐虎之或傷汝
也愛之之辭鄭氏云段以國君介弟之親京城大叔之
賢而所好者馳騁弋獵也所矜者禮褻暴虎也所賢者
射御足力也出而人思之者飲酒服馬之儔也氣習至
此而又恃其君母之愛玩于莊公之惟其所欲而不誰
何也欲不為叛得乎是則置段于必亂之地者莊公也
鍾惺云叔段無大志一馳馬試劍公子耳其徒夸美亦
不過媚子狎客從臾遊戲者不然且為曲沃武公矣看

將叔無狂戒其傷女及我聞有命不敢以告人氣象大小深淺相去多少

叔于田乘乘黃

陽韻 兩服上襄

陽韻

兩驂鴈行

叶陽韻

寒剛翻

叔在藪火烈具揚

陽韻

叔善射

禍韻豐氏本作射

忌又良御

叶禍韻五駕翻

忌抑磬控

送韻

忌抑

縱送

韻

忌

賦也陸佃云黃驂曰黃黃亦馬之上色故駟

頌首章曰有驪有黃列子亦曰牝而黃牡而

驪馬至果天下之馬也舊說以乘黃為四馬皆黃然則

後章乘鵠豈又四馬皆鵠乎何叔乘馬之驟易如此愚

謂乘黃乘鵠俱當于乘字畧斷續之蓋四馬為乘于乘

之中有黃者又有鵠者或兩服為黃而兩驂為鵠也朱

子云衡下夾轅兩馬曰服按服字从舟舟即車輶也蓋

以兩服馬居輶兩旁得名襄通作驤說文云馬之低昂

也兩服上襄言兩服在兩驂之上其行並低並昂即下

章所言齊首是也兩驂鴈行者謂驂少次服行如飛鴈

章所言齊首是也兩驂鴈行者謂驂少次服行如飛鴈

斜行曲禮注云鴈行者與之竝差退是也孔穎達云此四馬同駕其兩服則齊首兩驂與服馬鴈行其首不齊故左傳云如驂之有靳揚說文云飛舉也蓋言接續而舉畧無停歇也射說文作𣎵从身从矢謂弓弩發于身而中于遠也篆改从寸寸者手也忌語助辭或作其或作已或作記或作期或作其皆音近也良亦善也御說文云使馬也从彳从卸徐鍇云彳行也卸解車馬也或彳或卸皆御者之職射御不對言叔本善射因有良御而益以濟其善射也下二句正舉其實抑發語辭毛傳云騁馬曰磬止馬曰控謂之磬者騁馬從禽隨其所使馬即從之曲折如磬也按磬之折殺其形必曲故謂之磬折控說文云引也馬行方速遇獸而射引而止之即止隨所制勒也朱子云舍拔曰縱覆彌曰送拔即括也矢銜弦處滿則放手以任其去故曰縱彌弓弣頭也覆倒也弓滿時弓弣向內既放矢則顛倒其弣並指于前如送矢遠去也又嚴粲云縱放箭也送送箭也今射

者云前手攔後手勞攔即送也勞即縱也能勞能攔則
失去勁而有力亦通陸化熙云要知磬時未嘗不控縱
時即為之送不是二事上章言徒搏第見
其始事之勇此章乃以其射獵之實言也
叔于田乘

乘鵠

叶有韻補苟翻
豐氏本作午

兩服齊首

有韻

兩驂如手

有韻

叔在數

火烈具阜

有韻

叔馬慢

叶翰

韻莫半翻

釋

忌叔發罕

叶翰

韻黃

半翻

忌抑釋棚

蒸韻

豐氏本作

弼

忌抑

豐氏本作

鬯

作

鬯

叶

蒸韻

忌

賦也

鵠鳥名

爾雅

馬驪

白襟

毛曰

鵠

蓋取

諸鳥也

郭

璞云今呼之為鳥驪齊首馬首齊也如手鄭云如人

左右手之相佐助也朱子云兩服並首在前而兩驂在
旁稍次其後如人之兩手上章言乘鵠意是主兩驂為
言而并及兩驂之善此章言乘鵠意是主兩驂為言而
明其能為兩服之助然第據驂服並行之象如此無御

之善意與首章執轡如組二句不同阜本土山之名劉
熙云厚也言高厚也毛云盛也徐光啟云始而具舉既
而具揚終而具阜形容火勢以漸而熾乃知詩人體物
之妙一字不苟此在數二句雖與上同然已是田事將
畢時矣慢毛云遲也孔云凡惰慢者必遲緩故訓慢為
遲罕毛云希也按罕本罔名所以訓希者當是謂其罔
目希疏故耳鄭云田事且畢則其馬行遲發矢希釋說
文云解也捫毛傳及說文皆云所以覆矢亦作冰昭二
十五年左傳云公徒執冰而踞服虔云冰攢九蓋杜預
云攢九是箭箚其蓋可以取飲嚴云用矢則舉捫以開
箚既用則納矢箚中釋下其捫以覆箚也啗孔云韜弓
之器啗弓蓋韜弓而納之啗中本作韞說文云弓衣也
又蒼頡名冰為矢房詩注名韞為弓室可作的對蓋矢
韜弓及田事既畢之時嚴云言其從容得意如庖丁解
牛提刀而立為之四顧為之躊躇滿志善刀而藏之也
亦可想叔段洋洋之意矣又云段有不義之謀兄弟之

間人所難言詩人優游之意但言段矜能恃勇暴虎以獻氣陵其兄私黨諂事甘言媚說方且踴躍馳騁不能自己從容畢事意氣自得其氣習輕揚麤暴如此殆非令終之器所謂智伯射御足力則賢而以不仁行之者也公何為不早禁止之乎呂祖謙云鷲鳥將擊必匿其形二詩所載段之輕淺如此宜其為莊公之所易也詩人乃若憂其不能制者宜其未得莊公之情也哉憂之云者兄弟之心也欲止其惡者也涕泣而道之者也易之云者仇敵之心也欲養其惡者也談笑而道之者也詩人直以兄弟之心為莊公憂耳宜知其他哉萬時華云叔之得衆如此為魏之信陵齊之孟嘗不足為晉之桓叔衛之州吁亦不足何也其知不深其勇不沈結納皆亡命之人終不足以舉大事莊公識破此人弄之股掌中亦久矣桓志殺段固不足言漢文實友愛諸弟不朝賜几杖不問殺辟陽侯不問警蹕稱制不問卒令以驕恣自敗損受弟之名始知國家大體畢竟私情上稍

姑息不得公義
上稍寬假不得

大叔于田三章章十句

豐氏本作叔于田
云于田二詩朱子皆以為

鄭人愛段而作非也序刺莊公無中才之教陷其
弟于惡也二詩極道段材藝武勇其繕甲治兵不
軌之志隱然言外夫子刪詩存此戒人君父兄于
子弟愛之能勿勞乎若謂鄭人美段而作何足以
風又漢匡衡謂鄭伯好勇
而國人暴虎殊非事實

將仲子鄭莊公欲陷弟段授以大邑祭仲諫陽拒之

大夫原其情而刺之

出申培說
公娶于申曰武姜生莊公及共

叔段莊公寤生驚姜氏故名曰寤生遂惡之愛共叔
段欲立之亟請于武公公弗許及莊公即位為之請

制公曰制巖邑也號叔死焉他邑惟命請京使居之謂之京城大叔祭仲曰都城過百雉國之害也先王之制大都不過參國之一中五之一小九之一今京不度非制也君將不堪公曰姜氏欲之焉辟害對曰姜氏何厭之有不如早為之所無使滋蔓蔓難圖也蔓草猶不可除況君之寵弟乎公曰多行不義必自斃子姑待之既而大叔命西鄙北鄙貳于己公子呂曰國不堪貳君將若之何欲與大叔臣請事之若弗與則請除之無生民心公曰無庸將自及大叔又收貳以為己邑至于廩延子封曰可矣厚將得衆公曰不義不暱厚將崩大叔完聚繕甲兵具卒乘將襲鄭夫人將啓之公聞其期曰可矣命子封帥車二百乘以伐京京叛大叔段段入于鄆公伐諸鄆五月辛丑大叔出奔共書曰鄭伯克段于鄆段不弟故不言弟如二君故曰克稱鄭伯譏失教也謂之鄭志不言出奔難之也鄭忠盾云嘗觀楚申無宇云制城邑若體

性焉自首領股肱至于手拇毛脉大能掉小故變而不動國為大城未有利者叔段以京患嚴公鄭幾不封櫟人實使鄭子不得其位衛蒲戚實出獻公宋蕭蒙實殺昭公魯下費實弱襄公齊渠丘實殺無知晉曲沃實納成師秦徵衡實難桓景此即祭仲所謂大城不過百雉及晉師服所謂本大而末小是以能固之說也何國無謀臣而其主不聽或戕其弟或戕其身或戕其子孫以此為鑒猶有樹國相疑豪植太強釀七國之變者嚴粲云祭仲之謀迫而淺欲速去其偏曰早為之所莊公之謀狡而深欲養成其惡曰子姑待之公與祭仲皆欲致段于死地所爭遲速之間耳公非拒祭仲也國人知公與祭仲有殺段之謀乃反其意設為公拒祭仲之辭以詛之按序云將仲子刺莊公也不勝其母以害其弟弟叔失道而公弗制祭仲諫而公弗聽小不忍以致大亂焉子貢傳亦云鄭莊公封弟段于京祭足諫之不聽大夫風之嚴云

莊公克段之事左氏以為譏失教詩序以為小不忍皆責之也輕穀梁公羊及胡氏深誅其心以為大惡後之說詩者祖其意以序為非且謂詩人探莊公之心在于殺段而託諸父母諸兄國人以為說冀以穩成其惡耳竊謂此馭序未盡莊公之惡則然而說詩之本意則未也叔段舊有奪嫡之謀莊公固已不能釋然于懷矣而又挾材武怙母寵結羣小將不利于宗國此莊公之所深忌也請制弗許請京與之迫于母意不得已焉耳始荅祭仲曰多行不義必自斃繼荅公子呂曰無庸將自及至公子呂又言之則曰不義不暱厚將崩蓋挾數用術為秋實黃落之計設心不仁矣觀段之淺露為羣小所從史而欲謀宗國何能為者耶固易之矣及段將襲鄭公曰可矣蓋幸其釁自彼作謂人不得以議我豈有涕泣而道之之意哉公固非不忍者然春秋乃聖人褒貶之法變風乃國人諷諫之辭不可以並論也此詩止以公與祭仲

有殺段之謀故設為公拒祭仲之辭以天理感動之
公論開悟之耳如此則不失詩人溫柔敦厚之旨胡
安國云姜氏當武公存之時嘗欲立段矣及公既沒
姜以國君嫡母主乎內段以寵弟多才居乎外國人
又悅而歸之恐其終將軋己為後患也故授之大邑
而不為之所繼使失道以至于亂然後以叛逆討之
則國人不致從姜氏不敢主而太叔屬籍當絕不可
復居父母之邦此鄭伯之志也王政以善養人推其
所為使百姓興于仁而不偷也況以惡養天倫使陷
于罪因以翦之乎又云世衰道隱民彞泯亂若宋殤
之于馮也衛侯鄭之於叔武瑕也皆為利爭不勝計
也而莊公獨以順母為辭養成段惡夫中也養不中
才也養不才故人樂有賢父兄也仁人之於兄弟不
藏怒焉不宿怨焉親愛之而已矣象憂亦憂象喜亦
喜恩掩義也使吏治其國而象不得有為義勝恩也
恩義並立而中持衡焉段雖凶逆焉攸亂此春秋責

莊公之意也東萊博議云莊公雄猜陰狠視同氣如冠讐而欲必致之死故匿其機而使之狎縱其欲而使之放養其惡而使之成封京之後伐鄆之前其處心積慮曷嘗預更而忘叔段哉吾嘗反覆考之然後知莊公之心天下之至險也祭仲之徒不識其機反諫其都城過制不知莊公正欲其過制諫其厚將得衆不知莊公正欲其得衆是舉朝之卿大夫皆墮其計中矣鄭之詩人不識其機反刺其不勝其母以害其弟不知莊公正欲得不勝其母之名刺其小不忍以致大亂不知莊公正欲得小不忍之名是舉國之人皆墮其計中矣莊公之機心猶未已也魯隱之十一年莊公封許叔而曰寡人有弟不能和協而使糊其口于四方況能久有許乎其為此言是莊公欲以欺天下也魯莊之十六年鄭公父定叔出奔衛三年而復之曰不可使共叔無後于鄭則共叔有後于鄭舊矣段之有後是莊公欲以欺後世也既欺其朝又

欺其國又欺天下又欺後世噫嘻岌岌乎險哉莊公
之心與胡云莊公志殺其弟使糊其口于四方自以
為保國之計得也然身歿未幾而世嫡出奔庶孽奪
正公子五爭兵革不息忍儀疊突之際其禍惜矣亂
之初生也起于一念之不善後世則而象之至於兄
弟相殘國內大亂民人思保其室家而不得不亦酷
乎

將仲子兮無

豐氏本作
母下同

踰我里

紙韻無

豐本作
母下同

折我樹杞

紙韻宣敢愛之畏我父母

紙韻仲可懷

紙韻也

紙韻也

翻也父母之言亦可畏

叶微韻於非

翻也

將毛傳云

請也仲子祭仲也名足仲其字鄭大夫也其先為祭封
人因以為氏踰說文云越也周禮五家為鄰五鄰為里

皆有地域溝樹之折說文云斷也杞木名陸璣云柳屬也生水傍樹如柳葉麤而白色理微赤今人以爲車轂按杞材堅韌故以比段季氏云無踰我里言無與我家事也鄭玄云無折我樹杞喻言無害我兄弟也蘇轍云異姓而干公族以謀兄弟譬如踰里而折杞也呂祖謙云首三句辭雖拒仲而意則與之如侍人僚祖告昭公以去季氏之謀公執戈以懼之之類鄭云段將爲害我豈敢愛之而不誅歟以父母之故故不爲也蘇云莊公非畏父母之言者也欲必致叔于死耳夫叔之未襲鄭也有罪而未至于死是以諫而不聽諫而不聽非愛之也未得所以殺之也未得所以殺之而不禁而曰畏我父母君子知其不誠也故因其言而記之夫因其言而記之者以示得其情也呂云豈敢愛之畏我父母則于段非有所不忍也其拳拳于叔而不得已于姜氏者可見矣郝敬云借莊公之口以誅其心辭若寬而心甚險千載讀之如見肺肝詩所以善于諷也鄭云懷私曰懷

言仲之為我謀實與我親睦以私情論若可懷也然聽人言而忍于同氣在父母必有怨望之辭亦可畏也此又詩人因上有畏我父母之言而撥轉之以致其諷動之意含情更深嚴云公未嘗有是言也而詩人代公言之若謂公縱不愛段獨不畏父母乎蓋譎諫也孔云於時其父雖亡遺言尚存故與母連言之也 將

仲子兮無踰我牆

陽韻

無折我樹桑

陽韻

宣敢愛之畏我諸

兄

叶陽韻 虛王翻

仲可懷

見前

也諸兄之言亦可畏

見前

也

賦而此也牆說

文云垣蔽也字从音取愛音自護也桑亦木之勦者故以此段按孟子曰五畝之宅樹牆下以桑則桑在牆下也諸兄毛云公族嚴云諷公縱不愛段獨不畏公族之議乎 將仲子兮無踰我園

叶先韻 于權翻

無折我樹檀

叶先韻 徒汾翻

宣敢愛之畏人之多言

叶先韻

先

韻倪堅翻

仲可懷

見前

也

人之多言亦可畏

見前

也

賦而此也

孔

云太宰職園

園

園

園

圃毓草木園者圃之藩故其內可以種木也檀彊韌之木可以為車亦以此段鶴鳴之詩云樂彼之園爰有樹檀羅願云淮南子十月檀檀陰木也王充云楓桐之樹生而速長故其皮脆不能堅剛樹檀以五月生葉後彼春榮之木其材彊勁車以為軸人國之人也繇父母而諸兄而國人立言之序如此嚴云諷公縱不愛段獨不畏國人之多言乎呂云畏我諸兄畏人之多言特迫于宗族國人之議論非愛段也具文見意而莊公之情得矣豐熙云莊公所以不惜以京授段者乃老子所謂將欲取之必固與之其術深矣顧諟於諸兄國人之言蓋潛秘其機而陽以拒仲之諫耳又晉語公子重耳安于齊姜氏勸之行曰西方之詩有之曰懷與安實疚大事鄭詩云仲可懷也人之多言亦可畏也韋昭注云言雖欲從心思仲猶能畏人自止見可懷思可畏也

將仲子三章章八句

左襄二十六年鄭伯為衛侯如晉晉侯言衛侯之罪使叔

向告鄭伯子展賦將仲子兮晉侯乃許歸衛侯叔向曰鄭七穆罕氏其後亡者也子展儉而壹詩篇名多兮字實即此詩也此詩為祭仲諫大叔事而作語意昭然無可疑者朱子先有成見胷中主定鄭衛皆淫詩一聞蒲田鄭樵氏謂此淫奔者之辭便欣然引為同調令人慙極

野有蔓草刺鄭莊公也祭仲為公謀去段遂有寵于

公國人託為公愛仲之辭以刺之

按段之初封京也祭仲實首先為公

謀其言曰今京不度非制也不如早為之所無使滋蔓蔓難圖也蔓草猶不可除况君之寵弟乎此詩以野有蔓草發端因祭仲之辭也又左傳曰初祭封人仲足有寵於莊公莊公使為卿夫仲之先不過一封

人耳已而驟進為卿則以為公忠謀之
故因而獲寵詩所為歌邂逅者此也

野有蔓草

豐氏本作

零

豐本作

露漙

叶阮韻上充翻陸德明本作團顏師

古糾繆正俗作寧云古本有水旁作專者皆當讀上充切叶清揚婉兮陸梁云今韻書作上充切非蓋充字傳寫作衮耳楊慎云婉字在阮韻寧字當從之矣諸韻書不收當補入之

兮有美一人清揚

婉

阮韻集

今邂

豐本作

迨

陸本作遘豐本作覲後同

相遇適我願

叶

韻五

兮

興之比又賦也野在四郊之外蔓說文云葛屬莖葉相聯野有蔓草比叔段也說見小引下零

之為義雨餘也露之潤澤似之故亦曰零蔡邕月令章句云露者陰液也釋為露結為霜溥說文云露貌草之延蔓者凝露濃以此段之有寵于姜氏也有美一人指祭仲足也清揚解見君子偕老篇婉順也言其眉目之

間和順可掬也邂逅二字說文皆解云不期而遇也遇說文云逢也祭仲以封人入見于公故曰邂逅相遇猶當也願通作愿愿者專謹之義人心有所愛則謹持之而不能釋謂之愿也適我願兮言與我心之所懷來者適相當也公欲去段仲亦欲去段謂之曰適我願兮以見莊公之處心積慮欲害弟段見乎辭矣又左襄二十七年鄭伯享趙孟于垂隴子大叔賦野有蔓草趙孟曰吾子之惠也昭十六年鄭六卿餞晉韓宣子于郊子舊賦野有蔓草宣子曰孺子善哉吾有望矣韓詩外傳亦云孔子遭齊程木子于郊之間傾蓋而語終日有間顧子路曰繇束帛十匹以贈先生子路不對有間又顧曰束帛十匹以贈先生子路率爾而對曰昔者繇也聞之于夫子士不中道相見女無媒而嫁者君子不行也孔子曰夫詩不云乎野有蔓草零露漙漙兮有美一人清揚婉兮邂逅相遇適我願兮且夫齊程木子天下之賢士也吾于是而不贈終身不見也程木子名本即子

華子家語說苑及子華子孔叢子諸書具載此事
皆借此詩以表其喜于相遇之意要與詩旨無涉
野

有蔓草零露漙漙

陽韻奴當翻

有美一人婉如清揚

陽韻邂逅

相遇與子偕臧

陽韻

興之比又賦也漙漙露盛貌段封京未已又命西鄙北鄙貳于已又收

貳以為已邑至于廩延此蔓草得露之盛也婉如清揚猶言清揚婉如倒句法也亦就上章語而翻之耳偕俱臧善也與子偕臧猶言欲與子共安樂同富貴也蓋莊公感仲之深如此不愛其弟而愛同謀害弟之人莊公可為有人心乎此詩不必莊公作而國人代為之言欲公聞之而自醜之也

野有蔓草二章章六句

序以為思遇時也君之澤不下流民窮于兵革男女

失時思不期而會焉呂祖謙云君之澤不下流蓋講師見零露之語從而附益之而陳氏引綱繆詩

云見此邂逅以為邂逅正謂婚姻若爾直為野合
紀咏耳子大叔輩何取焉蘇轍云信如此說則趙
文子將不受雖與伯有同譏可也時伯有賦鶉之
賁賁文子譏之朱子直改為男女相遇于野田草
露之間而作邪穢已甚更不足辨子貢傳申培說
則云曰季過卻缺于冀薦于文公晉人美之意頗
近似愚所以斷其不然者以左傳為証當子舊賦
此詩餞韓宣子宣子美之以為賦皆不出鄭志豈
得入之
唐風耶

詩經世本古義卷十九之下